

YAMAJAM CHICHAM LUCAS AGAGBAU

Nagkabau

¹ Kuashat aents agajaje jutiiní wají augmatbau dekaskenum nagkaemakiuwa nuna pachisag. ² Dita Jisusan dekas wainkau aidau, chichaman etsejuina nu jutiinashkam dutiksag jintinja-mawaju asamtai, ³ wishakam aikasnuk, wajak nagkamdauwaita nuna ashí iniimsan shiig dekaan agatjame, aneetaiju Teofiloh, ⁴ amina dekaskea nuna jintinjamawajua nu shiig dekau aminum tau asan.

Juan Yamijatin akiinatnuji etsegkamu

⁵ Herodes Judea apuji wajas pujamunum, nu tsawantinig pujujakuí sacerdote Zacarías, Abías wegantu. Niina nuweg Elisabet aajakuí Aarón wegantu. ⁶ Ditak Apajuí emtinish pegkegchauji atsugbau aajakajui, nunidau asag Apajuí chicham umiktajum tibaunashkam imatiksag betek umiidau. ⁷ Tujash uchijig atsujuidau, Elisabet kaga asamtai, nuigtushkam ditak muuntuch wajasaju asag.

⁸ Nuniamunum Zacariasjai ijunag Apajuí takajin aidau takastin tsawan jegamtai, jega Apajuí emematku ijuntainum takaak batsatbaunum, ⁹ tuke dutikin asag: ¿Yaki jega Apajuí ememattai dekatkau tesamu Pegkejam tutaya nui wayaash, kugkuin incienso tutainash apeati? tabaunum

Zacariasan antigkui. ¹⁰ Nunik Zacarías incienso apetai, ashí aents aidauk agaa ijunas Apajuin aujú ijunaidau. ¹¹ Nuniai Apajuí aentsji nayaimpinmaya Zacariasan wantintuk, altar incienso apetainum ayaumas untsugnumanini wajantau. ¹² Nunittaman wainak Zacariasak puyatuk senchi ishamak dii wajau. ¹³ Nunitai:

—Zacariasah ishamkaipa, ame Apajuí aujam nunak Apajuik antugtamkae. Nuniau asamtai nuwem Elisabet aishmagkun uchigmakmatai, Juan adaikattame. ¹⁴ Nunikmatai shiig aneasam dakujustatme. Tuja kuashat aents aidaushkam shiig aneediagtatui nu uchi akiinamunum. ¹⁵ Duka Apajuí wakegamun takajin atinai. Uwagchatnai vinunash, umutai kajiau aidaunashkam. Dukuji wakeen nagkam-sag Wakaní Pegkeji tuke ajitnai. ¹⁶ Ni etsegbaunum kuashat Israelan uchiji wegantu aidauk, pegkegchau takatan idayinak, ditá Apuji Apajuiya nuna umijiagtatui. ¹⁷ Niiyá eemak taa etseggattawai Apu minitnun, Apajuí etsegtin Elías, Wakaní Pegkeji senchiji ajujakua nunisag. Dutikak muun aidaush uchijijai chichaman iwajag pujustinme, aents intimkiu aidaushkam chichaman betek umiktinme, apu minitaish shiig anentus jukita tuidau asag.

¹⁸ Tusá tama Zacarías ayaak:

—Wi, mina nuwajai muumpakig juninnush ¿itugsanuk dekaskeap tawa duka uminkattawa titaja? —tau.

¹⁹ Tutai:

—Wika Gabrielaitjai dekas Apajuí inakegaitjai, ni awetime chicham pegkeja nuna ujakti tusa.

²⁰ Tujash dekaskeap tujutua tatsum duwi, yamai nagkamsamek chichatsuk pujusam, tsawan wi tajam nu ejetatme, —tau.

²¹ Nuniai aents aidauk: “¿Zacariasash wagkag jega Apajuí ememattainum wayaash imanikash megkaekae?” tusag daká batsatu. ²² Nuninai jinki augmamainchau dekapeak ayatak iwiimau, nunitai aents aidauk: “Jega Apajuí ememattainum wayaa awiyap wantintuke”, tuidau.

²³ Nunik Zacariasak takaamujinak ashí umik ukuak, ni jeen wakitkiu. ²⁴ Nuna nunik dukap tsawan pujatsaig nuwe Elisabet ejapjuku, nunik wantintsuk jeenig pujus cinco nantun inagkeakui. ²⁵ Nigka nunak: “Apajuí wait anenjak jutijuae, yamaik tikich aidaush uchigmachui tusag dushijin agma nunak tujutchagtatui”, tau asa nunikui.

Jisus akiinatin etsegkamu

²⁶ Elisabet ejapjuk seis nantu pujai, Apajuí Gabrielan yaakat Nazaret tutai, Galilea nugkanum awa nui awemauwai, ²⁷ nuanuí makhichik nuwa María daagtin aentsú takashtai, apu David aajakua nunú wegantu José anagmamumu pujau asamtai. ²⁸ Nunik Gabriel María pujamunum wayaa:

—María pujamek, aminak ashí nuwa aina nuwiyany Apajuí wakejus etegtamjae. Dutijabau asa Apajuik amijai awai, —tau.

²⁹ Tujash nigka nuna wainak puyatkau, wagkag tuush kumpamjawa tusa. ³⁰ Nunitai Apajuí aentsji nayaimpinmaya chichajak:

—María ishamkaipa, aminak Apajuí etegtam-jau asa shiig anenjamui. ³¹ Dutikamu asam, ejajjukam aishmag uchigmakam adaikattame JISUS. ³² Duka eme anentai atatui, nuniau asa 'Apajuí Uchijí' tama atinai. Apu Apajuiya nu, niina muunji apu David inamajakua iman emat-tawai. ³³ Dutikamu asa, Israela uchijí wegantu aidaunum tuke inamjatnai, ni inabaujig ajumaish nagkankashtinai, —tau.

³⁴ Tutai María ayaak:

—¿Dusha wajuk nunimainaita wi aishinchauwaitagjama? —tau. ³⁵ Tutai nayaimpinmaya aents chichaak:

—Wakaní Pegkeji, Apajuí senchijiya nujai aminak tajutjamamtai ejapjuktatme. Nuaduí uchi akiinatta duka, pegkejam 'Apajuí Uchijí' tama atinai. ³⁶ Tuja ame pataim Elisabetchakam muumpatnum uchin ejapjuka, nunik seis nantu wegawai, kagai tinu agma nunú. ³⁷ Apajuí tujinmainuk makichkish atsawai, —tau.

³⁸ Tutai:

—Dekas wika Apajuí inakegaitjai, ame mina tujutam duka nunisag uminkati, —tiu.

Timatai nayaimpinmaya aentschakam wegak ukukiu.

María Elisabet ijagsamu

³⁹ Nunú tsawan wegamunum, María waujus jiinki weuwai, Judea nugka mujajin yaakat aunum. ⁴⁰ Nuwi jegaa, Zacariasa jeen wayaa Elisabetan kumpamak, ⁴¹ María chichatai, Elisabetan wakeenia uchi kakaaju, nuniaig Wakaní

Pegkeji egkemtuju, ⁴² dutikam senchi jiiká chichaak:

—Ashí nuwa aina nuwiyan amina Apajuí etegtamjae, antsag amina uchigmishkam pegkegmai. ⁴³ Wi imanchawaitag nunin aish, ¿wagka mina Apujú dukujimesh waitkatasamesh miname? ⁴⁴ Ame jegaa wayaam mina kumpamjakum chichaam nuna antaig, uchi kakaaje shiig aneak. ⁴⁵ Shiig aneestatme amek, dekaskeap Apu tawa duka uminkattawa tiu asam.

⁴⁶ Tutai Maríashkam:

“Wika Apajuinak dekaskenum mina anentaimtagjai emematjai, tikima senchigtina ibau asamtai.

⁴⁷ Shiig aneamu ajutui Apajuí mina uwemtijin asa,

⁴⁸ wi imanchauch aigkish niina inake asamtai mina etegtua duwi.

Yamai nagkamsag ashí aents mina pachitus chichainakug:

Maríak Apajuí etegkamu asa shiig aneas pujusuí, tusag tuké tujutiagtin ainawai.

⁴⁹ Apajuí dekas ashí senchigtina nunú minai uminkatnun tujuti duka shiig tumaitsui, niina daajig pegkegmai;

⁵⁰ Apajuik aents aidau niina umijuidaunak take wait anentsagké atinai.

⁵¹ Nigka tikima senchigtina ibau asa junak jutikae; dutikak, emebau aidaunash imanchau emakui.

⁵² Apu inamin aidaunashkam jiikí ajapeak, aents imanchau aidaun apu emakui.

⁵³ Aikasag nujantai waituidaunashkam ashí pegkeg aidaunak susauwai,

dutikak wiyakuch aidaunak wainak idaisauwai.
⁵⁴ Ni inake Israel wegantun ayamjuke, dita wait
 anentanak kajimatkiche,
⁵⁵ jutii muunji Abraham aajakua nuna aatus
 anagkuauwai,
 nuigtú ni wegantu akiinak wegagtina nuwish
 tuke atina nuna.”

⁵⁶ María nuna ti, Elisabetan jeenig kampakum
 nantu tumain pujusuí, nunik wakitkiuwai niina
 jeen.

Juan Yamijatin akiinamu

⁵⁷ Elisabet tsawanji uminkamtai aishmagkun
 uchigmakui. ⁵⁸ Nunikmatai nui ijutkau bat-
 sataidau, niina patayí aidaujai Apajuí wait
 anenjam uchigmakbaun antukaju asag shiig
 aneasajui. ⁵⁹ Uchi akiina ocho tsawan wetai,
 judío aidauk uchi aishmag akiinaunak tuke
 pakaji* ajapjin asag, jukiajui nuna dutikawagta-
 tus. Nuninak: “Uchik Zacarías atí, apají daajiya
 nunisag”, tuidau. ⁶⁰ Tujash uchí dukují chichaak:
 —Atsá, uchik Juan atatui, —tau.

⁶¹ Tutai: —Ame pataim aina nuwiyag tu daagt-
 inuk atsajama, —tuidau.

⁶² Tutai uchí apajin iwiyas iniidau, ya atí
 tawaki tusag. ⁶³ Nuniagtai, taapna sujustá
 tusa inakmatai susam: “Uchí daajig Juagkai”
 tusa agaju. Dutikamtai ashí anentai jegagchaju.

⁶⁴ Nuna dutikamuik ataktú chichakú. Nunik

* **1:59** “Pakaji ajapjin asag” tawa nunak, judío aidauk uchi
 aishmag akiinamtaig, Apajuí dutikata tibau asag uchí katiuchiji
 chuchuken tsupigkag ajapjukú asamtai tawai. Diistá Gén.
 17.10-12; Lev. 12.3.

Apajuin emematiu. ⁶⁵ Nunitai nui ijutkau batsamin aidauk puyatjukaju. Ashí Judea mujajin batsamin aidaushkam nunak ashí dekaawaju. ⁶⁶ Ashí aents nuna antuidauk: “¿Ju uchish wajukuk atinaita?” tusag anentaimaidau, Apajuí niina senchijin yayamun dekaidau asag.

Zacarías Apajuí emematbau

⁶⁷ Zacarías Wakaní Pegkeji egkemtujam chichaak:

⁶⁸ “Emematiagmi Apu, Israelan Apajuijiya nu, ni aentsjin uwemtijatatus tau asantai.

⁶⁹ Dekas senchigtin Uwemtikagtinun awetugmaji,

ni inake David aajakua nu wegantun.

⁷⁰ Yaunchuk nagkamas Apajuí etsegtin pegkejam aajakaju etsegkajua dutiksag,

⁷¹ iina shiwaji aidaun,

nuigtú ashí tikich aents kajegtamin aina nunash depetuk uwemtijamjatna nuna.

⁷² Iina muunji aajakajua nuna pegkejan anagkuak:

‘Tuké aminak wait anenjatnaitjame’, tiuwa nunak kajimattsuk betek umiké.

⁷³ Iina apajin Abragkan dekas umiktatjai tiuwa duka juuwai:

⁷⁴ ‘Wi ditá shiwajinash depetukan agkan ematnaitjai,

dutikam ishamkagtutsuk minak umigtuinak,

⁷⁵ pegkediag batsamas,

wi wakegamunak ashí tsawantai takastinme’,” tiuwai.

⁷⁶ Nuna ti uchijinashkam:

“Amek Apajuí etsegtinai tama atatme;
amek Apu takastina nu emtikam umigkattame.

⁷⁷ Ni aentsji aidau uwemjatnuji,
tudauji tsagkugnagtinchakam pachisam ujak-
tatme.

⁷⁸ Nunak Apajuí shiig wait anenjamu asa
nayaimpinmayan Uwemtikagtinun awe-
tugmae,
etsa minak tsawantan tsaaptin emama numam-
tuk wajaktinun.

⁷⁹ Tudau takainak,
suwenum batsamas wajukmaina numamtuk wa-
jainak,
jaak megkaemainnum batsatunash tsaaptinun
iwaintuktatui.

Dutikak junta agkan pujutnum ekagtina nui wet-
inme tusa dekamtijamattawai”, tiuwai.

⁸⁰ Uchishkam tsakaak nuni senchi jintiag anen-
taimu, nuniak uwegshunum pujusuí, Israelnum
chicham etseगतin tsawan jegatai Apajuí awe-
mam wantinkatatus.

2

Jisus akiinamu (Mt. 1.18-25)

¹ Nu tsawantin Roma apuji Augusto daagtin,
ashí aents aidau daaji agatnakti tusa inamjau.

² Junak dutikchatain Cirenio, Siria apuji we
pujai dutikauwai. ³ Tibau asamtai aents aidauk
makí makichik ditá yaaktajin agatmamjatatus
shimuidau.

⁴ Tuja Joseshkam Galileanum yaakat Nazaret
awa nuwiya juwaki Judea nugkanum jegau,

yaakat Belén apu David akiinamu aajakua nui, nigka David wegantu asa. ⁵ Nui agatmamjatatus wegak, ni nuwenamig tusa anagmamuji María ejamtinun ayasá weuwai. ⁶ Nunikag nui jegaa pujuinai tsawan ni uchigmaktinji jegajui. ⁷ Nunikmatai iwaijin aishmagkun uchigmaku, dutika uchi pempetaiyai pempeag tagku ayugtainum egkeauwai, ijagka kajiitainig dita ayamainuk agkantak atsusú asamtai.

Uwijá kuitamin aidaun nayaimpinmaya aents aidaun wantintukbau

⁸ Nunú kashia duwik, uwijá kuitamin aidaushkam nu nugkanmag uwigjin kashi kuitamainak batsatu. ⁹ Nuniai Apajuí aentsji nayaimpinmaya wantintuku, dutikak Apajuí tsaaptinjiya nu tsawan awasau dita batsatbaunum, dutikam shiig senchi ishankajui. ¹⁰ Nuniagtai nayaimpinmaya aents chichaak: “Ishamkaigpajum, wika atumin yamajam chichaman ujaktasan minitjime, nuna antuinak ashí aents aidauk shiig aneasagtata nuna. ¹¹ Yamai kashia juwi, apu David akiinawuwa nunú yaaktanmag uwentikagtin Apu Kristu akiinae. ¹² Tagku ayugtainum uchi pempeajam egketu wainkajum, juwapita titajum.”

¹³ Nuna taig kuashat aents nayaimpinmaya aidaun wantinjau, nunikag Apajuin emematuinak kantamainak:

¹⁴ “Nayaimpinmash Apajuiya duke ememati-agmi,

nugkanmayanash ashí niina umijuidaunak shiig agkan anentaimsa pujutan susatta duwi”, wajaïdau.

¹⁵ Apajuí aentsji nayaimpinmaya aïdau tusa ditan ujak, nayaim waketjamtai, uwijan kuitamin aïdau pempentunisajag:

—Belén uchi akiinae tusa Apajuí tujama nunú wegaja wainkagmita, —tuidau.

¹⁶ Tusag waujus wegag jegakmag, Marían Josejai, nuigtú uchi tagku ayugtainum egkematman wainkaju. ¹⁷ Nunik wainkag uchin pachis nayaimpinmaya aents tibaun etsejuidau.

¹⁸ Tusag uwijá kuitamin aïdau etsejiagtai, ashí aents aïdauk puyatus antuidau. ¹⁹ Maríashkam nu etsejuinamun antuk, sakapamainchau anentaimu. ²⁰ Nunikag uwijá kuitamin aïdau waketuinak, Apajuin emematuinak see tuidau, ashí nayaimpinmaya aents tibaunak imatiksag wainkaju asag.

Jisus jega Apajuí ememattainum ejegamu

²¹ Ocho tsawan jegamtai, uchin pakaji ajapjuinak adaikaju JISUS. María eke ejapjumainchau aig, nu adaikattame tusa nayaimpinmaya aents tibaunak dutiksag.

²² Moisés chicham umiktinun agajua nui, uchigmaku aïdauk cuarenta tsawan jegatai pegkeetnume tibauwa nuna ejeyag, Jerusalén weenak uchin jukiaju Apajuí emtin iwainakagatatus, ²³ Apajuí chicham umiktajum tibaunum: “Ashí uchi aishmag iwai akiinuk Apajuinu atí”, tibau asamtai. ²⁴ Weenak Apajuinu atinun jukiaju chicham umiktajum tibaunum: Jimag

tórtola,* nu atsakuig jimag paum tsakat itaatajum tibauwa dutiksag.

²⁵ Nunú tsawantinig Jerusalén pujujakuí Simeón daagtin, aents pegkeg, Apajuí senchi aneen, Israelan Apajuí agkanmitkamun wainkatatus daká pujujin, Wakaní Pegkejishkam ajamu. ²⁶ Nuniau asa dekamtikau aajakuí: Apajuí awemamu waintsukek jakashtinaitme, tusa. ²⁷ José Maríajai Jisusan jukiag jega Apajuí ememattainum jegawaju, chicham umiktinum dutikatajum tawa nuna betek umikagtatus. Nuniai Simeogshakam, Wakaní Pegkeji anentaimtikjam jegau. ²⁸ Nunik uchin midaaki juki Apajuin emematu, nuniak:

²⁹ “Apuh, yamaik ame chicham tujutbauwa duka uminkau asamtai, shiig anentaimsan jaaknush jakatjai.

³⁰ Uwemtikagtina nunak yamaik mina jiijuí wainkajai,

³¹ ashí aents aidaushkam ame awemamun wainkagtata nuna.

³² Juka tsaaptina nuninai, ashí aents judiuchu aidaunashkam uwemtikatin asa, tuja amina aentsjum Israel aents aina nunash eme anentai ematnai”, tau.

³³ Uchí pachis tutai, Josek Maríajai anentai jegachaju. ³⁴ Nuna ti ditanashkam:

—Atumnash Apajuí yaimpaktinme, —tusa idayak, Marían chichajak:

* **2:24** Tórtola tawa duka pauma numamtin tagkumtai aajakuí.

—Nijah, jujú uchia junak Israel aents aina nuwiyag dakitiagtinai, nuniai kuashat nemajuidaush agtinai nuninak uwemjagtinai. ³⁵ Nuniagtai Apajuí ashí aents anentaibaujin paan iwainatta duka, (aminak nagkí ijumaina imatijamak anentaiminig waitkagmastinai), —tau.

³⁶ Nuanuig nuwa Apajuí etsegtin Ana daagtin, Fanuela nawanji Aser wegantu shiig muuntuch wajasá pujau. Nigka shiig tsakatuch aishina siete mijan pujusuí, ³⁷ nuniau wajemea ochenta y cuatro mijan wegau, nuigtushkam juga Apajuí ememattainmag tuke tsawai kashishkam, yujumkan ijagmá pujus Apajuin aujú pujú. ³⁸ Nunin asa Simeón tusa ashimkamtai, Anashkam jegantá, Apajuin see taku emematak Jisusan pachis:

—Ashí aents Jerusalén agkanmagati tusa dakaina nunak ju uchi dutikatnai, —tau.

³⁹ Apajuí chicham umiktajum tibauwa nunak imatiksag umikag, ditá yaaktajin Nazaret waketajau Galilea nugkanum awa nui.

⁴⁰ Nunik batsatbaunum Jisuschakam tsakaak iyashinish senchi wegau, nuniak nuní senchi jintiag anentaimu, Apajuí wakega nunashkam shiig dekau, tuja Apajuishkam niini shiig aneau.

Jisus tsakat asa juga Apajuí ememattainum webau

⁴¹ Makí makichik mijantin José Maríajai, Jerusalén tuke wesagké aidau Pascua jegatai.

⁴² Nunin asagmatai Jisuschakam doce mijan ajamu weu, ditajai Jerusalén jista inagkeautaiya

nuna betek dutikatatus. ⁴³ Nuwi jegawag bat-samas, Pascua ashimnakmatai waketjaju, nun-inai Jisusak Jerusalén juwaku, niina dukujish Joseshkam dekatsaig. ⁴⁴ Dita anentaimsajag tikich aidaujais ijunag wegatai tusag, makichik tsawan kuwaekaju, nuniau ashí ditá waintai, nuigtú ditá patayí aidaunmash egakú. ⁴⁵ Tujash wainkachag Jerusalén waketjaju egainak.

⁴⁶ Nunikag kumpatum tsawanta juwi wainkaju, jega Apajuí ememattainum chicham umiktinun jintinkagtin aidaujai ejapena ekeemas, chichaagtai antak niishkam iniimak eketun. ⁴⁷ Ashí aents ni chichaamun antujuidak, yachajin diijus puyatkag diidau, dita iniamash shiig aimu asamtai. ⁴⁸ Nunittaman apají dukujjai wainak puyatjuk, dukují chichajak:

—Uchuchih ¿wagka tikima aan wekaenaitme? Nijah, wi apajai shiig senchi puyatjukan egakun wekaetusjamna, —tau.

⁴⁹ Tama ni ayaak:

—¿Wagka minash egatjume? ¿Atumek dekat-sjumek mina Apag wakegamun takaakun pujumainaitag duka? —tau.

⁵⁰ Tujash ditak, wagkag tawa tusag dekagmainchau dekapedau.

⁵¹ Nunikag Jisusan jukiag Nazaret waketjajui, Jisus nui pujusá ashí dita tabaunak betek umiau. Tujash niina dukujig ashí Jisus nunikbaunak tuke kajimattsuk anentaimtú pujau. ⁵² Tuja Jisuschakam nuní senchi tsakau, dekatjinishkam nunisag, tuja Apajuishkam, aents aidaushkam shiig anentuidau.

3

Juan Yamijatin uwegshunum chichagkagtukbau

(Mt. 3.1-12; Mr. 1.1-8; Jn. 1.19-28)

¹ Roma apuji Tiberio quince mijadai ashí nugkanum inamu. Tuja Poncio Pilato inamu Judeanum, nuniai Herodes inamu Galileanum, untsu niina yachi Felipe inamu Iturea, nuigtú Traconitenum, untsu Lisantias Abilinianum inamu. ² Nuniamunum Anás, Caifás aatus sumo sacerdote aajakajui. Nunú batsatai Zacarias a uchijí Juan uwegshunum pujuttaman Apajuí ujakuí chichagkagtukti tusa. ³ Tima namak Jordagnum tikiju batsataidaunum ashí wekagas chichagkagtau, tudau takatan idayinak yamimag tsagkugnagtinme tusa. ⁴ Nunak Isaías Apajuí etsegtin agagbauwa nui, ju tibauwa nu tau asamtai nunikui:

“Makichik aents eemak taa uwegshunum wekagas senchi jiiká chichagkagtak:
Apu wekaesatnun jintan shiig iwajug, esegak tutupit dakueg,

⁵ ashí jint a japagau aidaunash nugkan aintug, nainnashkam yumpuag pakamak betekmak, jint a tunin aidaunash tutupit esegak, tutitag aidaunashkam shiig iwajug umiyajama numamtuk,
atumi anentaimish shiig iwajajum umiktajum,
Apu minitin asamtai.

⁶ Apajuí aents aidau uwentikatnun awematta nunak ashí aents wainkagtinaí”, tawai.

⁷ Kuashat aents aidau Juan yamijati tusag minituidau, nuniagtai chichajak: “¡Atumek

iwanchi uchijí asajum aents tsanú yujagme!
 ¿Wagka yamimagtasagmesh wakegagme?
 ¿Atumek ayatak yamimamuikis Apajuí suwimak
 sukagtumaina duka uwemtumainaitai tajumek?
⁸ Dekas tudau takatan idaisaush wajuku
 amainaita nunú iwainmamkatajum. Atumkek:
 Jutiik Abraham wegantu asaja yupichuch
 uweemain ainaji, tumamigpa. Dekas tajime:
 Apajuik jujú kaya aina junakeshkam Abragka
 uchijí emamainai. ⁹ Ashí ajak nejechu aidauk,
 jachai ajaka tsupija apetiama numamtuk,
 aents tudaunak taká batsatun, Apajuí suwimak
 susatnuk uminas awai.”

¹⁰ Tutai aents aidau iniinak:

—¿Tujash wajukmainaitji? —tuidau.

¹¹ Tiagtai ni ayaak:

—Jimag nugkumainji ajamuk atsugbaun
 susati, yumainji ajamushkam dutiksag dutikati,
 —tau.

¹² Apú kuichkiji atinun yajumin aidaushkam
 yamimagtasag kaunawag iniinak:

—¿Jintinkagtinuh, jutiish wajukmainaitji? —
 tuidau.

¹³ Tiagtai:

—Apunu kuichik atinun akikmainakui juwa-
 jum nunú, nuní inagkeasjum aents aidau akik-
 makta tigpajum, —tau.

¹⁴ Tutai Suntag aidaushkam dutiksag:

—¿Jutiish wajukmainaitji? —tuidau.

Tiagtai:

—Atumek aents uwakajum atanjum duka dutikawaigpa, tikitchakam wainkagmek tsanumjujaigpajum, atumí apujum akigmaina nujaig shiig aneasjum juwaktajum, —tau.

¹⁵ Tuja ashí aents aidauk, Apajuí awematnaitjai tibauwa nuna daká batsataidau asag: ¿Juagchawashit Kristu? tusag anentaimtuidau.

¹⁶ Tu anentaibiagtai aents aidaun Juan chichajak: “Wika ayatak yumí yamijatjai, tujash mina nagkaetasu senchigtin minittawai, wika niiya imanchau asan niina sapatjinakesh atitmaitsujai. Nunú yamigmagtatjume Wakaní Pegkejiya nujai, nuigtushkam nigki jiyai suwimkan sukagustinuk. ¹⁷ Nigki ashí aents aina nuwiyen akanjattawai, aents trigon ajakbau aidau juuká ijumag, awagti wampujin utsaak nejeen trigo ijumtainum yajumama numamtuk, Apajuí umigchaulak jii ajumaish kajinkashtina nui suwimkan suwak, niina umigkau aidaunak ni pujutaijin yajuaktinai.”

¹⁸ Juna aatus tusa nuigtush aents aidaun jintintu yamajam chicham pekeja nuna: “Dekas Kristu Apajuí Uchijiya duka tajutjamae”, tusa.

¹⁹ Tusa jintinkagtú wekagu asa Herodes Galileanmaya apua nuna igkua: “Yatsum Felipe nuwe Herodías jujukium auk pegkegchawai, tikitchakam pegkegchau takame”, tusa jiyakú.

²⁰ Tusá Juan tima, Herodes senchi kajeká nuni nagkaemas pegkegchaun takaak, Juangkan achiká aents achiká chimpitainum egkeauwai.

Jisus yamimagbau
(Mt. 3.13-17; Mr. 1.9-11)

21 Juan ashí aentsun yamiak pujai, Jisuschakam yamimajui, nunik Apajuí aujai nayaim ujaniuwai. 22 Nunikmatai Wakaní Pegkeji pauma nunin wajas paan wainainamunum niiní akagu, nuniai nayaimpinmaya chicham antuekau:

—Ametme mina uchig aneetaigmek, aminí shiig anejai, —tabau.

Jisukristu muunji aajakú aidau

(Mt. 1.1-17)

23 Jisusak treinta mijanji ajamu tumain ni takaamujinak nagkabauwai. Jisusnak José uchijiyai tuidau,

Josek Elí uchijí aajakuí, 24 Elik Matata uchijí, Matat Leví uchijí, Levik Melqui uchijí, Melquik Jana uchijí, Jana José uchijí,

25 José Matatiasa uchijí, Matatías Amosa uchijí, Amós Nahuma uchijí, Nahum Eslí uchijí,

Eslí Nagai uchijí, 26 Nagai Maata uchijí, Maat Matatiasa uchijí, Matatías Semei uchijí, Semei José uchijí, José Judá uchijí,

27 Judá Joana uchijí, Joana Resa uchijí, Resa Zorobabela uchijí, Zorobabel Salatiela uchijí,

Salatiel Neri uchijí, 28 Neri Melqui uchijí, Melqui Adi uchijí, Adi Cosama uchijí, Cosam Elmodama uchijí, Elmodam Era uchijí,

29 Er Josué uchijí, Josué Eliezera uchijí, Eliezer Jorima uchijí, Jorim Matata uchijí, Matat Leví uchijí, 30 Leví Simeogka uchijí, Simeón Judá uchijí, Judá José uchijí, José Jonagka uchijí, Jonán Eliaquima uchijí,

³¹ Eliaquim Melea uchijí, Melea Mainagka uchijí,
 Mainán Matata uchijí, Matat Natagka uchijí,
 Natán Davita uchijí, ³² David Isaí uchijí,
 Isaí Obeta uchijí, Obed Booza uchijí,
 Booz Salmogka uchijí, Salmón Naasogka uchijí,
³³ Naasón Aminadapa uchijí, Aminadab Arama uchijí,
 Aram Esroma uchijí; Esrom Faresa uchijí,
 Fares Judá uchijí, ³⁴ Judá Jacopa uchijí,
 Jacob Isaaka uchijí, Isaac Abrugka uchijí,
 Abraham Taré uchijí, Taré Nacora uchijí;
³⁵ Nacor Serugka uchijí, Serug Ragau uchijí,
 Ragau Pelegka uchijí, Peleg Hebera uchijí,
 Heber Sala uchijí, ³⁶ Sala Cainagka uchijí,
 Cainán Arfaxata uchijí, Arfaxad Sema uchijí,
 Sem Noé uchijí, Noé Lameka uchijí,
³⁷ Lamec Matusalegka uchijí, Matusalén Enoca uchijí,
 Enoc Jareta uchijí, Jaret Mahalaleela uchijí,
 Mahalaleel Cainagka uchijí,
³⁸ Cainán Enosa uchijí,
 Enós Seta uchijí, Set Adagka uchijí,
 Adagak Apajuí najanamu.

4

Iwanch Jisusan pegkegchau takamtiksata tibau

(Mt. 4.1-11; Mr. 1.12-13)

¹ Jisus Wakaní Pegkeji egkemtujam Jordagnumia jiinki wakettai, Wakaní Pegkeji

uwegshunum emauwai. ² Dutikam nui cuarenta tsawantai Jisus pujaun iwanch dekapsauwai. Imaan tsawan yutsuk inagkeau asa yapajuauwai.

³ Nunitai iwanch chichajak:

—Dekas ame Apajuí Uchijiyaitkumek, ju kaya nu pag emam yuwakia, —tau.

⁴ Tutai Jisus ayaak:

—Agagbau awai: ‘Aentsuk imá yujumkajaigkik pujumaitsui, Apajuí chichamega nujaiskam pujumainai’, —tiuwai.

⁵ Timatai iwanch nui inagkeaki Jisusan muja tsakajunum iwakuí. Dutika juú inaktamuik ashí nugkanum yaakat aina nuna, nuigtú ashí pegkeg aidaunashkam iwaintukui. ⁶ Dutika chichajak:

—Ashí ju imaja junak amina amastajame. Juka minai idaisamui, nuaduí wi wakegamun sumainaitjai. ⁷ Ame mina tikishmajam ememat-jakminig, ashí aminuk atí tusan idaitustajame, —tau.

⁸ Tama Jisus ayaak:

—¡Wetá iwanchih! agagbau awai: ‘Ame Apujum Apajuiya duke emematta, nuniakum imá nigki umigkata’, tawai —tiu.

⁹ Timatai nui inagkeaki yaakat Jerusalén ejegau, dutika jega Apajuí ememattainum yakí iwaká:

—Ame dekas Apajuí Uchijiyaitkumek juwi wajasmek tsekem iyaata, ¹⁰ wagki agagbau awai: ‘Apajuí ni aentsji nayaimpinmaya aidaun awetugmattawai kuitamjamkatnun,

¹¹ dutikamu asag uwegmin achigmakagtatui iyaakum kaya tukumkaim tusa’, —tau.

¹² Tutai Jisus ayaak:

—Agagbau awai: ‘Amina Apujum Apajuiya nu pegkegchaunum dekapasatasamek wakeyipa’, tawai —tiuwai.

¹³ Timatai iwanchik pegkegchau takamtiksata-tus anentaimtusbaunak ashí dekapes ukukiuwai, tikich tsawantinish dekapasatjai tusa.

Jisus Galileanum ni takaamuji nagkamamu
(Mt. 4.12-17; Mr. 1.14-15)

¹⁴ Nunik Jisusak Wakaní Pegkeji senchintikam Galilea wakitkiuwai, nunikmatai ashí nugkanum nui batsataidauk niina pachisag kuashat chichaidau. ¹⁵ Nui jegaa, jega ijuntainum wayaa jintinkagtutai ashí aents aidauk emematuidau.

Jisus Nazaret pujusbau
(Mt. 13.53-58; Mr. 6.1-6)

¹⁶ Jisus Nazaret ni pujusá tsakagbaunum wak-itki jegaa, tsawan ayamtai tsawagmatai jega ijuntainum wayau tuke nunin asa. Nunik wajainiu Apajuí chichamen ausatatus, ¹⁷ nunitai papiin Apajuí etsegtin Isaías agagbaun susaju. Dutikam dakuek diikmá ju agagbauwa juna wainak, auju:

¹⁸ “Wakaní Pegkejig minai awai nuniau asamtai mina etegtuae, ujunauch aidaun pegkeg chicham aidaun ujaktí tusa.

Apajuí minak awetine, achikbau aidaush agkan-magawagtatui tusam ujaktá tusa.

Wainmachu aidaushkam wainmitkakta dutikakum waitkatai aidaush ayamjukta,

¹⁹ tuja yamaik Apajuí aentsun wait anentawai tusam etsegkata” tibauwa nuna.

²⁰ Nuna aujus inagnak pempeag nui takaun susa ekeemsau. Nunikmatai ashí aents nui utsanawajuk, dii pekajaidau. ²¹ Nuniagtai:

—Wi augbau antukujum juka yamai uminkae, —tiuwai.

²² Ashí aents aidauk niina pachisag pegkejan etsegtuidau, ni wají pegkeg pachisa chichamu-nashkam puyatjusag diidau, nuninak:

—¿Jujú Josen uchijiya jama? —tuidau.

²³ Tiagtai ni chichaak:

—Dekaskenum jujú chicham: ‘Ampijatnuh, amek ampimata’ tibauwa ju tujuttatjume. ‘Nuigtushkam kuashat wají Capernaum ame dutikamu antinuweg nu, yamai amina nugkemia juwish dutikata’ tujuttatjume, —tau.

²⁴ Nuna ti nuigtú:

—Dekas tajime: Apajuí etsegtinuk ni nugkenig wakejusa antugmak achauwai. ²⁵ Junak dekas tajai: Apajuí etsegtin Elías pujujakua nunú tsawantinig, Israel nugkanum batsamajakajui kuashat nuwa waje aidau, nuniamunum ashí Israel nugkanum nujantai waitiamu tepeauwai, kumpatum mijan jimaituk yumi yutachu asam-tai. ²⁶ Tujash Apajuik atumní waje batsatun Elías yaigtí tusa awematsuk, Sareptanmaya nuwa waje judiuchu, yaakat Sidón tikiju awa nui pu-jaunum Eliasnak awemauwai. ²⁷ Nuigtushkam kuashat aents jata lepra tutain achimaku Israel aijakuí, Apajuí etsegtin Eliseo pujujakua nunú tsawantin, tujash makichkish nunú aidaunak etsagautsuk, judiuchu Naamán Siria nugkan-mayaya nuna etsagajui, —tiuwai.

²⁸ Tusa tutai jega ijuntainum utsaanawajuk senchi kajekaju. ²⁹ Nunikag wajatjag Jisusan achiká jukiag yaaktan ukumtikiag mujanum iwakaju, betsag tajaekaunum ajuami tusag. ³⁰ Dutikam dita mininamunmag eteenki, eteenki waketak ukukiuwai.

Aents wakan pegkegchau egkemtuumun Jisus etsagagbau

(Mr. 1.21-28)

³¹ Nunik Jisusak yaakat Capernaum Galilea nugkanum awa nui weuwai. Nui pujus tsawan ayamtai tsawautai jintinkagtau. ³² Nunitai puy-atjusag antujuidau ni jintiamunak, nigka aents chichame antugtai aidaun nagkaesau jintinkagtau asamtai.

³³ Nuniamunum aents wakan pegkegchau egkemtuumu jega ijuntainum wayaa eketu, shiig senchi untsamak:

³⁴ —¡Jisus Nazaretnumiyah ukujatkita! ¿Wagka amesh jutii pujamunmash miname, ijijatuatasamek minam? Wika ame yaitpa nunak dekagme, Apajuinu pegkegma nuuwaitme, — tiuwai.

³⁵ Tutai Jisus jiyaak:

—¡Itatkata, takamtak jiinkim wegakum aanú aentsuk ukuktá!

Tama wakan pegkegchaushkam aentsun nугká ajiaju tikich aidau emtin, nunik jiinkiu, dutikashkam aentsnak machikish pegkegchauk emachui. ³⁶ Nunikmatai wainkag ashí aents aidauk anentai jegagchaju, nunikag:

—¿Jusha wajuku asaya chichamesh senchigtinaita, wakan pegkegchau aidaunash chichamenig jiyaa jusha? —tuidau.

³⁷ Jisus dutikamua nunak ashí nugka tikiju aidaunum batsatuk antujajui.

Jisus Pedro tsatsají etsagagbau
(Mt. 8.14-15; Mr. 1.29-31)

³⁸ Jega ijuntainmaya Jisus jiinki Simón Pedro jeen jegauwai. Nunikmá wainkau Simón Pedro tsatsají senchi tsuweak tepettaman, nunitai:

—Wait aneam etsyagagta, —tusag segajui. ³⁹ Tiagtai Simón Pedro tsatsajin jegan-tun tsuntsumtua: “¡Tsuwemuwah ukuktá!”, tiu. Tamawaik pegkeg wajasuí, nunik yutain inajuk Jisusan, nuigtú nijai yujau aidaunashkam ajamsau.

Kuashat jau aidau etsagagbau
(Mt. 8.16-17; Mr. 1.32-34)

⁴⁰ Agkuantai kuashat aents jaidaun Jisusan ikautkajui, dutikawagmatai niishkam makí makichik achiká etsyagakui. ⁴¹ Tuja wakan pegkegchau aidau kuashat aentsun egkemtujuk senchi untsamak jijnainak:

—Amek Apajuí Uchijiyaitme —tuidau, Kristuk Apajuí awemamua nuna dekaidau asag, tujash Jisusak chichaktí tusag idaichau.

Jisus jega ijuntai aidaunum chichagkagtukbau
(Mr. 1.35-38)

⁴² Nunik tsawau tsawaig yaaktanmaya jinki, nugka agkantu aents atsamunum weuwai. Nunikmatai aents aidauk egai egainakua ni pu-jamunum jegawag:

—jUkujatkipa! —tusag segaidau. ⁴³ Tuinam:
 —Wika tikich yaakat aina nuwish yamajam
 chicham Apajuí aentsnum wajuk inamua nunak
 etsekkattajai, nuna nunikti tusa awemamuitjai,
 —tiuwai.

⁴⁴ Tau asa, Galileanum* jega ijuntai aidaun-
 mash wayaa jintinkagtau.

5

Kuashat namak achikbau (Mt. 4.18-22; Mr. 1.16-20)

¹ Tikich tsawantai Jisus kucha Genesaretnum
 uwet wekagai, kuashat aents Apajuí chichamen
 antukagtatus tuwakag chanuidau. ² Imaniagtai
 niimkamá, jimag bote anugkam tepettaman
 wainkau, namaká main aidaushkam botenmaya
 jinjag redjin nijainak batsamtuidaun. ³ Nunik
 Simogka botejin egkemag: Machik ejapeen inan-
 manta, tusa nui ekeemas aents tuwakun jintintu.

⁴ Nunik ashimak, Simogkan chichajak:

—Wiyankam ejapeen emam redjum ajugkam
 namak maata, —tiuwai.

⁵ Tama Simón ayaak:

—Jintinkagtinuh, kashi tuke ajú ajunkawa
 tsawampakuish makichkish maachmaji, tujash
 ame chichamjumin ajugtajai, —tusa ⁶ ajugkú.
 Dutikkamá shiig kuashat namakan achikú,
 imatikamu asa rednak ichiau. ⁷ Nunitai ditá
 kumpají tikich botenmayan iwiyauidau, taawag
 yainpaktinme tusag. Dutikam kautuawaju,

* **4:44** Tikich papí agagbaunmag “Judea” tuinai, tikich agag-
 bauwa nui “Galilea” tawa nuwiya jukimui, nunin asa mai
 pegkejai.

nunikag namaknak botenmag mai aimkaju, dutikam botek tepeattak wajau. ⁸ Imanitai Simón Pedro, Jisusan tikishmatug pujujus:

—Apuh, ukugkita minak, wika shiig tudauwaitjai, —tiu.

⁹ Namakan imatika kajegkaju asag, ditajai yujaidauk puyatkajui, ¹⁰ Simogjai ijunja namak mautaiji aidau Jacobo, Juan Zebedeo uchijí aina dushakam. Nunitai Jisus chichajak: —Simogkah ishamkaipa, namak maatasajum yujagjum anmamtuk, Apajuí chichame etsegkujum aents aidau minai ikautjin atajum tusan wi jintintuatjime, —tiu.

¹¹ Nunikag bote aidaunak anugkgag, ashí ukuinak Jisusjai wegajui.

*Jisus aents jata lepra achikbau etsagagbau
(Mt. 8.2-4; Mr. 1.40-45)*

¹² Tikich tsawantai Jisus makichik yaaktanum pujai, aents lepragtin tajuauwai, nunik Jisusan wainak tikishmag tsuntsumá, nijayin nugká antig pujusá:

—Apuh, wakegakmek etsaentumainaitme, —tau.

¹³ Tama Jisuschakam uwejen antiak:

—Wakegajai, yamaik tsagagta, —tiuwai.

Tusa tamawaik leprak megkaekauwai.

¹⁴ Dutika Jisus:

—Makichik aentskesh ujakaipa, tutupit sacerdote pujamunum jegaata, nuniakum ame tsagaja pegkeg webaujum iwainmamkum, Moisés tibauwa dutiksamek ejegata ditashkam: Dekaskeap tsagaje, tujabiagti, —tiu.

¹⁵ Tujash ni dutikamua duka senchi naatu, nuniau asamtai tuwajuidau ni chichamen antugkagtatus, nuigtú dita jaamujinash etsaentugt-inme tusag. ¹⁶ Tujash nigka kanaká nugka agkantunum wegau, nunik Apajuin auju.

Jisus aents wekaechau etsagagbau

(Mt. 9.1-8; Mr. 2.1-12)

¹⁷ Makichik tsawantai Jisus jintinkagtutai fariseo aidau, chicham umiktinun jintinkagtin aidaujai wayawag antuinak pekajaidau, Galilea nugkanmaya, Judea nugkanmaya, nuigtú yaakat Jerusalén batsamin aidau kaunkajushkam, nunik wainaidau Jisus Apajuí senchijin aents jau etsagamun. ¹⁸ Nuniamunum wajumak aents aidau, aents wekaechaun ainká tepetaijin pataidiag itawag: Wajuk jegá wayaik Jisus wajamunum ejentag, tuidau. ¹⁹ Tujash kuashat aents tuwakú asa waimainchau asamtai, jegá tuntupen wakag chigkaidiag, wekaechauwa nuna ainká tepetaijijai nenawag akakiaju, dutikawag Jisusa emtin aepsaju. ²⁰ Nunú aents aidau niiní kajinas anentaimaidaun wainu asa:

—Aishmagkuh, amina tudaujum aidauk tsagkugnaje, —tau.

²¹ Nuna tutai chicham umiktinun jintinkagtin aidau, fariseo aidaujai ditak anentaimsag: “¿Nish ya asaya Apajuinash pegkegchaunash chichajua? Imá Apajuikeajama tudaun tsagkugkagtu-mainuk”, tuidau.

²² Tu anentaimaidaun Jisus dekau asa:

—¿Wagka annush anentaimjume?

²³ ¿Tuwaita imá yupichuch tumainush,

tudaujum aidauk tsagkugnaje taja dukaih, atsa nantakim wetá tumainaitag dukaih?

²⁴ Tujash wi Apajuí Uchijiyaitkun Aentsmaga Akiinaw asan, ju nugka juwish tudau aidaunash tsagkugkagtumainaitag nu dekaatajum.

Tusa wekaechaun chichajak:

—Amina tajame, nantakim ainká tepetaijum jukim jeemin wakitkita, —tiuwai.

²⁵ Tusa tamawaik ditash ijunaig, nantakí ni ainká tepamujin juki Apajuin emematki jeen wakitkiuwai. ²⁶ Dutikamtai ashí aents aidauk puyatkag Apajuin emematuinak:

—¡Yamai dekas wainkaji Apajuí senchijiya duka! —tuidau.

Jisus Levin mina jintintaig atá tibau
(Mt. 9.9-13; Mr. 2.13-17)

²⁷ Nuna dutika ukuak jiinkiu, nunik wekamá Levin[☆] wainkauwai, kuichik apunu atinun akikmagtai yajumak ekeemtatman, nunik:

—Mina jintintaig atá, wemí, —tiuwai.

²⁸ Tama ni takataijinak ashí ukuak Jisusjai weuwai.

²⁹ Nunik nunú tsawantaik Jisusan eme anentus ajamsatatus niina jeen yutain shiig umikú, dutikamunum Leví kumpají, apú kuichkiji atinun yajumin aidaushkam, nuigtú tikich aidaujai mesanum pekajaidau. ³⁰ Nuniagtai chicham umiktinun jintinkagtin aidau fariseo aidaujai, Jisusa jintintaiji aidaun ashishmatuidau, nuniinak:

☆ 5:27 Diistá Marcos 2.14

—¿Wagka atumesh apú kuichkiji atinun yajumin, nuigtú aents pegkegchau aina ibaujai ijunjajum yuwakjumesh, umutash ditajaish umajume? —tuidau.

³¹ Tiagtai Jisus ayaak:

—Aents jamamtuchu aidauk ampijatnunak atsumtsame, aents jau aidau ampijatnunak atsumame. ³² Wika aents tudaugtuchu aidaunak minitchauwaitjai, wika aents tudaugtin aidau tudaujin idayinak mina nemagtuktinme tusan tauwaitjai, tiuwai.

*Ijagmaka pujusá Apajuí aujut iniimsamu
(Mt. 9.14-17; Mr. 2.18-22)*

³³ Jisus tutai dita aiinak:

—¿Wagka Juan Yamijatna nuna jintintai aidauk, fariseo aidaujai yujumkan ijagmainaish, amina jintintaijum aidauk yuwinak, umutnash umu wajaash yujainawa? —tuidau.

³⁴ Tutai ni ayaak:

—¿Nuwena nunú aents ipaamu aidaush, nu nuwenu ditajai pujaigkish, yujumkan ijagmak pekamainkaih? ³⁵ Tujash tsawan jegattawai nuwena nunú juwam atata nu, nunikmatai ipaamu aidaush wake besemag dekapenak yujumkanak ijagmakagtatui, —tiuwai.

*Jisus jintinkagtak yamajam jintinkagtamua
duka yaunchuk jintinkagtutai aina nujaig pachimaitisui tibau*

(Mt. 9.16-17; Mr. 2.21-22)

³⁶ Tusa junashkam augmatus:

—Makichkish nugkutai yamagman tsupikag nugkutai mamujunmag adujtuchu ainawai, dutikamak nugkutai yamagmaitak besemain asamtai, tuja yamajam tsupikbau mamujunum adujtamashkam shiig juwamaitsui. ³⁷ Tuja makichkish uva yumiji yamá ijugbaunak, vino yajatai duwap apagbau ajutnumag yajachu ainawai, dutikamak uva yumiji yamá ijugbau kajiak, duwap apagbaun ipatmainai, nunik vinuk ukagag duwap apagbaujai ajapnamainai. ³⁸ Duwi uva yumiji yamá ijugbauk duwap yamajam apagbaunum yajataiyai, dutikamu asa vino kajiak pushutakushkam ayatak egkenag wetai nunisag pegkejak amainai. ³⁹ Tuja umutai yaunchuk najanamun umin aidauk, yamagmanak wakegainatsui, ditak: ‘Yaunchuk najanamua nu imá pegkejai’ tuidau asag, —tiuwai.

6

Jisusa jintintaiji aidau tsawan ayamtai aig trigo juki yuwawagbau

(Mt. 12.1-8; Mr. 2.23-28)

¹ Tsawan ayamtai tsawaju ai, Jisus ajak ajakbaunum nagkaebau. Nuniamunum ni jintintaiji aidau trigo nejeen kupik jukiag uwejen pakajag yuwidau. ² Nuniagtai fariseo aidau ditan chichajuinak:

—¿Wagka atumesh tsawan ayamtai tsawagmataig takantsashti tibauwa nunin aish aikagme? —tuidau.

³ Tiagtai Jisus ditan ayaak:

—¿Atumek agagbauk ausachuk ainajum, David niijai yujaamujai yapajuinak, ⁴ jega Apajuí ememattainum wayaa, pag imá sacerdotek yuwati tibauwa nuna juki, niina kumpají aidaujui yuwawajua duka? —tau.

⁵ Nuna ti, nuigtú chichaak:

—Wi Apajuí Uchijiyaitkun Aentsmagan Aki-inau asan, tsawan ayamtai tsawagmataish wajukmainaita nunak wikitjai tumainnuk, —tiuwai.

Tsawan ayamtai tsawaju aig aents uweje chuwijun Jisus etsagagbau

(Mt. 12.9-14; Mr. 3.1-6)

⁶ Atakeshkam tsawan ayamtai tsawagmatai, Jisus jega ijuntainum wayaa jintinkagtau. Nuni- amunum aents uweje untsujiya nu chuwijú nui pujau. ⁷ Nunitai chicham umiktinun jintinkagtin aidau, fariseo aidaujui Jisusan diidau, tsawan ayamtai aig etsagaun wainkag tsanumjugtasag. ⁸ Tujash nigka dita anentaibaujinak dekau asa, aents uweje chuwijun chichajak:

—Wajakim ejapeen wajantá.

Tama niishkam wajakí ejapeen wajantú.

⁹ Nunikmatai Jisus chichaak:

—Iniastajime: ¿Tsawan ayamtai aish pegkeja duká takamainait, atsa pegkegchauk dutik- mainait? ¿Tsawan ayamtai tsawaje tusaik, aentsuk etsagautsuk jakati tusa idaimainait? — tau.

¹⁰ Nuna ti ashí aents nui ijunun diisá, nuna aentsun chichajak:

—Uwejum dakuekta, —tiuwai.

Tama dakueku, nunik uwejenig pegkeg wasasú. ¹¹ Dutikamtai senchi kajekag: Jisusash itugmainkita tusag ditá ditak chichaidau.

Jisus chicham etsegtugkatajum tusa ishiaktinji doce etegjamu aidau

(Mt. 10.1-4; Mr. 3.13-19)

¹² Tikich tsawantai Jisus Apajuin ausatatus mujanum weu, nunik nui kashi pujus Apajuí au aukawa tsawampajui. ¹³ Nunik tsawaag ni jintintaiji aina nuwiyán doce etegkeg ijum-jauwai, nunú aina nunak: “Mina chichameg etsegtujin atajum”, tiuwai. ¹⁴ Duka jujú ainawai: Simón, Pedro atí tibauwa nu, Andrés Simogka yachi, nuigtú Jacobo, Juan, Felipe, Bartolomé, ¹⁵ Mateo, Tomás, Jacobo Alfeo uchijí, nuigtú Simón niina nugken agkanmitkatatus kuashat aents aidaujai chichaajakua nu. ¹⁶ Judas Jacobo yachi, tikich Judas Iscariote Jisusan unupiagujukua nu aatus.

Jisus kuashat aents jintintuamu

(Mt. 4.23-25)

¹⁷ Nunik ditajai ijunag akaiki, pakanum wanjantú ni jintintaiji aidaujai. Nunikmatai kuashat aents tuwagkaju ashí Judeanmaya, Jerusalegnumia, Tiro nayants awa nuwiya, Sidognumia aidau, ni jintinkagtamujin antukagtatus, nuigtushkam dita jaamujinash etsaentugti tusag, ¹⁸ nuniagtai wakan pegkegchau egkemtugbau aidauunash etsagakui. ¹⁹ Ashí aents aidauk Jisusan antigtatus kakanmamaidau, niiniya senchi jiinak ashí aents jau aidauunak etsagau asantai.

Shiig aneasjum pujustajum tibau
(Mt. 5.1-12)

²⁰ Jisus ni jintintaiji aidaun diisá chichajak: “Atum iik nagkamik iina senchijinig pegkeg pujuta duka jumaitsuapi tautigmek shiig aneasjum pujustajum, Apajuí atumiin inamjatin asamtai”, tau.

²¹ “Atum yamai Apajuinu pegkeg takastasa wakegakjum, yapajaku waitmaina imanikjum waitiautigmek shiig aneasjum pujustajum, atumnak Apajuí kuashat amastin asamtai. Atum yamai wake besemag batsatkujum buutú pujautigmesh shiig aneasjum pujustajum, atumek shiig aneakjum dushigtin asajum.

²² “Wi Apajuí Uchijiyaitkun Aentsmagan Akiinauwaitag nunú nemagtuidau asagmin, aentsaidau kajegtamainak yajá pujusta tusa jipainak, pegkegchau chichagtamainak, daagmin adaisajash pegkegchau tujamainakuish shiig aneastin atajum.

²³ Nuna imatjutpainakuish shiig aneasjum dakujustajum, atum nayaimpinum jukitna duka waji shiig pegkeg kuashat ajutjamaidau asamtai. Atumi muunjum aajakajua dushakam, yaunchuk Apajuí etsegtin batsamajakajua nunashkam aatus waitkasaju ainawai.

Shiig aneas pujuschagtinaí tibau
(Mt. 23.13-36)

²⁴ “¡Tujash atum wiyakuch aidautigminak wait anentajime! Atumek shiig aneasjum pujajume ashí ajutjamaidau asamtai, tujash atak waittsatin ainagme.

25 “¡Atum atsumkas yuwá batsatutigminak wait anentajime! Atak yapajakjum waittsatin asagmin.

“¡Atum yamai uyumat aneakas ayatak dushit batsamtautigminak wait anentajime! Atumek waitiakjum buuttin asagmin.

26 “¡Atum ashí aents pegkegnum chichajam aidautigminak wait anentajime! atumi muunjum aajakajua dusha imatikas chichajujakajui waitá etsejin aidaun.

Shiwajum aidau aneetajum tibau

(Mt. 5.38-48; 7.1-2, 12)

27 “Atum mina chichameg antugtautigmin tajime: Atumi shiwajum aidaush aneetajum, kajegtamaidaushkam pegkegnum yaigtajum; 28 pegkegchau chichagtamaidaush pegkegnum chichagkatajum, wainak tsanumjutpainakuish Apajuí aujtustajum. 29

Yapinum awatamkujaish, juinia yapijuish awatita tusajum ayampatuatajum; pataká awantak nugkuagbaugmin jujutjamkujaish, tikitchakam susata. 30

Atsumamun segapainakuig sujittsuk susata; tuja atumin wajiigmin segapatsuk jujutjamkuishkam, awagtugkita tutsuk idaisatajum. 31 Atum tikich aidau shiig awajtuktinme tusajum wakejin ainajum nunisjumek tikichish shiig awajkatajum.

32 “Atumin anempa duke atumshakam aneakjumesh, ¿wají imana juwagme? Aents tudaugtin aidaushkam dita aneniamujaig aneninawai. 33 Atumin pegkegnum yaimpaina duke yayakjumesh ¿wají imana juwagme?

Aents tudaugtin aidaush dita yainiamujaig yainin ainawai. ³⁴ Atumí kumpajum kuichkin waamak awagtugmamaina duke tsagkatkugmesh ¿wají imana juwagme? Aents tudaugtin aidaushkam kumpajin tsagkatkag awagtugkitpash tusag dakainawai. ³⁵ Atumí shiwajum aidaush aneetajum, nuniakjum pegkegnum yaimkatajum, tuja tsagkatkagtukmesh betekash awagtugkit tusagmek anentaímtú pujuigpa. Atum jukitnuk nayaimpinum kuashat wají shiig pegkeg aidau ajutjamiagtinai, aaja dutikakjum Apajuí uchijí atinaitjume. Nigka aents pegkegchau, niina see tuchau aidaunash wait anentin asamtai, ³⁶ wait anenkagtin atajum, atumin Apa nayaimpinum pujuwa nu wait anenkagtina ibau asamtai.

*Tikichi pujutji pachisjumek augmatigpa tibau
(Mt. 7.1-6)*

³⁷ “Tikichi pujutjig augmatú yujaigpajum, Apajuí atumnash aikasag tujaminum. Tikich suwimak susatasagmesh chicham umijú yujaigpajum, Apajuí atumnash tikich itujajum dutiksag dutijamawainum. Dekas tsagkujatajum, Apajuí atumnash tsagkugtamtatnume. ³⁸ Tikich atsumaushkam susatajum, atum tikich wajuk suwajume, dutiksag Apajuishkam atum atsumamunak amastatjume.

*Tikich augmatigpa tibau
(Mt. 7.3-6, 15-23; 12.34-35)*

³⁹ “Jisus junashkam augmatak tau: ¿Wainmachush tikich wainmachunash jintanash inaktumainkaih? ¿Mai waanum iyaumainchauhkaih?

⁴⁰ Jintinbauwa duka jintinkagtinun nagkaesauk dekatsui. Untsu papí augbaujin ashimak, jintinkagtinjai betek wemainai.

⁴¹ “¿Wagka yatsum imanchau takaish, atum imá pegkegchau takaayatkugmesh, auk pegkegchaun takaawai tusagmesh augmatú yujagme? Nu nuniakjumek aents niina jiin tsetse muun egketun waintsuk, tikichi jiin tsetse piipich egketun wainmaina numamtuk wajagme. ⁴² ¿Itugsagmek atum imá pegkegchau takaajum nu wainmamchautigmesh: Yatsujuh, pegkegchau takaam duka idaisata titagme? ¡Aentsú tsanú aidauwah! Dekas dekatkauk ame imá pegkegchau takaam nuuwá idaisam, duwi yatsum imanchau takaidaushkam, idaisata titajum.

Numik niina nejenig dekamainai waji numiita duka

⁴³ “Ajak pegkeja duka pegkegchaunak nejemaitsui, ajak pegkegchaushkam pegkegnak nejemaitsui. ⁴⁴ Ashí ajak aina duka niina nejeen dekanui, untukjak munchiinak nejetsame, aantsag uvashkam jagkinmayag juushtayame. ⁴⁵ Aents pegkejak pegkegnumag anentaimu asa, chichaakush pegkegnak chichauwai. Nunisag aents pegkegchaushkam pegkegchaunak anentaimu asa, pegkegchaunak chichawai. Aentsuk ni wajukuna anentaimua, nunak chichaak iwainawai.

*Jega jegabaun pachis Jisus augmattsamu
(Mt. 7.24-29)*

⁴⁶ “¿Wagka mina chichameg umigtachi-atkugmesh: ‘Apujuh, Apujuh’ tujutjume? ⁴⁷ Ashí aents mina nemagtuidau, mina chichamjun antugtukag imatiksag umigtuidaush wajukuita nuna titajai. ⁴⁸ Duka aents jegá jegamkatatus initak tai, kaya muunnum dekanmitkak ajia shiig jegamkamun, namak piyujak senchi tukuakush, makichkish umuchkachua numamtinai. ⁴⁹ Tujash mina chichamjun antayatak umigtachuk, aents jegá jegamak, nugka suugnum kaya atsamunum initak ajitsuk jegamkamun, namak dujajua piyujak senchi tukú tegak ajapama numamtinai.”

7

Capernaumnumia capitani inake etsagagbau (Mt. 8.5-13; Jn. 4.43-54)

¹ Jisus jintinkagtamujin ashimak Capernaum weuwai. ² Nui capitani inake dekas aneetaiji jakattak tepau. ³ Nuniau asamtai capitán Jisus pachisa chichaamun antuk, judío apuji aidaun wajumak awetiuwai: Wait aneas taa mina inakeg jaa juna etsaentujati, tusa. ⁴ Tima Jisusan jegajiag ujakaju, nuninak:

—Au capitani dekas wait aneasam yaimainaitme. ⁵ Nigka judío aidautinash anejatnuwe, nuniau asa jega ijuntainash jegamjutpakmayi.

⁶ Tiagtai Jisuschakam ditajai weu. Nunikag jegá tikiju wajasá weenai, capitán[☆] niina

☆ 7:6 Diistá Mateo 8.8

kumpají aidaun awetiu, dutikak: “Apu kajeg-tukaigka, wika niiya ibaunak mina jegajuig awaimaitsujai, ⁷ nuniau asan wi niina egamain-nash egakchamjai, ayatak tsagagti tujutti tamak mina inakjush tsagagtatui. ⁸ Wi apu umigbau ajutui, aantsag suntag mina umigtuidau ajutu-inawai, nunú aidaun wi: Jiinjajum shiyaktajum, tamak jiinag shimumainai, tuja: Waketjatajum, tamashkam waketug kaunmainai, nunisag mina inakeg aidaushkam: Ju dutikata, tamak betek umigtuinawai. Aantsag Jisus anuí pujusag, tsagagti tamak mina inakjush tsagaumainai tujamae”, tuidau. ⁹ Tuinam Jisus antuk anentai jegagchau, nunik nui aents minidaun ayam-pattsag:

—Israel aina nuigkish imatikas minai kajinas anentaimunak wainchaujai, —tau.

¹⁰ Nunú awemamu waketug jegá kaunkamá inak jaa tepau ukukbauk, tsagag pegkeg pujaun wainkaju.

Nuwa waje uchiji jakau Jisus inankimu

¹¹ Nuna nunik Jisus yaakat Naín tutainum wegau. Nunitai ni jintintai aidau nuigtú kuashat aents aidau saetukaju. ¹² Nunik yaakta waitijin tikiju wajas wegai, nuwa waje uchiji makichk-iuch ajamu jakamtai ukustatus emaidau, nunitai nuwan uyunainak kuashat aents weedau. ¹³ Nunittaman Jisus wainak wait anenjau, nunik nuwan chichajak:

—Buutipa, —tiu.

14 Tusa ukuak jakau egkea yanasá wegamun antigku. Dutikantai yanasá weedaush wajantaju, nunikmatai chichajak:

—Datsauchih nantaktá, —tiu.

15 Tusá tamawaik jakaushkam nantakí chichau, nunikmatai dukujin susauwai.

16 Dutikantai ashí aents aidauk ishambag Apajuin emematuinak:

—Apajuí etsegtin dekas senchigtin jutiinish ajutjamji, Apajuí ni aentsji aidautin yaimpakta-tus awetugmaji, —tuidau.

17 Nu dutikamuk ashí Judeanmag antuejau, nui tikiju aneem batsatu aidaunmashkam.

Juan Yamijatín ni jintintaiji aidaun chicham dekaatajum tusa ishiakbau

(Mt. 11.2-6)

18 Jisus dutikamun Juagká jintintaiji aidau antukag, Juagnashkam ujakaju. Dutika ujaam ni jintintaijin jimajan untsuká, 19 Jisus pujamunum awebau iniastinme: “¿Amekaitam Apajuí uwemtikagtinun awematnaitjai tibauwa nunú? ¿Amechuitkuminig tikichnak dakastatag?” tusa. 20 Tusá awemajam Jisusan kautu-awag:

—Juan Yamijatna nu amina iniasti tusa awetamaji, nuniak: ¿Amekaitam Apajuí uwemtikagtinun awematnaitjai tibauwa nunú, amechuitkuminig tikichik dakastatag? timae, —tuidau.

21 Nuna tuinaig aents jau aidaun, tikich jatai waituidaunash, wakan pegkegchau egkemtuamu aidaun, nuigtú wainmachu aidaunashkam et-sagaku. 22 Dutika Jisus ditan ayaak:

—Wetajum, nunikjum atum wainkaujum ju, nuigtú antukujum dushakam Juan ujaktajum: Wainmachush wainmainawai, shutushkam wek-againawai, lepragtin aidaush tsagainawai, empekush antuinawai, jakaush nantainawai, tuja ujunauch aidaunash yamajam chichaman jintin-mae tusajum. ²³ Nuaduí wi takaamujua nuna wainainak dekaskeapi tujutuidauk, shiig aneasagtinai timae tusam ujaktá, —tiu.

*Juan pachisa Jisus etsegkamu
(Mt. 11.7-15)*

²⁴ Juan awemamu aidau waketjamtai, Jisus Juagkan pachis aents aidaun iniak: “¿Wají wainkatasagmae uwegshunmash wegabiugme? ¿Tagkanan dase umpuau wainkatasagmek wegabiujum? ²⁵ Nuniachkugmesh ¿wají wainkatasagmae wegabiugme? ¿Aents shiig iwajamun nugkujá pujau wainkatasagmek wegabiujum? Atumek dekagme, nugkutai iman iwajamun nugkujá iwagmamaidauk apú jeen pujuinawai. ²⁶ Tujash ¿wají wainkatasagmae wegabiugme? ¿Apajuí etsegtinuk wainkatasajum wegabiujum? Dekas tajime: Duka Apajuí etsegtin aajakajua nuna nagkaesawai. ²⁷ Apajuí etsegtin niina pachis agajua duka juuwai:

‘Wi mina chichamjun etsegnun amina emtimin awemajai, ni jintanak umigtamkattawai’, tawai.

²⁸ Dekas tajime: Ju nugka juwi akiinaidauk Juan Yamijatna nuna nagkaesauk atsawai, tujash

Apajuí inamtainig aents dekas imanchauchia nuuwai Juangkan nagkaesauk.

²⁹ “Nunú tabaun antukag ashí aents aidau, nuigtú apunu atinun kuichki yajumin aidaushkam, Apajuí nuniktajum tibaun umiinak yamimakajui Juan yamijatbaunum. ³⁰ Tujash fariseo aidauk, chicham umiktinun jintinkagtin aidaujai dakitjaju Apajuí umiktajum tibauwa nu umitnak, nunidau asag Juan yamijatbaunash pachikchajui.”

*Juangkan dekaskeapi tichaju aidau
(Mt. 11.16-19)*

³¹ Nuniagtai Jisus chichajak: “¿Wajina pachisan takunua antumtikmainaitjime?
³² Atumek uchi aidau kuashat aents ayamunum pekaamsag wasugkamainak: Wi nantsematnume tusan flauta tutaya nuna umpuakuish nantsemachmaugme, wake besemjan kantamtai buuttinme tamash, buutchamugme tusa pempeentuniki untsuniyama numamtuk wajagme. ³³ Juan Yamijatna nunú yutai aidaunash yuwachu, vinunash umachu asantai chichagkujum: Wakan pegkegchau egkemtuamu asa aniawai, tajume. ³⁴ Tuja wi Apajuí Uchijiyaitkun Aentsmagan Akiinaun yutainash yuwakun, umutain umaish: Ju aentsua juka ayatak wekagas yu wekaewai, umutnash umú wekaewai, nuniau asa apú kuichkiji atinun yajumin tudaugtin aina nuna kumpajiyai, tujutjume. ³⁵ Tujash Apajuí umijuidau wajuk

pujuinawa nuna wainainak, Apajuí yachajiya nunak dekamain ainawai.”

Makichik fariseo Simón daagtin Jisusan ipaamu

³⁶ Makichik Fariseo Jisusan mina jegajuí yujumak yuwami tusa ipauwai. Tima nuna jeen wayaa mesanum jegan ekeemsauwai. ³⁷ Nuniai nuwa nu yaaktanmaya pujutji pegkegchau ajamu, Jisus fariseo jeen yujumkan yuwata-tus we tabaun dekaa, kaya alabastro tutai botella najanamunum kugkuin shiig pegkejan juki tajantau. ³⁸ Nunik Jisusa naween ayau-mas pujus buutak nawen negaikiajui, dutika intashinig ujugtau, nuniak nawen kugkuntak kugkuinui ukatkauwai. ³⁹ Dutiktai fariseo Jisusan ipauwa nunú nigki anentaimas: “Jujú Apajuí etsegtinaitkug dekamainapi ju nuwa pujutji pegkegchau niina antia nuna”, tau.

⁴⁰ Nunitai Jisus chichaak:

—Simón, iniastajame.

Tutai:

—Jintinkagtinú tujutta, —tau.

⁴¹ Tutai Jisus ayaak:

—Aents kuichkin tsagkatkagtinun jimag aents diwimaidau, nuniamunum makichkia nu quinientos tsawantai takasá akikmamainun kuichkin diwimai, tikichia nu cincuenta tsawan takasá akikmamainun diwimu. ⁴² Nunidaun akikmamainji atsujiagtai mai tsagkujauwai. Yamai tujutta: ¿Ju jimaja juwiyash tu imá senchish aneemainaita? —tau.

⁴³ Tama Simón ayaak:

—Diwijí imá muun ajamu tsagkujamua nu imá senchi nunak aneemainai tajai. Tutai: Duka dekas tame, —tiu.

⁴⁴ Tusa nuwan diis Simogkan chichajak:

—¿Ju nuwa wainmek? Wi jeemin wayamtaish daweg nijamainkesh yumik sujuschamume; tujash jujú dawejun negaikiag ni intashinig ujgtujae. ⁴⁵ Kumpamjakmekesh minak kugkuntsachmaume; tujash ju nuwa juka wayamag duwi nagkamas dawegnak kugkunjú pujawai. ⁴⁶ Buukeajuish asaitaikish nijatkashmaume; tujash jujú kugkuinui dawejun nijatjuje. ⁴⁷ Nunin asamtai tajame; ni tudauji shiig kuashta duka ashí tsagkugnaje, dutikamu asa imá senchi anentui, tujash aents tudauji ujumak ajamu tsagkujamuk ujumak anentui.

⁴⁸ Nuna ti nuwan chichajak:

—Tudaujum aidauk tsagkugnaje, —tiu.

⁴⁹ Tuja mesanum niijai pekajaidauk ditak pentunisag chichainak:

—¿Jusha ya asaya tudaunash tsagkugkagtawa? —tudayinau.

⁵⁰ Tuinaig nigka nuwan chichajak:

—Ame kajintsá anentaibaunum uwemjaume, shiig aneam wetá, —tiuwai.

8

Nuwa aidau Jisusan yaigbau

¹ Nuna nunik Jisusak kuashat yaakat aidaunum, nuigtú yaakta ukukiag aents batsataidaunmash wekagas, yamajam chichaman Apajuí nuni inapaji tusa

chichagkagtau, nunitai chicham etsegkata tusa ishiaktinji doce etegjamu aidau uyunaidau. ² Nunisag nuwa wakan pegkegchau aidau egkemtumu, nuigtú jau aidau etsagagbau aidaushkam uyunaidau. Nuanuí pachitkau María Magdalanmaya, siete wakan pegkegchau egkemtumu jijamua nunú, ³ tikich Juana, Chuza Herodesa kuichkijin kuitamnun nuwe, nuigtú Susana, tikich nuwa aidaujai kuichkin ijumag sumakag, Jisusan ni etegjamuji aina nujai atsumiagtaish yaidau.

*Ajakan ajakbau pachisa Jisus augmattsamu
(Mt. 13.1-9; Mr. 4.1-9)*

⁴ Kuashat aents yaaktanmaya aidau Jisusan wainkatasag wegaju, nunikag shiig kuashat tuwakagmatai augmatak tau: ⁵ “Ajakan ajakbau ajajin ajaka jigkayin nagkimak ukutatus weuwai, dutika ajakmau asa. Nunik ajajin jegaa nagkimkau, dutikam wajumak jigkai jintaa kakekauwai, nunikun aents najakag ukukbaun yakiya pishak kaketuk amukajui. ⁶ Tikich jigkai kayá awanken nugka machik aunum kakekauwai, nunik tsapainiuwaitak jakauwai chupitnuchu asamtai. ⁷ Tikich jigkai kakekajui jagki ayaunum, dushakam tsapaidiajuitak jagki yutuam jinauwai. ⁸ Tuja tikich jigkai nugka dekas pegkegnum kakekauwai, nunikajuk tsapaidiag muun wajas makí makichik ajak aidau cien jigkain nejeawajui.”

Nuna ti inagnak senchi jiiká chichaak: “Dita antutaiji ajamuk antuktinme”, tiuwai.

⁹ Nuna augmatus ashimkamtai niina jintintai aidau Jisusan:

—¿Apuh waji takumea ajakan ajakbau pachismesh timaume? —tusag iniidau.

¹⁰ Tama Jisus ayaak:

—Atumnak Apajuí ni aentsnum inamjatnuji dekajakchamun, Apajuí aentsnum inama nuna pachisan wi yamai etsejag nunash shiig dekamti-jamatatus wakejutpagme. Tujash tikich aidau-nak ayatak augmatbaun pachisan ujaajai, dutikamu asag ditak wainkujash wainmachu wajakmaina nuninawai, antakush antuchu wajakmaina nuninawai, —tiuwai.

Ajakan ajakbau timag nunak juna takun timajai tusa Jisus etsejkamu

(Mt. 13.18-23; Mr. 4.13-20)

¹¹ “Wi ajakan ajakbaun augmattsan timag nunak juna takun timajai: Jigkaiya duka Apajuí chichamega nuuwai. ¹² Jintá jigkai kakekaun pishak amukuí timag nunak, aents Apajuí chichamen antittaman iwanch juwatki, chicham ni anentain wayaun dekaskeapi tunak, uwemjainum tusa yajuta nuna takun timajai. ¹³ Tikich jigkai kayá awanken nugka machik aunum kakekauwai timag duka, aents chichaman antuk dekaskeapi tusa wakegas nemajuidau, utugchatnum jegaak idayina nuna takun timajai. ¹⁴ Tuja tikich jigkai jagki ayaunum iyaaju timag duka, aents Apajuí chichamen antuinayatak, ju nugkanum wiyakchameauta nuna uyumainak, nuigtú niina shiig awagma nunak

puyatjuinak, Apajuí chichamen pachitsuk idayinawai, nunin aidauk ajak nejechua nunin aina nuna takun timajai. ¹⁵ Tujash jigkai nugka pegkegnum iyaaju timag nunak, aents Apajuí chichamen antukag dekaskeapi tusag nemagkag, wakejus chichaman umiina nuna takun timajai. Nunin asag ajak shiig senchi nejekajua nunin ainawai.

Lámpara pachisa augmattsamu
(Mr. 4.21-25)

¹⁶ “Makichik aentskesh lámpara ekemakajag dukukag idaichau ainawai, dutikachkush pegaká wakentinkish awayag apujchau ainawai. Dutik-tsuk ekemakajag yakí ekenin ainawai, wayata-tus minidaush tsaaptinun wainkatnume tusag. ¹⁷ Numamtuk yamai uukbauwa nunik awa juka, atak paan wantinkatnai. Aantsag yamai deka-mainchauwa dushakam atak shiig dekamun atinai.

¹⁸ “Juna tajim jujú anentaimtustajum, ‘ni imá kuashat ajá duka nuní dukap uwaetuka suwam atinai, untsu piipich ajá duka atantam atinai.’”

Jisusa dukují ni yachi aidaujai kautuamu
(Mt. 12.46-50; Mr. 3.31-35)

¹⁹ Tusa jintinkagtai ni dukují, yachi aidaujai tajuawajui. Tujash Jisus wajamunmag jega-mainchau kuashat aents tuwakaju asamtai, agaa ijunaidau. ²⁰ Nunitai niina ujainak:

—Amina duku yatsum aidaujai waipaktatus tajutjamawag agaa ijunui, —tuidau.

²¹ Tama ni ayaak:

—Apajuí chichamen antukag umiina, nunú ainawai mina dukug, mina yatsug aidauk, — tiuwai.

Jisus dase imijkamu

(Mt. 8.23-27; Mr. 4.35-41)

²² Tikich tsawantai Jisus ni jintintaiji aidaujai botenum chimpimjaju. Nunik: Kuchá amain katigkagmi, tusag weedau. ²³ Nunikag wegamunum nigka kanaju. Nuniku ai dase shiig senchi dasentak kuchan umpuau, dutikam yumik botenum yajanu, imaniau asa ishamain wajau. ²⁴ Imanitai niina jegantag ishintainak:

—¡Jintinkagtinuh, Jintinkagtinuh iik jakektatji! —tuidau.

Tama shintaag dasen jiyak idayak, nayants tsukatunashkam:

—¡Mijakta! —tiuwai.

Tusá tamawaik dase imaniauk mijak, namakash shiig miyaasu wajas patamsau.

²⁵ Nunikmatai ni jintintaiji aidaun chichajak:

—¿Wagka Apajuiyai kajintsajum anentaimtsugme? —tau.

Tujash ditak ishamak puyatkag nuna wainak anentai jegagchaju, nunikag ditak pempeentunikiag:

—¿Jusha ya asamtaiya dasesh, yumish antu-juinawa? —tuesdayinau.

Gadaranmaya aents wakan pegkegchau egkemtuamu

(Mt. 8.28-34; Mr. 5.1-20)

²⁶ Nunikag kuchá amain katigkag Gadaranmaya batsantai nugkeen Galilea igkuas awa

nuwi anumkajui. ²⁷ Nunik Jisus jiinkimtai nunú yaaktanmaya aents, kuashat mijadai wakan pegkegchau egkemtujam pujú tajuauwai, duka shiig wisú jegaash pujuchu, ayatak aents ukutainum wekayin. ²⁸ Nunú Jisusan wainak senchi untsamak tikishmatug senchi untsamak:

—¡Jisusah, Apajuí nayaimpinum pujuwa nuna Uchijiyah, minash itugtuktasamea miname! ¡Wait aneasam suwimkak sukagtusaipa! —tau.

²⁹ (Nunak Jisus: Wakan pegkegchauwah aents jiinkim ukuktá tibau asa tiuwai. Nu aentsuk kuashat tsawantai wakan pegkegchau egkemtuanu asa, jiju ikagmauwai uwegnumash, dawenum jigkagmashkam tsujiag utsag, wakan pegkegchau aents atsamunum emam nuwi pujú.) ³⁰ Tutai Jisus iniak:

—¿Amesh yaitpa?

Tama ni aimak:

—Wika Untsujiyaitjai, —tau.

Nunak kuashat wakan pegkegchau aidau aentsun chimpintua batsamtau asag tiuwai. ³¹ Imaan asag: “Waa muun ishamain akaga nuwig chimpijatuawaipa”, tusag segaidau. ³² Nuanuí kuashat kuchi mujanum yuwinak yujaidau asamtai, nuwi wayatjai tusag segajui. Tiagtai Jisuschakam: Nuniktajum, tiuwai. ³³ Tima wakan pegkegchau aidauk aentsnak ukuinak kuchinum utsanawajui; dutikam kuchishkam pisajag betsag tajagak kuchanum najataunum iyagkag jinawajui.

³⁴ Nunikagmatai kuchí kuitamin aidauk pisa-jag yaaktanum jegawag etsejuinak, ajanum bat-sataidaunash dutiksag ujakajui. ³⁵ Tusá ujaka-jam: Wagkag ankae diisagmi, tusag wejiajui. Nunik Jisus pujamunum jegakmag, aents wakan pegkegchau egkemtuamu aajakua duka pegkeg wajas, shiig anentaimas Jisusai ayaumas nugkurai nugkujá ekeematman wainkaju. Nunittaman wainkag senchi ishamkaju. ³⁶ Nuniagtai wakan pegkegchau aidau jiigbaun wainkaju aidau: “Nuní dutika etsagagmae”, tusag tikich aidounashkam ujaidau. ³⁷ Tiagtai ashí aents Gadaranmaya aidauk Jisusan:

—Juwig pujutsuk yajá weta, —tiaju senchi ishamaidau asag. Tama Jisuschakam ayú tusa botenum egkemtai, ³⁸ aents wakan pegkegchau egkemtuamu jijamushkam:

—Wisha amijai wekaesatjai, —tusa Jisusan segau. Tama nuna chichajak:

³⁹ —Amek jeemin wakitkita, nunikam shiig kuashat Apajuí wajuk amina wait anenjamjae nunú etsegkata, —tiuwai.

Tima we Jisus niina kuashat wait anenja nuna pachis ashí yaaktanum etsegkau.

*Jairo nawanji tikich nuwa jaujai etsagagbau
(Mt. 9.18-26; Mr. 5.21-43)*

⁴⁰ Jisus wakitki jegamtai kuashat aents tuwakajuk shiig aneas jukiaju, ashí aentsuk niina dakaidau asag. ⁴¹ Nuniamunum Jairo daagtin, jega ijuntaiya nuna apuji tajuntun Jisusan tikishmatug:

—Jintinkagtinuh, mina jegajuí wemí,
⁴² nunikam nawantug doce mijanji ajamu shiig
 makichkiuch pujugta nunú, jakattak tepaun
 ukukmag nu etsaentujata, —tau.

Tama wetai shiig kuashat aents weedau asag
 Jisusan chanuidau. ⁴³ Imaniamunum nui nuwa
 pachitkau doce mijadai numpan senchi puwak
 jaa pujú, kuashat ampijatin aidaunum ampi-
 mak kuichkijin ashimkau. Tujash imaniakush
 tsagagchauwai. ⁴⁴ Nunú nuwa ukunum jegan-
 tun Jisus jaanch pataká nugkuagbauji wenin
 antigkui. Dutikamuik numpa puwamujinak
 megkaekauwai.

⁴⁵ Dutikam Jisuschakam:

—¿Ya antinkae? —tau.

Tutai aents nui ijunuk:

—Achah yatsukait, —tuidau.

Tiagtai Pedro chichajak:

—Jintinkagtinuh, kuashat aents tuwakaju asag
 chanumpaina nuniaigkik, ¿ya antinkae tame? —
 tiu.

⁴⁶ Tutai:

—Dekas wika dekajai, aents mina antintuk
 mina senchijuí jaamujin tsagaja nunak, —tiuwai.

⁴⁷ Tutai nuwak, dekajuagapi tusa puyatuk
 kujaukmaikia Jisusan jegantun tikishmatug, ashí
 aents antuinamunum, wajuk asaya antigke nuna
 pachis, nuigtú ni Jisus antiamuik tsagagbauji-
 nashkam ujakú. ⁴⁸ Tusá ujaam:

—Nawantah, ame kajintsá anentaimam duwi
 tsagajume, shiig agkan anentaimesam wetá, —
 tiuwai.

⁴⁹ Eke chichaak wajai, Jairo jega ijuntaiya nuna apuji jeenia aents tanta:

—Nawanjumek jakame, nuigtuk jintinkagt-inuk waitkasaipa, —tau.

⁵⁰ Tabaun Jisus antuk:

—Puyatkaipa, ayatak kajintsam anentaimjata, nawanjumik aneantatui, —tau.

⁵¹ Nunik jegá wayamunum tikich aidaunak awayachajui. Ayatak Pedro, Jacobo, Juan, nuwa jakau apají dukují aina duke utsanawajui. ⁵² Tuja ashí aents aidauk nuwauch jakaun pachis buutu-idau. Nuniagtai chichajak:

—Buutigpajum, jakache ayatak kanaje, —tau.

⁵³ Tutai dushikidau, nuwauch jakau dekaidau asag. ⁵⁴ Tujash nigka uwegnum achiak senchi chichaká:

—¡Nuwauchih nantaktá! —tiu.

⁵⁵ Tusá tamawaik mayai egkemtujam nantakiu. Nunikmatai:

—Yumain ayujatajum —tiu.

⁵⁶ Dutikamtai nuwauchi apajig dukujijai shiig senchi puyatkaju. Nuniagtai Jisus:

—Ju pachisjum makichik aentskesh ujakaigpajum, —tiuwai.

9

Jisus ni jintintaiji aidaun chichagkagtuktinme tusa ishiakbau

(Mt. 10.5-15; Mr. 6.7-13)

¹ Jisus ni jintintaiji doce aina nuna ijumag wakan pegkegchau aidau jiimainun, jau aidau etsagaumainnash niina senchijin susauwai.

² Dutikak:

—Apajuí aentsnum inama nu pachisjum etsegkatajum, nuniakjum jau aidaush etsagagtajum, —tusa ishimak³ tiu:

—Makichkish jukigpajum jintá wegaku atsumainuk. Ushujutaigkesh, wají egkesá jutaigkesh, yuwatnukesh, kuichkikesh, nuigtú nugkutaigmesh yachiagmek jukigpajum.⁴ Atum tu jeganma wayattagme, nunikjumeke nuwig pujusjum wegakjum ukuktajum.⁵ Tuja tuwí atumin awaintamtan dakitjabiagtatua, dutijamainakuig nunú yaaktak ukuakjum, daweminia tsetse pegatjajum akaketkatajum, dita suwimak jukitnuji iwaintakjum.

⁶ Tiajam ditashkam jiinjag yaakta ukukiag, aents aidau batsatbaunum wegaju, nunikag yamajam chichama nuna etsejuinak, jau aidau-nashkam etsagaidau.

Herodes Jisusan dekas yakita tusa dekajuatatus wakejukbau

(Mt. 14.1-12; Mr. 6.14-29)

⁷ Jisus ashí wají dutikamujin Herodes Galileanmaya apua nu antuk, shiig senchi anentaimá pujau, aents aidau chichainak: “Juan maa-mua nu nantakí wekaewai”, tuinai,⁸ tikich chichainak: “Elías wantinkae” tuinai, tikich tuidau: “Yaunchuk Apajuí etsegtin aajakajua nuwiya nantakne”, tuidau asagmatai.⁹ Tiagtai Herodes chichaak:

—Wi Juagnak inamja ai buuken tsupikagmayajama, tujash ¿jusha ya amainaita iman chichaman antujag dusha?

Tusa wainkatatus wakegau.

*Jisus cinco mil aents ayugkamu
(Mt. 14.13-21; Mr. 6.30-44; Jn. 6.1-15)*

¹⁰ Jisus ishiakbau waketug kaunkag ashí dita dutikamujinak ujakajui. Dutikam ditan ashí yajuak kanakiag nugka agkantu yaakat Betsaida tutainum awa nui wegajui. ¹¹ Tujash aents aidau dekaawag shimutkajui. Nunikag jegajuawajam Jisuschakam ditan shiig anentus jukiajui, dutika Apajuí aentsnum inama nuna pachis jintintak, jau aidaunashkam etsagau.

¹² Nuniai etsashkam akagu asamtai, niina jintintaiji doce aina nunú jegaantag:

—Juwig jutiik aents atsamunum batsatji aentsuk ishiakta, yaaktanum jegattak aents batsata nui wegag, aja tikiju aina nui yumainjin sumak yuwinak kajigtinme, —tuidau.

¹³ Tiagtai ni ayaak:

—Atum dita yuwatnuk susatajum, —tau.

Tuinam dita aainak:

—Imaan aents ayugmainuk atsugtamji, ayatak cinco pag, nuigtú jimagchik namak awai, ashí ju aents ayugkata takuik jutii wemainchawa dita yuwatin sumagkatasa, —tuidau.

¹⁴ Aishmag aidauk cinco mil aishmag tumain aajakajui. Tiagtai Jisus ni jintintaijin:

—Cincuenta, cincuenta aents akanjajum bat-sagtajum, —tiu.

¹⁵ Tima ditashkam Jisus tibaunak betek umikaju. ¹⁶ Dutikawagmatai cinco pagkan nuigtú jimag namaka nuna juki, nayaimpinum pagkai see tusa puug jintintaiji aidaun tinabiu, dita aentsun tinamkatnume tusa.

¹⁷ Dutikawajam ashí shiig yuwawag ejemakaju,

nunikagmatai ampinkaunak yajuakag doce chagkinnum aimjajui.

*Pedro Jisusan amek Kristuitme tibau
(Mt. 16.13-20; Mr. 8.27-30)*

¹⁸ Makichik tsawantai, Jisus kanaká Apajuí aujak pujamunum ni jintintaiji aidaush, niijai pujuidau asamtai iniak:

—¿Aents aidaush minash yaayai tujutuinaawa?
—tau.

¹⁹ Tama dita aினak:

—Wajumak aents aidau: ‘Juan Yamijatin maamua nuuwai’ tujamainawai, tikich chichaidau: ‘Auk Eliasai’ tujamainai, tikich tuidau: ‘Yaunchuk Apajuin etsegtujakú aina dutsu nantakitai’ tujamainawai, —tuidau.

²⁰ Tiagtai Jisus ayaak:

—¿Tujash atumesh minash yaayai tujutjume?
—tau.

Tutai Pedro ayaak:

—Amek Kristu Apajuí awemamuitme, —tiu.

²¹ Timatai Jisus chichajak:

—Makichik aentskesh mina pachittsagmek ujakaigpajum —tusa idayak:

²² —Wi Apajuí Uchijiyaitkun Aentsmaga Aki-inauwaitag nunak, shiig senchi waitkagsag judío aidau apuji, sacerdote apuji aidaush, chicham umiktinun jintinkagtin aidaujai dak-itjuinak mantuawagtatui, dutijuawagmataish kampakumchik tsawan asan nantaktatjai, —tiuwai.

*Jisus mina nemagtukta tautigmek atum wakegamuk idaikujum nemagtuktajum tibau
(Mt. 16.24-28; Mr. 8.34-38)*

²³ Jisus nuna ti ashí aents aidaun chichajak:

—Mina nemagtuktasajum wakegautigmek, atum wakegamuk idaikujum, kashí kashinig waitiakjumesh atsanjajum nemagtuktajum.

²⁴ Ashí aents ju nugka juwi pujutan imá senchi wakegak, mina nemagtuk waittan dakitauk uwemjashtin ainawai. Untsu ashí aents mina nemagtuk nunisag jaa nu uwemjatin ainawai.

²⁵ Aents ju nugka juwiya wají aidaun ashí niinu emakush, jaakug niina wakaninak tuké uwemtikmait sui.

²⁶ Atum mina pachittsa chichat datsamakjum, chichamjushkam datsanjau aidautigminak, wi Apajuí Uchijiyaitkun Aentsmaga Akiinawaitag nuna, mina Apajú tsaaptinjijai tsawan wajasan, nayaimpinmaya aents pegkejam aidaujai ataktú ju nugka juwi minaknushkam: Juka midauchu ainawai, titinaitjime.

²⁷ Tujash dekas tajime: Atum juwi ijunjum juwiyatijum eke jatsuk, Apajuí inamaujiya nu wainkatnutigmesh ajume, — tiuwai.

Jisus yapajinamu

(Mt. 17.1-13; Mr. 9.1-13)

²⁸ Nuna ti ocho tsawan pujus Jisus Pedron, Juagkan, nuigtú Jacobon juki mujanum wakauwai, Apajuí ausatatus.

²⁹ Nunik Apajuin aujak pujus niina niimenig yapajinawai, jaanchjish puju winchamtin wajasuí.

³⁰ Nuniaig jimag aents Jisusan aujuidaun wainkajui, duka Moisés, Eliasjai aajakajui.

³¹ Nunikag tsaaptin winchamtin tenteamunum pujusag, Jisus Jerusalén waitkasa maam atinun pachis

aujuidau. ³² Tuja Pedro ditajai ijunag yujaidaushkam, senchi kaji pujajuinam kajigkú shintaukmá, Jisus tsawan wajas Moisés, Elías aatus ijuntatman wainkajui. ³³ Jimag aentsua nunú wegagmatai, Pedro Jisusan chichajak:

—Jintinkagtinuh, jutiish maigkis juwi batsatag-tai. Kampatum aak umikagmi, makichik aminu, makichik Moisesdau, nuigtú Eliasdau, —tiuwai.

Tujash nunak shiig dekachiatak tiuwai. ³⁴ Juna aatus Pedro chichai, yujagkim ditajai iju-mag ijikuí, dutika yujagkim ijikam ishankajui. ³⁵ Nuniaig yujagminmaya chichaak: “Juuwai dekas mina Uchig anetaiuk, nigki antugkujum umigkatajum”, tabaun antukajui.

³⁶ Nuna ti ashimaig diikmag, imá Jisusnak wainkajui. Nuna wainkajash makichkish tikich aidaunak ujakchajui.

Wakan pegkegchau uchin egkemtuumun Jisus etsagagbau

(Mt. 17.14-21; Mr. 9.14-29)

³⁷ Nunik kashinia duwi mujanmaya akagag mininai, kuashat aents Jisusan igkugtatut minidau. ³⁸ Nuniai tuwakbaunmaya aents senchi jiiká chichaak:

—Jintinkagtinuh, wait aneamam mina uchig makichkiuchia ju etsaentujata, ³⁹ junak wakan pegkegchau egkemtug senchi untsumtiknuwe, imatikam senchi kujainuwe, dutikak weninig saunak pushukasua emauwe! jKakajus idaichamu asa tunamag pujugtawai! ⁴⁰ Imatikakui amina jintintaijum aidaun: Wait aneamjam wakan pegkegchau uchin waitkagta

nu jigtugkitajum timajai, tujash tujinkagmae, —tau.

⁴¹ Tusá tama, Jisus ni jintintaiji aidaun chichajak:

—¡Aents pegkegchau, minai kajinas anentaimchau aidauwah! ¿Wajupá dukapea atumjai ijunjanush pujumainaitja? ¿Wajupá dukapek dakastajime, minaig kajinas anentaimjatnume tusanush? —tiu.

Nuna ti idayak uchi apajin:

—Uchijum juwi itantá, —tiuwai.

⁴² Tima uchijin juki Jisusai ejentattak emai, waugmitkak uchin nugká ajiajam senchi kujau. Imatiktai Jisus wakan pegkegchaun: “¡Jiinkim wegakum uchi ukuktá!”, tiuwai. Tama wakan pegkegchau uchin egkemtuaushkam jiinki ukuiwai, dutikam uchishkam pegkeg wajasmatai apajin susauwai. ⁴³ Dutika etsagamun wainkag: Dekas Apajuin senchijiniap aikawa tusag, puyatjusag diidau.

*Jisus awentsag ni mantamnatnuji etsegkamu
(Mt. 17.22-23; Mr. 9.30-32)*

Ashí aents aidauk Jisus uchi etsagagbaun pachis puyatjusag augmatiagtai, niina jintintaiji aidaun chichajak:

⁴⁴ —Wi tajim nunú shiig antuktajum, nunikjum aneaku atajum, wagki Apajuí Uchijiyaitak Aentsmaga Akiinawa nunak, tikich aents aidaunum sujukag idaisagtatui, —tau.

⁴⁵ Tutaish ditak nuna takumpap tawa tusa-jag dekamainchau dekapedau, eke Apajuí shiig dekamtikchamu asag. Nunidau asag iniaschajui ajaantuinak.

Yaki dekas imá wagakush atinaita tiagbau
(Mt. 18.1-5; Mr. 9.33-37)

⁴⁶ Nunikag ditak pempeentunikiag: “Yaki jutiin ainag juwiyash imá wagakush atinaita” tusag tudayinau. ⁴⁷ Jisus tusá anentaimainamun dekaju asa, uchin juki niini ayaunas awajus, ⁴⁸ chichaak:

—Aents mina nemagtuidau ju uchua jumamtin aina juna, shiig anentus juwidauk mina duti-juinawai. Tuja mina jujuidauk mina awetiuwa nuna juwinawai. Atum ainajum anuiya iman-chauch anenmamaina nunú imá wagaaku atinai, —tiuwai.

Jutiin shiwagmatjamtsu duka jutiinu asa ani-awai

(Mr. 9.38-41)

⁴⁹ Tutai Juan ayaak:

—Jintinkagtinuh, wainkamji aents amina daagmin wakan pegkegchau aidau egkemtuumun jiyau. Dutikakui: Amek aikawaipa timajai, jutiijai ijunchau asamtai, —tau.

⁵⁰ Tutai Jisus:

—Duka tiigpajum, jutiin shiwagmatjamtsu duka jutiinu asa aniawai, —tiuwai.

Samarianmaya dakituinam yajá webau

⁵¹ Jisus ashí jintinkagtamun ashimak, ni nayaimpinum wakitkitnuji tsawan jegau asamtai, puyatkas Jerusalén wegau. ⁵² Nuniak ni jintintaiji aidaun emtikak awemauwai. Dutikam ditashkam nugka Samarianum wegajui, nui aents batsatbaunum jegawag kanumainun egakagtatus. ⁵³ Tujash Samarianmaya aidauk

dita ikantanak dakituidau, Jerusalén weenak tuidau asamtai. ⁵⁴ Dutikawajam Jacobo, Juagjai wakitkiag Jisusan jegaantag:

—Apuh iish duwik ¿Elías Apajuin segatí nayaimpinmaya jiin ajuntug ijinauwa dutik-mainchaukaih? —tuidau.

⁵⁵ Tiagtai Jisus kakaakan aiká:

—Atumek dekatsjume wajuk anentaimkugmea tajume duka. ⁵⁶ Wi Aentsmagan Akiinauwaitag nunak aents aidaun ijinata tusanuk taachuitjai, ayatak uwemtikatasan tauwaitjai. —Tusa idayak tikich aents aidau batsatbaunum wegajui.

*Jisusa jintintaiji agtatus wakejukaju aidau
(Mt. 8.18-22)*

⁵⁷ Nuna yaaktan ukukiag ashinbaunum, mackichik nuwiya Jisusan:

—Apuh, wisha ame tuwig wekaetam nuniak-minish tuke aminak nemagkiní wajatin atajai tusan wakegajai, —tau.

⁵⁸ Tutai Jisus chichajak:

—Kujanham aidauk kanutaijig ajuinawai, aantsag pishak aidaushkam pasugkeg ajuinawai, tujash wi Apajuí Uchijiyaitkun Aentsmaga Akiin-aunuk jeenchau, tepesá ayamainkesh atsugtaig, wainkan wekaejai, —tiu.

⁵⁹ Nuna ti Jisus tikich aentsnashkam:

—Nemagtukta, —tiuwai.

Tama:

—Apuh, idaitusta mina jegajuí wenu, apag jakamtai ukusan ukuakun nemagkatjame, —tau.

⁶⁰ Tutai Jisus chichajak:

—Auk idaisata, aents wakanin jakaujai betekak batsata nu, apa jakamtaish ukustin

atinme, amek yamai nagkamsamek mina chichameg yamagma nu etsegkum, Apajuí aentsnum inama nu pachismesh etsejata, — tiu.

⁶¹ Nuna timatai tikich aents chichaak:

—Dekas Apuh, wi amina jintintaijum ata tusan wakegajai, tujash idaitusta, dekatkauk mina pataag aidaun ashí akattsan ukuktajai, —tau.

⁶² Tutai Jisus ayaak:

—Aents nugkan tsayaak, nugka tsaitaijiya nuna bakajin nenea tsayaak wekaetayatak, ukujin ayampatua dii wajauk shiig tutupit emamait-sui. Numamtuk Apajuí chichamen etsegkatatus wakegayatak patayin ukukchamin dekapeauk, Apajuí chichamen etsegkati tusaik atsumaitsui, —tiuwai.

10

Chichagkagtuktajum tusa setenta y dos ishiakbau

¹ Nuna ti idayas Jisus tikich aidaunashkam etegjauwai, setenta y dos* aentsun. Dutika: “Ashí yaaktanum wejum chichagkagtuktajum”, tusa ni wetin aidaunum jimá jimajan ishiakajui.

² Dutika chichajak: “Dekas tajime: Shiig kuashat aents aidau Apajuí minaish inamjati tusa atsumainawai, tujash ujumchikiuchi yamajam chichama juna etsejuidauk, nuaduí Apajuí segatajum tikich ni chichame etsegmain

* **10:1** Yamajam chicham nagkamku griego chichamai agagbau aina nuwish jimajan tuinawai, tikich 70 tai tikich 72 tawai, nuniau asa apach chicham aina nuwish mai pegkejai. Duwi iina chichamega juwig 72 apusamui.

aidaun ishiakti tusajum. ³ Nunin asamtai wetajum, tujash kuitamamkatajum, wi atumnak uwig ikamyawa batsatbaunum ishimaina numamtuk aents pegkegchau batsatbaunum ishimjime. ⁴ Wegakjumesch kuichkik, waji egkesá jutaigmekesh, sapatjumkesh jukigpajum. Jintá wesajum aents igkuakjumesch chichaakjum megkaekaigpajum, wamkesjum nagkaetajum. ⁵ Tuja atum yana jeenia wayattajume, nuniakjumek dekatkauk: 'Apajuí atumnash shiig agkan anentaimsa pujutan amastinme' titajum. ⁶ Tajumin aents nui puja nu shiig aneas jujabi-agtaik, Apajuí ditanash yaigtatui. Untsu atumin shiig aneas jujamchagtaik, Apajuishkam ditanak yaigchagtatui. ⁷ Nunú jega nuwig pujusjum dita yutain amainamuk yuwakjum, umutain amainakuish uwagtajum. Wagki aents taká duka akiam auwai. Makí makichik jeganum kanagjum nagkaemá yujaigpajum. ⁸ Tikich yaaktanum jegagminchakam, jeentin ni jeen jujamki yutain ajamjamainakuig yuwatajum. ⁹ Nuniakjum nui jau akuish etsagaitajum, dutikakjum: 'Apajuí aentsnum inamjatnuk tsawan namput waschae', tusajum ujaktajum. ¹⁰ Tuja tikich yaaktanum jegagmin jujamtan dakitjamainakuig jinkujum: ¹¹ 'Atumi nugkem jutii sapatjin peemja juka, atuminig pegajá akakeka ukuaji, jutii chicham etsegbauk dakitjau asagmin. Tujash Apajuí aentsnum inamjatta duka namput waschae', titajum. ¹² Juna tajime: Suwimak sukagtamu tsawan jegatna duwik, nunú yaaktanmaya aents nunina nunak, Apajuí duwik yaakat

Sodomanmaya aidaun suwimkan susauwa nuní nagkaemas suwimkan jukiagtinai.

Aents pegkegchau idaitan dakitin aidau
(Mt. 11.20-24)

¹³ “¡Corazignumia aidaunak, aikasnuk Bet-saidanmayanash wait anentuinajai!, ditak mina chichamjun dekaskeapi tujutchaju asagmatai. Yaakat Sidognum, Tironmash aents batsataina duka, wi atumin wainchatain iwaintajim imatika ditash iwaintam wainkujag, dita wake besemag pujaku iwainmamtain jaanchin nugkujag, buukenish yukuun batsakag, ditá tudaujin wake besemag batsatbaunash, Apajuin iwaintumain aajakajui. ¹⁴ Nuaduí Apajuí suwimak sukagtamu tsawan jegatna duwik, yaakat Tironmaya aents aidau, Sidognumia aidaujai suwimkan jukiagtin aina nuní nagkaemasjum atumek suwimkak jukiagtin ainagme. ¹⁵ Yaakat Capernaum batsamin aidauwah, atum anentaimsagmek: Jutiik jainakuish nayaimpinum juwam agtinaitji, tajume. Tujash dutikamak achatnaitjume, jatumek tikich aents pegkegchau aidau jinawaju waitú batsata nui batsamsatnaitjume!

¹⁶ “Atum chicham etsegbaun antugtamaina duka, mina antugtuinawai. Tuja atumin dakitjamaina nunak, mina dakitjak nuninawai. Untsu mina dakitjuinakug, mina awetiuwa nuna dakituinak nuninawai”, tusa ishiakui.

Jisus ishiakbau kaunkamu

¹⁷ Nunú setenta y dos ishiakbau waketug kau-nak, shiig aneasag Jisusan jegaantag:

—Apuh, wakan pegkegchau aidau aentsun egkemtuaú aidaush amina daajum adaisa: Jinkita, tamak nunisag iinash antugtamak aents aidaunash jiinkiag ukuagmae, —tuidau.

¹⁸ Tama ni ayaak:

—Dekaske wisha wainkabiajai, iwanch peem wajukea imanik nayaimpinmaya iyaun. ¹⁹ Nuaduí atumi shiwajum iwanchia nuna senchijí ashí depetkatnun, mina senchijun amasmajime. Dutikamu asagmin, dapi esapainakuish, titigkesh ijupakuish wajukashtatjume. ²⁰ Tujash wakan pegkegchau aidau antugtamakaja duwikik shiig anenigpa, dekas imá senchi shiig aneetajum, atumin daagmik nayaimpinum agagbauwa nuaduí.

Jisus shiig aneasbau

(Mt. 11.25-30; 13.16-17)

²¹ Nuna ti idayak Wakaní Pegkeji shiig anemtikam: “Apawah, amek ashí nayaimpinum batsamin aidau, nugkaya aidaushkam apuji asamin emematjame, iman asam aents yacha aidauk iwaintutsuk, aents imanchauch aidau etegjamujum, tikima uchi itugmaina imatiksam iwaintukum nuaduí. Dekaske Apawah, amek aajam wakegame”, tiu.

²² Tusa idayak: “Mina Apag ashí nugkanmayag ame diistá tusa idaitugsauwai, nunin aig wi Apa-juí Uchijiyaitag nunak makichkish dekajuinatsui, imá mina Apajuk shiig dekajui, aikasag mina Apagnash wainainatsui imá wiki shiig wainjai. Tuja wi iwaintamu aidau Apagnak wainmain ainawai.”

²³ Tikich aidaun juna ujak idayak, dekas ni jintintaiji ijuntatman ayampatua: “Atumek shiig aneastajum wi takaamush wainu asajum.
²⁴ Yaunchuk Apajuí etsegtin aajakú aina duka, apu aidaush yamai atum wainjum juna wainkatatus wakegajakú ainawai, tujash wainkachu ainawai. Antutnash yamai atum antajum juna antukagtatus wakegajakú ainawai, nuninakush ditak antukchajui ju chichamnak”, tiuwai.

Dekas juuwai chicham umimainuk

(Mt. 22.34-40; Mr. 12.28-34)

²⁵ Tutai chicham umiktajum tibauwa nuna jintinkagtin wajakí, Jisusan dekapsatatus:

—Jintinkagtinuh, ¿wisha wajina dutik-mainaitja pujut nagkanchaun jukitaskanush? —tau.

²⁶ Tama Jisus ayaak:

—Chicham umiktinun Moisés agajua nunú aujkumesh, ¿wajintu agagbauwa wainme?

²⁷ Tama ni ayaak:

—‘Amina Apujum Apajuiya nu imá senchi aneeta, nuniakum imá niinig anentaimsam pujustá, Apajuinu pegkeg aina duke dekaata, ashí Apajuí wakega duke takastá, nuniakum amijai ijutkamushkam amek anenmamsam aneeta’ tawai, —tiu.

²⁸ Timatai Jisuschakam:

—Dekas tame, ame tame nunú imatiksamek umiktá, nunú nuniemunum pujut nagkanchauk ajutjamtatui —tau.

²⁹ Tama nigka betek umiachu asa Jisusan iniak:

—¿Yaita wijai ijutkau aidaush? —tau.

Samarianmayan pachisa Jisus augmattsamu

³⁰ Tutai Jisuschakam augmatbaun nagkama ujaak:

—Jerusalegnunia aents imá nigki, yaakat Jericonum wekamá kasanum egkemkauwai. Nunikmatai kasa aidau achikag, senchi suwi suwimainakua, ipu ipujú ashí maawag, ni takakbaujinak ashí yajutuk wegak ukukiajui.

³¹ Dutikamu ai sacerdote nunú jintanum nagkaemakmá wainak, ikaag diis ukukiuwai. ³² Tuja levita nagkaemakmá wainkashkam, ikaag wajas diis wegak ukukiuwai. ³³ Nuniai aents Samarianmaya niishkam nu jintanmag nagkaemakmá wainak, wait anenmain diisuí. ³⁴ Dutika jegaantun ampin vinujai juki, ipujamu aidaun ampijua, jaanchi ijujuk, nuaduí ni entsamtaijin ekeni juki, jega ijagkan kajiitaijin ejega kuitamak, ³⁵ kashinia duwi wegak, jeennun jimag tsawantai takasá kuichik jumainun akik ukuak: ‘Ame kuitamjuktata, wi waketkun wajupa tujuttatme nunash akiktajame’, tusa nui aepeak weuwai. ³⁶ Amesh wajintu anentaime kampatum aents aajakua nuwiyash, ¿ya aajakuita dekas nigki anenmamas aents kasa suwimaam tepaun wait anenjaush?

³⁷ Tusa tama ni ayaak:

—Suwimaam tepaun wait anenjauwa nuuwai, —tiuwai.

Timatai Jisuschakam:

—Ameshkam wakitkim, dutiksamek amijai ijutkamushkam amek anenmamsam wait anenjata, —tiuwai.

Jisus Martan Maríajai ijagsatasa webau

³⁸ Tusa ukuak Jisusak wega wegakua yaaktan ukukiag, aents batsatbaunum jegau. Nunikmatai nuwa Marta daagtin niina jeen juki awayauwai.

³⁹ Nuna kai María daagtin pujau, Maríak Jisus chichatai ayaumas ekeemas antak eketu.

⁴⁰ Tujash Martak kuashat takamain au asamtai, nuna uyumak wekaetau, nuniak Jisusan jegantun:

—Apuh, aanú mina kaig ayatak eketa nu, kaim yaigtá, tusam awetujia, niish yainkati, —tau.

⁴¹ Tusa tama:

—Martah, shiig kuashat takamain uyumakam wekaeme, ⁴² dekas imá senchi puyatjumainuk makichkiuchi. Maríak dekas pegkejan etegka mina chichamjun antugtak eketui, nunak makichkish emegkatmainchau ainawai, —tiu.

11

Jisus Apajuí aujut jintinkagtuamu

(Mt. 6.9-15; 7.7-11)

¹ Tikich tsawantai Jisus Apajuin aujak pujuttaman wainkaju. Nunik ashimkamtai makichik ni jintintaiji jegantun:

—Apuh, Apajuish wajuk aujmainaita nunú jutiish jintinkagtuata, Juan ni jintintaijin jintintujakua dutiksamek, —tau.

² Tama ni ayaak:

—Atum Apajuí aujkugmek aatsajum titajum: ‘Apawah, amek nayaimpinum pujuwaitme. Pegkegmaitam ibau asamin ashí tikich aidaush imá aminak emematjabiagtinme.

Amek jutiishkam inajatjata, amina aentsjum
 nayaimpinmaya ame wakegamun
 umigtamin aina dutiksag,
 nugkanmayashkam umigtuktinme tusam.

³ Dutiksamek ii yuwatnushkam kashí kashinig
 sukagtita.

⁴ Ii tudaujishkam tsagkugkagtugta, jutii
 tikich pegkegchau takagtamaidaush
 tsagkugnaitag aikasmek.

Iwanch pegkegchau takamtiksati tusamek idaik-
 agtutsuk,
 ayatak yaijatkam agkanmitkagtuata', —tiuwai.

*Segatajum, egaktajum, untsuktajum Jisus
 tibau*

(Mt. 7.7-12)

⁵ Aaja segatajum tusa jintintua idayak:

—Atum ainajum anuiyatigmesh kumpajum
 dekas shiig anendaitaijum ajutjamu asamtai,
 niina jeen aehaet jegantam: 'Kumpajuh, minash
 kumpatum pag tsagkatjukta, ⁶ mina kumpag
 imauya tajutua nunú ajaamain atsugtau asam-
 tai tajame' tamin. ⁷ Ni aigmak: 'Waitkag-
 saipa, waitinak epenin mina uchig aidaujai
 kanakun tepajai, nunin asan nantaknuk ama-
 mait Sujai', ¿tujamainkaih? ⁸ Nunak tujamt-
 suk sujustá tusa segamu asa, nantamainchau
 ayatak amina kumpajum asa, nantakí ame at-
 sumaku segamunak ashí amamainai. ⁹ Duwi
 wi tajime: Apajuishkam segatajum, imatjamak
 amastatjume; egatash egaktajum, egakjume
 igkugtatjume; untsuktajum, imatjamak waitin
 ujatjamtatjume. ¹⁰ Ashí aents sumauk suwam

auwai, egauk igkuinai ni egamujinak, waitinum wajas untsumushkam waiti ujatam auwai.

¹¹ “¿Atumesh uchijum yujumkan segapaig, kaya sumainkaitjum? ¿Dutikachkugmesh uchijum namakan segapaig, dapi sumainkaitjum?

¹² ¿Dutikachkugmesh uchijum nujintan segapaig, titig sumainkaitjum? ¹³ Atum pegkegchau ainayatkugmesh uchigmik pegkeg suu ainagme. Atumkesh nuniagminish Apajuí nayaimpinum puja dusha, ¿wagkag Wakaní Pegkejinash atum segamash amaschagti?”, tiuwai.

Wakan pegkegchau aidau apuji Beelzebú daagtinun senchijin Jisusak wakan pegkegchounak jiyaawai tibau

(Mt. 12.22-30; Mr. 3.20-27)

¹⁴ Juna inagnak tikich tsawantai wakan pegkegchau aentsun egkemtua chichachu emamun, Jisus jiiikí awetak chichamtikau. Dutikamun wainkag aents tuwak ijunuk puyatjukag diidau. ¹⁵ Nuninaig wajumak aents aidau chichainak: “Juka Beelzebú, wakan pegkegchau aidau apujiya nuna senchijin wakan pegkegchaunak jiyaawai”, tuidau.

¹⁶ Nuna tusag tuinaig, tikich aidau Jisusan, dekas Apajuí Uchijimpashit, tusag dekapsagtatus: Nayaimpinmaya wainchatai iwainkagtukia, tuidau. ¹⁷ Tama dita anentaimainamun dekau asa:

“Makichik nugkanmag batsatiatak pempeentuniki maaní batsatkujag megkaemain ainawai, nunisag makichik jeganmak ijunag batsatiatak, pempeentuniki maaní

batsatkushkam, ditak megkaemain ainawai. ¹⁸ Aantsag iwanchakam niina senchijin mina sujus, aentsun wakan pegkegchau egkemtuau aidaun jiijati tujutkug, ditak pempeentunikiag shiwagmaemainai, nuniak ditá senchijinash megkaemain ainawai. Nunin aig minak, Beelzebú senchijin wakan pegkegchaunak jiyaawai tujutjume. ¹⁹ Beelzebú niina senchijin mina sujaish, atumi jintintaijum aidaunash ¿ya senchijinash suwawa, wakan pegkegchau aidaun jiihtinme tusash? Jutii jintintaiji aidauk Apajuí senchijiin jiyaawai tujutkugmek, atum wainka dewakjum tu yujagme. ²⁰ Wi Apajuí senchijiin wakan pegkegchau aidau aentsun egkemtaun jiyaag nunak, yamaik atumiin Apajuí inamu asantai jutikajai.

²¹ “Aents senchigtin niina jeen kuitamak waitinum akajun takus wajataig, niina wajijii nui awa duka ashí betek amainai. ²² Tujash tikich aents niiya nuní senchi minitak, niina depetki akajun atanki jegá wayaa, ashí wajiinak yajutuk kumpají aidaun tinamainai.

²³ “Aents wi takaag nujai shiig aneas juwachuk mina shiwagmatui, nunisag Apajuí chichame etsegbaunash yainchagtaik, kuashat aents uweemainun megkagainawai.

²⁴ “Wakan pegkegchau aentsnum egketu jii-ikmak, aents atsamu agkantunum ni pujumainun egaak wegawai. Nunik ni pujumainjin wainkachag: ‘Dekas wakitkitjai wi pujujakbaunum’ tusa anentaimas, ²⁵ tajua diikmá, nunú aentsuk juga japimká shiig iwajamuama imanun

wainak ukuak, ²⁶ tikich wakan niina nagkagas pegkegchau aidaun, sieteya imaan yajuak waketjuki egkemtawai. Dutikam aentsuk duwik pegkegchau aajakbaunak, nuní nagkaemas shiig pegkegchau wegawai”, tiu.

Dekas shiig aneasagtin aidau

²⁷ Juna pachis Jisus eke chichaa wajai, aents tuwakbaunmaya nuwa senchi jiiká chichaak:

—¡Nuwa amina jujepag, muntsujin amuntstamauwa duka, shiig aneastinai! —tiuwai.

²⁸ Tutai Jisus chichajak:

—¡Dekas Apajuí chichamen antukag umiidau, nuní nagkaemas shiig aneasagtinai! —tiuwai.

Aents pegkegchau aidau wainchatai iwainakia tibau

(Mt. 12.38-42; Mr. 8.12)

²⁹ Jisus aents aidau ayatak tuwajam, ditan chichajak: “Atumek aents pegkegchau, Apajuish umigchau asajum, dekas Apajuí Uchijimpashit tusajum dekapjustasajum: Wainchatai iwainakia, tujutjume. Tujash atum tajum nunak dutikashtatjai, ayatak Apajuí etsegtin Jonás wajukauwa nujai betekak iwaintuktatjime.

³⁰ Jonás namaknumia iwaaku jiinki, yaakat Nínive batsamin aidaunum Apajuí chichamen etsegtai, dekas Apajuí awemamuapita tiu aina numamtuk, wi Apajuí Uchijiyaitkun Aentsmagan Akiinawawaitag nunashkam, mantuawagmataish

ataktú nantakmatai waitkag, dekas Apajuí awe-mamuapita tujutiagtatui. ³¹ Nuwa Sabá nugkan-maya aentsun apuji surnumia Salomogkan taji-uwai, Apajuí yachamtikamun antujuk dekaju-atatus. Nunú atumnak bakugmagtinai, atak suwimak atina duwik, wi Salomogkan nagkaesaun dekaun imatika chichagmash antukchaju asagmin. ³² Ninivenmaya aents aina nunú atumnak bakugmagtinai, atak suwimak atina duwik. Ditak Jonás Apajuí chichame ujakam, dekaskeapi tusag tudaujin idayinak Apajuin nemagkajui. Tujash atumek, wi Apajuí Uchijin dekas Jonasa nagkaesaun juwi pujusa chichagmash antukjum, tudau takat idaikujum Apajuí nemajuinachu asagmin.

Lámpara pachisa augmattsamu
(Mt. 5.15; 6.22-23)

³³ “Makichik aentskesh lámpara ekemakajag dukukag idaichau ainawai, dutikachkush pegakan wakentinkish awaigkag aputsajame. Lámpara ekemakag yakí ekenin ainawai, tikich aidau wayaakush shiig wainak wekaesagtinme tusag. ³⁴ Atumi jiimek lámpara ekemakam tsaaptin emaama numamtuk atumi iyashminak awagmawai. Jiim pegkeg asantai shiig wainmamainaitam imatiksam, ashí pegkeg aina duke anentaimtaik, anentaiminish tsaaptin ajutjamainai. Untsu jiim pegkegchauwaitkui wainmamainchauwaitam nunisjumek, ayatak pegkegchauk anentaimkugmek suwenum pujagme. ³⁵ Kuitamkata, aminí tsaaptin awa nunú suwe wajatjamsai. ³⁶ Ame ashí pegkegchau

aidau idaisam pujakmek, jii kashi ekemakam tsaaptin emama numamtuk, atumi pujutjuminish wajagme.”

Jisus fariseo aidaun chicham umiktinun jintinkagtin aidaujai pegkegchauji pachisa tibau (Mt. 23.1-36; Mr. 12.38-40; Lc. 20.45-47)

³⁷ Nunú chichaamun ashimak wajai fariseo jegantun:

—Mina jegajuí yujumak yuwami, —tusa ipau.

Tima Jisuschakam fariseo jeen wayaa, mesanum jegantá ekeemsau. ³⁸ Nunikmatai wainak fariseok anentai jegagchau, wagkag chicham umiktin tuke ikigmasjumké atajum tawa nuniaish, Jisusash ikigmatskesh yuwatasash ekeemsae tusa. ³⁹ Nunitai Jisus chichajak:

—Atum fariseo aidautigmek, shikiká umutai, nuigtú plato aina nuna awanke nijamaina numamtuk wajagme. Tujash atumi anentaiminig kasamtajum, pegkegchau takataijum aidaushkam piyak ajutjamainawai. ⁴⁰ ¡Anentainkachu aidauwah! ¿Apajuí iyashin najanauwa duke iina anentainash najanachukait? ⁴¹ Atum pegkeg ata takugmek atumin ajutjamaina duka ujunauch aina nu susatajum, nuuwai dekas pegkeja duka.

⁴² “¡Fariseo aidautigminak wait anentajime! Atumek ajak menta, ruda, nuigtú yutai inagku ajuntua ukugkutai aina nu puyatjusjum diezmó wajagme. Ju dutikayatkujum chicham umiktinum pegkeg takatan jintinjama nu, nuigtú

Apajuí aneetan jintinjama duka pachitsuk idaijume. Tujash ju aina ju umiakjumesh, nuigtú tikich umiktin aina dushakam umitskek idaimain ainatsjume.

⁴³ “¡Fariseo aidautigminak wait anentajime! Atumek jega ijuntainum wayakjumesh, dekas apú ekeentai shiig iwajamu aidau etegkajum ekeemin ainagme, nuigtushkam aents kuashat ayamunum igkuntuinakush, shiig ajantujus kumpamjuatnume tusajum wakejin ainajum nuaduí.

⁴⁴ “¡Chicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Atumek aents ukusbau wainmainchau shiig epekbauwa nunin ainagme, nunin asamtai aents nui awantak wekaekush dekachu ainawai initak aents ukusbauwa nunak. Atumesh numamtuk awankak iwainmamjume pegkeja iman, tujash atumin anentaimin pegkegchau ajutjamaina nunak waitjamainachu asamtai.”

⁴⁵ Jisus tabaun chicham umiktinun jintinkagtin antuk:

—Jintinkagtinuh, ame fariseo aidau pachisam tame duka jutiish tukagtakum tame, —tau.

⁴⁶ Tutai Jisus ayaak:

—¡Chicham umiktina nu yacha aidautigmish wait anentajime! chicham umiktajum tibauwa nu kakajus umimainchauwa ibauk, tikich aidauk ju umiktajum tajume, atumkesh umiachiatkujum, atum kijin jumainchauh tikich ayankajum, machikish yaitsuk emasjum chichagmainaitjum numamtuk wajau asagmin.

⁴⁷ “¡Atumnak wait anentajime, atumí muunjum aidau, Apajuí etsegtin aajakajua nuna maawag ukusajua nu dakumká najanajum batsamtajum duwi! ⁴⁸ Jujú dutikakjum atumek iwainmamjume, atumí muunjum aajakajua nunú, Apajuí etsegtin aidaun maawajua nunisjumek anentaibajum. Dekaskenmag dita maawag ukusajui, dutikamunum atumshakam nui ekenjum dakumká najanajum batsamtagme.

⁴⁹ “Nuaduí Apajuí ni yachajin atumin pachipas: ‘Wi chichamjun etsejin aidaun ishikkattajai, chicham yamagman etsekgatin aidaunashkam, dutikamtaish dita maamunak mainak, tikich aidaunak yaaktanum yujajus waitká yujajiagtin ainawai’, tiuwai. ⁵⁰ Wagki atum wegantu aidau, Apajuí nugkan najanauwa duwi nagkamas, Apajuí etsegtin aajakajua nuna maawaju aina duwi, atumnak Apajuí suwimkan sujamsagtinaitjume. ⁵¹ Nunak Abel maamua nui nagkamas, Apajuí etsegtinun Zacariasan juga Apajuí ememattainum pujuttaman maawaju ainawai. Imaan aents kajegbau aina nuaduí atumnak suwimkanak sujamsagtin ainawai.

⁵² “¡Atum chicham umiktin jintinkagtin aidautigminak wait anentajime! Atumek aents yawin takakiatak, tikich jegá wayata tutai waitin epetin aina numamtuk, aents Apajuí nemagkag uwemjata tuinaig, atum chicham umiktina duka dekayatkujum, wajina tawa nunú dekachu asajum shiig jintintsugme, nuniau asajum atumkesh uwemainnum pujatsjume.”

⁵³ Jisus juna chichá chichakua ashimak jiinkintai, fariseo aidau, chicham umiktinun

jintinkagtin aidaujui senchi kajejuidau asag wainainakug ⁵⁴ kuashat iniidau, wajintuk chichakat timatai tsanumjuja maami tusag.

12

Jisus ni jintintaiji aidaun nuní pujustin atajum tusa ujakbau

(Mt. 10.26-33; 12.32; Mt. 10.19-20)

¹ Nunú imanik shiig kuashat aents tuwainak najanidau, imaniagtai Jisus dekatkauk ni jintintaiji aidaun: “Fariseo aidau lewaduraji aina nujai kuitamamkatajum, ditak dekaskea imanun tuinak aents aidaunak tsanuinawai. ² Tujash ashí uukbau aina duka wantinkagtinaí, aantsag ashí dekaachbau aidaushkam dekaamu agtinaí. ³ Nuniau asamtai atum tikichish antachbaunum chichasbaunash ashí antukagtinaí, tuja atum kanutaigmin epeni pujusjum chichakbau-nashkam ashí antukagtinaí”, tiuwai.

⁴ Nuna jintintaiji aidaun tusa idayak, tikich aents tuwakajun chichajak: “Kumpag aidauh, atumnashkam titajime: Mantamainakuish ishamkaigpajum, atumin iyashmin mainakush wakanminak maachagtinaí. ⁵ Dekas ishamainaitjume atak jakagmin, Apajuí suwimkan sujamak jii ajumaish kajinchauwa nui egkepawagmatai waitmainaitjum nunú.

⁶ “¿Atum shiig piipich kuichik juwakjum, cinco pishak sujuchuk agmaujum? Nunú aina duka, makichkish Apajuí kajimatki idaisamuk ainatsui.

⁷ Apajuik atumi intashim wajupa awa nunash

shiig dekawai, nunin asamtai atumek ishamkaig-pajum. Atumek pishak aina nuna nagkaesau ainagme.

Ishamtsuk Kristu nemagnaitjai tumamainai
(Mt. 10.32-33; 12.32; 10.19-20)

⁸ “Nuniau asamtai atum tikich ujaakjum wika Kristu nemagnaitjai tiu aidautigminak, wi Apajuí Uchijiyaitkun Aentsmagan Akiidau asan, Apajuí aentsji nayaimpinum batsata nunú antuinai, ditak dekaskenum mina nemagtin ainawai titinaitjai. ⁹ Atum mina nemagtin ainayatkujum, tikich aidau emtin: Wika Kristunak nemagchauwaitjai, tujuti aidautigminak, wishakam aikasnuk Apajuí aentsji nayaimpinum batsata nunú antuinai, ditak minak nemagtuchu ainawai, titinaitjime.

¹⁰ “Ashí aents aidau, wi Apajuí Uchijiyaitkun Aentsmagan Akiinawaitag junakesh pegkegchau chichagtuku ainakjash tsagkugnamain ainawai. Tujash Wakaní Pegkejin pegkegchau chichagkaju aidauk tsagkujam achagtinai.

¹¹ “Atum mina nemagtin aidautigminak achigmakag, jega ijuntainum apu chichaman epegkin aidau ijunjamunum ejetamawagtinai. Dutijamchakjash tikich apu aidaunum ejetamtatus jujamkiag etamainakuish: Wajintuk apunash titaja, tuja wajintuk aiktaja apu ininkuish, tusagmek uyumaktin aigpa. ¹² Atumin apu aidau inimpatai, Wakaní Pegkeji dekamtijamattawai apu aimainnak.”

Tikich sujitin aigpajum

¹³ Nunú tuwakbaunmaya makichik:

—Jintinkagtinuh, mina apag jaak yatsumjai wají akaantunikjum jukitajum tujabauwa nunú, ame wait aneasam mina yatsug: Dutiksagmek akaantunikam jukitajum, tusam tujutta, —tiu.

¹⁴ Tusa tama Jisus:

—¿Kumpajuh, ya minash atumin utugchatjumin epegtin atí tusash, nuniachkush ame aents wajiin sujitdayakuish akaantukam suu ata tusash adaitukmae? —tau.

¹⁵ Nuna ti idayak:

—Nijah, atumek kuitamamkatajum, itugsag wají shiig kuashat ajutia tusagmek anentaimtú pujuigpajum. Aentsuk wají imá kuashat ajamu asa imá shiig dakunkut pujumaitsui, —tiuwai.

¹⁶ Nuna tusa idayak tikich augmatbaun pachis: “Aajakuí aents wiyakuch, nuna ajajin shiig kuashat ajak juumain uminjauwai, ¹⁷ imanikmatai nigki anentaimas: ‘¿Utugkatjaki juuká ijumainush jega atsugta jama?’ tau.

¹⁸ Nunikmá anentaimag: ‘Dekas ajak juuká ijumtai yaig aina aunak tegagtajai, dutikan nuní muun aidaun jegamjatjai. Dutikan nuanuí ashí ajakan juukan utuaktajai, mina wajiig aina nunashkam. ¹⁹ Imatikan kuashat mijanai yumainun, wají aidaunash ijumjan, nuaduí jegá ayamkun pujusan shiig yuwakun, umutainash umakun shiig aneasan pujustajai’, tiuwai.

²⁰ Tu anentaimá pujaun Apajuí chichajak: ‘¿Anentainkachuh, amek yamai kashia juajuik jakattame! ¿Nunikaminish wajijum imatikam ijumjaum ancha yanau atatua?’ tiuwai. ²¹ Nu nunikua numamtuk wajaktinai aents ju nugka

juwi wiyakchamea pujakush, Apajuí wakegamua nuna takaachkug”, tiuwai.

*Apajuí ni uchijí aidaunak kuitamui tibau
(Mt. 6.25-34)*

²² Nuna tusa idayak ni jintintaiji aidaun pempeentuki: “Atumnashkam jutiksanuk tajime. Atumek wajina yuwanuk pujustaja, wajinak nugkugtaja tusagmek puyatjú pujuigpajum. ²³ Dekas pujuta nuuwai yutai nagkaesauwa duka, iyashmia nuuwai jaanchin nagkaesauwa duka. ²⁴ Atumesh pishak anentaimsajum diistajum. Ditak ajakmakagkesh juuchu ainawai, jeganakesh jegamkag yutaijinak ijumainatsui. Nuniaunak Apajuí suwawai dita yuwatnunak. Tujash atumetjume dekas pishak nagkaesau aidautigmek. Iman ainagminish ¿wagkag Apajuish atum atsumamunash amaschagtinme? ²⁵ ¿Atumesh wajupatigmea, tikich esajam aina ibau wisha atajai tusajum anentaimtú pujakjumesh esaumainaitjume? ²⁶ Nunú pipichikesh dutikmainchauwaitkugmesh, ¿wagka tikich wají aidaush imatikagmesh anentaimtagme?

²⁷ “Atumesh yagkug yagkujuina nunú anentaimsajum diistajum. Yagkug aidauk takainatsui, ujuchnash kutamainatsui, nuninayatak Salomón nugkutai pegkejan tikich aents aidau waitus najanamun sumak nugkujá, tikichin nagkaesau iwagmamajakua nuna nagkaesau pegkeg iwasjamun yagkujuinawai, Apajuí yagkugmitkamu

asag. ²⁸ Yagkug ikamia aidauk yamaikik pegkejan yagkujuk, ajuma duwi etsa sukuam kagagmatai, apea ajapeam atinnakesh Apajuí imatikas iwaja ibaush, ¿wagkag atumnash idaitamsati Apajuiyai imatikas kajinas anentaimchau aidauwa? ²⁹ Nuaduí atum yuwatin, uwagtin, anentaimtakjum wajuk nunikajak tusagmek uyumá pujuigpajum. ³⁰ Ashí ju aidaunak aents Apajuí nemagchau aidau imatin ainawai, tujash atum atsumajum nunak atumin Apa Apajuiya nu dekawai. ³¹ Nuaduí atumek, Apajuí pegkegnum inapa nunuwá umigkatajum. Nuniakjumek ashí nunú aina dushakam aan kuashat jukitnaitjume.

Nayaimpinum wiyakchameaut

(Mt. 6.19-21)

³² “Mina jintintaig uwig wajumchik kakakchauchia numamtin ajuminig, atumin Apa Apajuiya nu wakejutpagme, mina inamtaijui pujusagti tusa, nuaduí ishamkaigpajum. ³³ Atumin wajiijum akuig sujukjum tikich atsumaidau yaigtajum. Atum dutiktaik, Apajuí nayaimpinum wiyakchameaut tuke atinun, kasash waimainchau, kabau wajiin emesmainchawa nuanuí ukugtamsattajume. ³⁴ Nunú wiyakchameatin ajutjamaina nuanuig anentaimsajum pujustajum.

Umintsajum aneaku pujustajum tibau

(Mt. 25.1-13; Mr. 13.34-36)

³⁵ “Ashí shiig umintsajum jii ekemakjum dakamsatajum. ³⁶ Atumek inak aidau apuji nuwenbaunum wematai, jegaa juwakag pujusag wajupa asag taat, ni taa waitin ijuakui

wamkesan ujattajai tusa kanutsuk iwá pujú aina numamtuk wajatajum. ³⁷ Nu inak aidauk shiig aneemain ainawai, iwaa batsatai apuji minau asamtai. Dekas tajime: Apushkam jegaa wayaa Kamisjin yapajia, ni inataiji aidau-nashkam mesanum ejegan pekas, ni yutain tinamainai. ³⁸ Apú inake aidau aehaet wajasmataish, kajiitsuk batsamas tsawampainak, apuji minaun igkugku aidauk shiig aneemain ainawai. ³⁹ Ju anentaimtusjum diistajum, aents jeentin kasa kasagkatasa utuam atinjin dekau asa, kanutsuk iwaa pujauk jeenig utuam amait-sui. ⁴⁰ Numamtuk atumshakam aneaku pu-justajum, wi Apajuin Uchijiyaitkun Aentsmagan Akiinawaitag nunak, tsawan imatiksa anen-taimtachbau ai minitnaitjai”, tiuwai.

Inak pegkeg inak pegkegchaujai pachisa augmatbau

⁴¹ Juna Jisus ashí tusa inagnakmatai, ni jintintaiji Pedro:

—Apu ame augmatbau pachisam tame dusha imá jutikek tukagtam, atsa ¿ashí tikich aents aidaush antuktinme tusamek tame? —tau.

⁴² Tutai Jisus ayaak: “¿Yaita inak niina apuji tabaunak imatiksag umin, nuigtú shiig anentaimkau asamtai kajitus: ‘Ame juwi pujusam, jujú aents mina jegajuí batsamas takaina ju yutain atsumainakuish susata’, tusa inag ukuak, apujig tikich nugkanum wegak ukumaina numamtuk awajkamush? ⁴³ Nunú inak apuji inaja ukukbau ashí ni tibaunak betek umiká pujakug, apuji minitaish shiig aneemainai. ⁴⁴ Dekas

tajime: Nunú inak imanis umiaunak apujishkam ashí mina ajutuina duka, ame kuitamjutin atá tusa idaitumainai. ⁴⁵ Tujash nunú inak inaja ukukbauwa nu: 'Mina apujuk waamak taashtatui', tusa anentaimas, tikich takau aidaun senchi suwimak, nuwanaskam waitkak, nigka shiig yuwak, umutnash umak, nampetan nampe waja pujai, ⁴⁶ nunú inaka nuna apuji tsawan dekachbau ai pachiachmau takamá wainak, shiig senchi suwimkan susa, tikich aents pegkegchau aidaujai betek waittsati tusa idaimainai.

⁴⁷ "Nunú inak apuji wakegamun shiig dekyatatak, umitsuk takatnash takatsuk puja nunú imá senchi suwimkan jumainai. ⁴⁸ Untsu tikich inak apuji wakegamun dekachu asa, pegkegchau takasuk ujumak suwimkak suwam amainai. Untsu ya imá senchi susamuita dushakam imatiksaik segam amainai, ni umiktá tibaujinash betekash umikaja tusa diigsatatus, numamut Apajuish aents aidau takatin diigsagtinai.

Jisusa nemajin nemagchau aidaujai tupan-dayagtinai tibau

(Mt. 10.34-36)

⁴⁹ "Wika ju nugka juwig waitkajus mantu-awagmatai, mina nemagtuidauk Wakaní Pegkeji jukitnume, nunitai tikich mina dakitjuidau-nak Apajuí jiiyai suwimkan susatnume tusan tauwaitjai. Nuniau asan, iwika wakegajai itugsag waamak nu uminkaja tusan! ⁵⁰ Shiig senchi waitkam atinaitjai, tujash yamaik wait-iajai, wi dekas waittsatnaitag nunú ashim-daekati tusan. ⁵¹ ¿Atumek ju nugka juwig shiig

agkan anentaimas batsamsati tusas tauwaitai tujutjumek? Nunikchauwaitjai. Wika atum mina nemagtuidau asagmin, tikich mina dakitjuidau utugchatan aputugmasag kajegtamá batsamtin asamtai tauwaitjai. ⁵² Yamaya juwi nagkamas, makichik jeganum cinco aents pujuidauk, kampatuma nu jimaja nuna kajegtinai. ⁵³ Uchigtina dushakam uchijijai kajegdayagtinaí, uchishkam apajin shiwagmatnai, nuwashkam nawanjijai shiwagmaetinaí, dutikam nawanjishkam dukujin shiwagmagtinaí, nuwa nemakushkam tsatsajin shiwagmatnai, tsatsajishkam uchijí nuwen shiwagmatnai”, tiuwai.

Aents ni nunimainji pachisa tibau

(Mt. 16.1-4; Mr. 8.10-13; Mt. 5.25-26)

⁵⁴ Jintintaijin tusa idayak aents tuwaká ijunun pempeentuki: “Atum etsá akaetaiya atú ikiyamkuig, yumi yutugtatuí tibauk imanísag yutawai. ⁵⁵ Dase tsumunmaya dasentuk nujinum wegakuishkam, esat tepeattawai tibauk imanísag esat tepeawai. ⁵⁶ ;Tsanumin aidauwah! atum nugkanmayash diisjum, nuigtú nayaimpi niimé diisjumesh tsawan wajuku atatua nunú dekauwaitkugmesh, ¿wagka wi wainchatain iwainaja takaag dusha, Apajuinumianap iwainawa tusagmesh shiig dekatsjume?

Shiwajumjaish shiig chichasá epegkata tibau

(Mt. 5.25-26)

⁵⁷ “¿Wagka atumek dekas pegkeja duke egatmamtsugme? ⁵⁸ Makichik aentskesh, pegkegchau takagtusume tusa apunum chichaman egketjamantai, niijai apu chichaman

epegnunum wegakmek, eke jegatsuk jintaag shiig chichasam epegtuniata. Nunikchaminig jegaa amin chichaman dekgatama, ni jujamki achijatin aidaunum sujupakmatai, achijatin jujamki aents katsek aidau achiká chimpitainum egkepawai. ⁵⁹ Junak dekas tajime: Amina apu achigmak egkepamtaig kakajus jiinmaitsume, ayatak amina kuichkijum ashí akikmakam, shiig ashinkam jiinmainaitme”, tiuwai.

13

Tudau takat idaichakjumeK waittsatin ainagme tibau

¹ Nunú tsawantaik tikich aents aidau kauntuntaju Jisusan, nunikag: Galileanmaya aidau uwijan maawag apeenak Apajuin emematú ijuntatman, Pilato suntaji kautuk kuashat aentsun kajegkagmae tusag ujaidau.

² Tiagtai Jesus ditan chichajak: “¿Atum anen-taimsagmek dita imá tudau asag aikam ainawai tajumek? ³ Tujash nuniatsui. Atumshakam tudau takat idaikujum, pujutjum yapajiachkugmek antsagmek jakatnaitjume. ⁴ Wajasá niimtai torre tutai yakí jiikbau Siloé tutaya nu iyaak, dieciocho aentsun kajegkua dusha, Jerusalegnum batsamajakaju aina nuna nagkaesau tudau asajampap, suwimkan juwak jinawaita ¿tajumek? ⁵ Tujash wi tajime: Atumshakam tudau takat idaikujum pujutjum yapajiachkugmek, dita jinawajua antsagmek jinatnaitjume.”

Numi higuera nejenchau pachisa augmattsamu

⁶ Juna tusa idayak Jisus augmatbaun nagkama augmatak: “Aents ajajin higueran ajauwai. Dutikau asa, nejeatsuash tusa diistatus wejiu, tujash nejeg makichkish atsuju. ⁷ Nunitai ni inake ajan kuitamak pujuttaman: ‘Jujú higuerak ajakam ajapata. Kampatum mijadai tajuan diyajai nejeatsuash tusan, tujash nejeatsui. Juniyatak tikich ajak ajamainun nugká akijuag wajamaitsui’, tiuwai. ⁸ Ajakjintin tutai inak ayaak: ‘Apuh, dekas makichik mijan dakasmi nejeashtimpash, wi wajauti tentean pukujaan, tikich nugka dekas pegkeg aina nuna yajutkan ijutjatjai; ⁹ dutikamash nejekchatpash, untsu tikich mijantinish nejeachkui ajakmi’,” tiu.

Tsawan ayamtai aig nuwa jau etsagagbau

¹⁰ Jisus tikich tsawan ayamtai tsawagmatai, jega ijuntainum aents ijunjagmatai jintinkagtak wayaa pujau. ¹¹ Nuniamunum nuwi nuwa wakan pegkegchau egkentuamu asa, dieciocho mijadai tuke machikish dakuenas wekaetsuk, ayatak punus wekagas waitú wekayin eketu. ¹² Nunittaman Jisus wainak untsuká:

—¡Nuwauchih, yamaik wi etsagajame!

¹³ Takug nuwan achikú. Dutikam nuwashkam shiig dakuenak tutupit wajasuí. Nunik Apajuin see taku emematu. ¹⁴ Dutika etsagagmatai, jega ijuntaiya nuna apujishkam senchi kajeká, aents ijunjaun chichajak:

—Seis tsawan takamainuk awai, nunú tsawan aina duwi kaunmainaitjume etsaentugti takugmek, tsawan ayamtai ai aan yujatsuk, —tau.

¹⁵ Tutai Jisus ayaak:

—¿Tsanumin aidauwah! Atum aidautijum tsawan ayamtai aig baka atiajum, burrug-mishkam jukijum namaká ejegajum yumi amin-ujum dusha ¿wagka atumesh tsawan ayamtai aish dutiknugme? ¹⁶ Jujú nuwa Abraham wegantu, iwanch egkemtuum, dieciocho mijadai tuke punus wekagas waitú wekagun wainkaunush ¿wagkanuk etsagagchatja, tsawan ayamtai aigkish?

¹⁷ Jisus aaja tama niina kajejuidaushkam senchi datsajajui. Nuniai tikich aidauk shiig aneedau, Jisus etsaegkagtutai wainaidau asag.

Mostaza jigkayí nuigtú levadura pachisa augmattsamu

(Mt. 13.31-33; Mr. 4.30-32)

¹⁸ Nuniagtai Jisus: “¿Apajuí aentsnum inama nunash, wajijai betekmamtinai tusanua tumainaitjime?” tiuwai. ¹⁹ “Apajuí inapa duka, mostaza jigkayin aents ajajin ajaamu, tsapai jigkai piipichitak tsakajá muun wajasmatai, yakiya pishak aidau nuna kanawen pasugmama numamtuk, Apajuishkam aents wajumkea nui inabaujin nagkama kuashat emawai”, tiuwai

²⁰ Tusa junashkam: “¿Wajina pachisnua Apajuik jumamtinun inamui tusanush ujainaitjime? ²¹ Apajuí aentsnum inama duka nuwa pagkan najanatatus kuashat harinan juki, nui levadura piipich ajuntuamu, ashí jegajug kajiak wampushmitkama numamtinai”, tiuwai.

Jinta menaku pachisa jintinkagtuamu

(Mt. 7.13-14, 21-22)

²² Jisus Jerusalén wegak, yaakat aidaunum wayaa nagkaemak, nuigtú yaakta ukukiag aents batsatunmash jintí jintinkagtakua wegau.

²³ Nuniamunum makichik aents:

—Apuh ¿wajumchikek uwemkagtin aina? —
tau.

²⁴ Tutai:

—Atumek kakanmamsajum dekas waiti menakua nui wayatajum. Kuashat wayatatus wakeyagtin ainawai, tujash ashí betekak wayachagtinai. ²⁵ Wi jeennun waitin epenmataig atum agaa ijunutijum: ‘Apujuh, Apujuh waiti ujatjita’, tusajum unsugkugminish, wi chichagkun: ‘Wika atumnak wainchau ainajime, tuwiyants ainajum titinaitjime.’ ²⁶ Tusá wi tama atum aigkujum: ‘Apuh, jutii amijai yujumak ijunja yuwaku, umutash amijai ijuntuja umin ayagjama, jintinkagtutash iina yaaktajin wekaesam jintinkagtin aayumjama, tujutiagtin ainagme.’ ²⁷ Tusajum imatkugminchakam wi chichagkun: ‘Atumesh tuwiyants ainajum wainchawaitjime, ashí wetajum juwi batsamsajum tu batsamtsuk, pegkegchau takau aidauwah’, titin ainajime. ²⁸ Aaja tai niimsatakamajum Apajuí inamtaijin Abraham, Isaac, Jacob, tikich Apajuin etsegtin aajakú aina nujai ijunu wainkajum, atumek agag batsamsajum, senchi buutkujum daik takegtitin ainagme. ²⁹ Wagki ashí nugkanmaya aents aidau kaunkag, mesanum Apajuí inamtain pekaamsagtinai. ³⁰ Nuniagtai aents yamai eme anentujukchamu aina nu, dekas eme anentam

agtinai, tuja aents yamai eme anentam aina juka wainak juwagtinai.

*Jisus Jerusalegnumia aents aidau egaagbau
(Mt. 23.37-39)*

³¹ Tusa Jisus chichai, nunú tsawantaik wajumchik fariseo aidau Jisusan kautuawag:

—Jisusa apu Herodes mantamatatus wakejutpame, yajá tikich nugkanum wetá, —tuidau.

³² Tusa ujaam Jisus ditan chichajak:

—Wetajum, nunikjum apu pegkegchau takatan imá shiig anentaingtug takauwa nu jegagjum ujaktajum: Wika yamai, kashinchakam wakan pegkegchau aentsú egkemtuaunak jiijan ishimtatjai, dutikakun jau aidaunash etsagaittajai, kempatuma juwi mina tsawantug umiintugkui duwi nagkankattajai, timae tusajum. ³³ Wika Jerusalén wegag junisnuk wetatjai, yamai, kashin, duwi tsawaknushkam. Apajuí etsegtin aidauk tikich nugkanmag mauchu ainagme, nuaduí wishakam Jerusalegnumak waitkasa maam atatjai.

³⁴ “¡Jerusalegnumia aidauwah atumek Apajuí etsegtin aidauh main ainagme, nuigtushkam Apajuí chichagkagtukti tusa awetugmamtaish, kayai tukuí tukuinakuajum main ainagme! ¡Wika shiig wakeesan, atash uchuchiji aidau nanapen awayag ijumag kuitamama numamtuk, atumnash ijumjan kuitamkata tamash, atumek dakitjamugme! ³⁵ Nuniku asagmin jujú atum batsatjum juka ukumkimu, aents pujugsachbau agkan agtatui, nuniktin asamtai tajime: Yamai

nagkamsagmek ataktuk waitkashtatjume, nuni-autijum tsawan jegamtai wi minakui: ‘¡Apajuí awemam mina ju emematiagmi!’ tujuttinaitjum duwi waitkatin ainagme.”

14

Aents iyashin iyag jau etsagagbau

¹ Tsawan ayamtai ai, Jisus dekas fariseo aidaun apuji jeen yujumkan yuwatatus wegau. Nunitai tikich fariseo aidauk wajukatig tusa diidau.

² Nunik waikmá Jisus wainkau aents iyashin iyag tepettaman. ³ Nunik Jisus chicham umiktinun jintinkagtin aidaun, fariseo aidaujui ijumag chichajak:

—¿Atumesh wajuk anentaimjume, tsawan ayamtai aish aents jaush etsagaumainkaih, atsa etsagaumainchaukaih? —tau.

⁴ Tamash ditak aimkachaju, nunikagmatai Jisus kuntunum achiká inantak etsagaju, dutika:

—Yamaik tsagajume, amina jeemin wakitkita, —tusa awemak, ⁵ fariseo aidaun pempeentuki:

—¿Ya atum ainajum anuiyash niina burrují, nuniachkush bakajigkesh tsawan ayamtai aig waanum egkemá jinkishmin wajas egketu wainkush, yamaik tsawan ayamtaiyai, kashin jiiktajai tusash idaimainaita?

⁶ Tamashkam aimainchau dekapenak takamtak ijunu.

Nuwenbaunum ipaamu aidau pachisa augmattsamu

⁷ Nuwenbaunum ipaamu aidau dekas ekeemtai pegkeg iwajamu aidau etegkeg pekabiagtai, Jisus wainak tiuwai:

⁸ —Atumek nuwenbaunum makichik aentskesh ipapawagmataish, dekas ekeemtai pegkeg iwajamu etegkagmek ekeemsatasa wakeyigpajum. ⁹ Atum imannum eketjumin tikich ipak atumin nagkaetamsau taamtai, atumin ipapau tajuntugman: ‘Amek wajaktá jujú aents ekeemsati’, tusa tujamkui, datsá datsanjai wajakjum ukunum ekeemtai imanchaunum ekeemsajum. ¹⁰ Makichik aentskesh ipapainakuishkam, amek yama wayamunmag ekeemtai imanchaunmagkesh ekeemsata. Nuniamin ni ipapau minak: ‘Kumpajuh, emkam au ekeemtai dekas pegkeg aina awi ekeemsata’, tusa aentsun emtin ekepasmatai, ameshkam shiig aneasam datsamkas ekeemsamnum. ¹¹ Aents dekas tikichin nagkaesau ata tusa wakegawk, eme anentam achatnai; untsu aents imanchau tikichin nagkaesau atanash anentaimtuchu, dekas eme anentam atinai.

¹² Nuna tusa idayak, aents niina ipauwa nuna chichajak:

—Ame, yujumak yuwami tusam ipaamakmek imá amina kumpagmik, amina yatsumik, amina pataim, tikich atumjai ijutkau dekas wiyakuch aidauk ipaawaipa. Ame nunú aents iman aidau ipaamak, niishkam iiktamak aminashkam dita jistamainakushkam ipapawagtatui, dutijamkui atumek yamaik ju nugka juwi akikbauwa nunin juwaktatjume. ¹³ Tujash dekas imá pegkeg,

ame atak jistamkumek ipaata ujunauch, kuntu-
jin tsujinkau, shutú, wainmachu aidaushkam.
14 Ame nunú dutikakmek atak shiig aneam
pujuttame, ditak akigmakchagtin asamtai. Untsu
Apajuí atumin akigmakagtinai, ashí aents ni
pegkeemtikbau aidaun inanjatín tsawan jegatna
duwi, —tiuwai.

*Aents yujumak yuwawagmi tusa ipaamu
kaunkachbau pachisa augmattsamu
(Mt. 22.1-14)*

15 Jisus aatus tutai, nunú mesanum ditajai
pekaju makichik chichaak:

—Shijap aneastin ainawa Apajuin inamtain
batsamsag yujumkan yuwidauk, —tiuwai.

16 Tutai Jisus chichaak:

—Aents jistamatatus, yutain kuashat umikuí,
dutika kuashat aents aidaun ipauwai. 17 Dutika
yujumak yuta jegamtai, ni inaken awemauwai:
'Ipaamu aidau ujaktá: kaunkatnume yutaig ashí
uminkae', tusa. 18 Tusá ujainam ipaamu aidauk
dakitudau asag, dekatkau ipaamua nu chichaak:
'Wika yamá nugká sumakag juna diyakun we-
tatjai, wait aneas tsagkugtugti', tau. 19 Nuniai
tikich chichau: 'Wishakam diez toro sumakjai.
Nuna nugka tsaitain detuan dekapsata tajai,
wait aneas tsagkugtugti', tau. 20 Tikitchakam
aikasag: 'Wisha yamá nuwenajai, nuniku asan
minishtatjai', tau. 21 Tiagtai inakeshkam ukuak
taa apujin ujakú. Tusá ujaam apushkam kajekú,
nunik ni inaken chichajak: 'Waamak weme
yaaktanum jinta aidaunum, ujunauch aidau,

uwejen nawenkesh tsujinkau, shutú aidaun, wain-machu aidaushkam ipaajum ikaunmakta', tusa awemauwai. ²² Tima inakshakam we, aents nunin aidaunak yajuak ikaunma apujin wejí: 'Apuh, ame tujutmaum nunak imatixsanuk ikaunmakjai, tujash nuigtú ekeemainush awai', tau. ²³ Tama apu inaken chichajak: 'Wetá nunikam yaakat pegmagbau agaajin, jintaagkesh aents wekagu wainkamek: Wegajai awi yujumak yuwami, tusa dakimakuish kakantsá jukim ikaunmata, ashí mina jegajuí ekeemtai agkan awa nu piyakti. ²⁴ Wi yama nagkamchakun ipaamag duka makichkish taawajag yujumkanak yuwachagtatui, tiuwai.'

Mina nemagtuidaun waitiakush katsuntug nemagtumain ainawai Jisus tibau
(Mt. 10.37-38; 5.13)

²⁵ Kuashat aents Jisusan saetusag ashinaidaun, imaniagtai Jisus ayampatua chichajak: ²⁶ "Makichik aentskesh ni apajin, ni dukujin, ni nuween, ni uchijí aidaun, yachi aidaun, umayí aidaunakesh, mina anenmaina nuní nagkaemas aneak, mina jitintaijuk amait sui. Nuigtú nigkishkam ni wakejamun taká pujutatatus wakegak, mina jintintaijuk amait sui. ²⁷ Mina nemagtuk waittan dakitaushkam, mina jitintaijuk amait sui. ²⁸ Atum ainajum anuiya, wajasá niimtai torre tutain yakí jiká jegamkatatus wakegakug, ¿dekatkauk ekeemas anentaimainchakait, ibau jegamainush kuichkish ajutuash, wajupa kuichkinak ashimkainja tusa? ²⁹ Aents nunak

anentaimtutsuk ayatak nagkama, kuichkijin ashimak idaisamtaig, aents aidau nuna wainkag dushikinak: ³⁰ ‘¡Nijah! Juna nunú aents jegamkatjai tusa yamaikik nagkamau ayatak, ashimkachmin dekapeak idaisabi’, tumain ainawai. ³¹ ¿Tikitchakam, apu tikich nugkanmaya apujai maaniatatus wakegakug, dekatkauk niina suntajiná ijumag diez milkesh suntag ataig, mina shiwag veinte mil minitjuina aujaish itagdaikan maanimainashitag, tusa dekamainchaukaih? ³² Nunik maanimainchau dekapeakug, eke nagkamtsuk: Maanitik atsustí tusa epegtunimainai. ³³ Numamtuk, atum ainajum anuiya ashí niinu aidaun idaitan dakitauk, mina jintintaijuk amaitsui.

*Wee jea jeatuji pachisa Jisus augmattsamu
(Mr. 9.50)*

³⁴ “Week dekas pegkejai, jea jeatuji ajamu asa. Tujash jea jeatuji megkagak sakam wajasmataig, makichik aentskesh wakejumaitsui. ³⁵ Wee nunik besegmataig jukiag agaa ukajá ajapmain ainawai, nugkajai pachimja takamainnumkesh atumnachu, ajakan wajautinkesh batsatmainchau asantai. Antutaijum ajamutigmek wi tajim jujú shiig antuktajum”, tiuwai.

15

*Uwig emegkakbaun pachis Jisus augmattsamu
(Mt. 18.10-14)*

¹ Jisus chichagkagtutai antugkagtatus kuashat aents apú kuichkiji atinun yajumin aidau, tikich aents pegkegchau aidaujai ijuuntuidau.

² Imatikiagtai fariseo aidau, chicham umiktinun jintinkagtin aidaujai Jisusan pachisag:

—Auk aents katsek aidaun kumpamak tuke ditajai ijuuntug yu wekaenuwe, —tusag wakenmag imatjuidau.

³ Nu tama augmatbaun pachis augmatak:
⁴ “¿Atum ainajum anuiyatigmesh, cien uwig ajutjamu makichik megkaetugmakmatai, noventa y nueve uwija duka uwegshunum batsaakjum, megkaekauwa nu egaa egakuajum igkumainchawk ainajum? ⁵ Dutika wainkagmek shiig anentsajum midaakí ju ainagme. ⁶ Nunika jegá wakitki jegaajum atumi kumpajum aidaujai, nuigtú ijunja batsamtaijum aidaujai ijunjajum: ‘Mina kumpag aidauh, mina uwig megkaetugkaunak yamaik jukijai, nuniku asamtai atumjai ijuntsa shiig aneasagmi’, tumainchawkaitjum. ⁷ Numamtuk Apajuí aentsji nayaimpinmaya aidaushkam shiig aneenawai, noventa y nueve uwemkau ainai, aents tudau takatan wekaetak megkaetanum pujú, Apajuí nemajak pegkegchaun idayak pujutjin yapajiau asamtai”, tiuwai.

Kuichik emegkakbaun pachis Jisus augmattsamu

⁸ Tikichnashkam tiuwai: “Nuwa diez tsawan-tai takasá kuichik jumaina ibau takakbaun, kashi makichik ajuag emegkak, jii ekematuk kuitamas japimak ¿wainmainchawkaih? ⁹ Nunik wainak shiig aneas juwakug, ni pujamunum aents tikiju batsataidaun, ashí ni kumpají aidau-nashkam untsuká ijumag: ‘Atumjai ijuntsa shiig

aneasagmi, kuichkin makichik tsawantai takasá jumainun emegkakmayag nunak jukijai', tumainai. ¹⁰ Aatus Apajuí aentsji nayaimpinmaya aidaushkam shiig aneenawai, makichik aents niina tudaujin idayak Apajuin nemagtaik."

Uchi apajiin wakitkimu pachis Jisus augmattsamu

¹¹ Junashkam Jisus tiuwai: "Makichik aents ajujakuí jimag uchijí. ¹² Nuna uchijí ekeu apajiin: 'Apawah, ashí wají midau amaina duka yamaik sujustá', tusa segauwai. Tama apajishkam: 'Ayú' tusa mai uchijin ni wajiijinak etsegtuk: 'Jujú aminuk atí' tusa tinabiuwai. ¹³ Dutikam machik tsawan apajijai pujus, uchi ekeuk ashí ni wajiijinak ijumag juki, apajinak ukuak tikich nugkanum atushat weuwai. Nunik nui pujus wainak pujut pegkegchaunum wekagak, kuichkijinak wajiiijai ashimkauwai. ¹⁴ Nunik ashimak pujai, nunú yaaktanum yapajut tepeauwai. Nunikmatai niishkam senchi yapajau, wajiyaik sumak yuwati. ¹⁵ Nuniak we takatan iniimtai, nu yaaktanmaya aents kuchigtin asa: 'Ame mina kuchig kuitamjutin atá', tusa kuchi batsatbaunum awemau. ¹⁶ Dutikam niishkam kuchin ayujak pujus senchi yapajak, kuchi yuwinamun yumain dekapeau, tujash makichik aentskesh yutainak suwinachu. ¹⁷ Dutikam senchi yapajak ekeemas anentaimá ekeemkamá, adeaju apají inake aidaun, nunik: Mina apajú inake aidauk kuashat yutanak yuwinak, ampijajash wainak utsá batsatainainpap, wi juwi pujusan nujantai jaaja. ¹⁸ Dekas wisha mina

apag pujamunum wakitkitjai, nunikan jegan: 'Apawah, wika Apajuinash kuashat pegkegchaun takagsajai, imanik aminashkam pegkegchaun takagsajame. ¹⁹ Nuniku asan wika amina uchigmek amaitsujai, minak ame inakem etita, dutijuawamin wishakam amina takagtamin aidaujai ijunjan takagsatjame titajai', tiuwai nigki anentaimas. ²⁰ Tusa jiinki wega wegakua apají pujamunum tikiju jegattak minittaman, apajishkam ikaag uchijin wainkauwai.

"Dutika uchijin wait anentug tupikatki igkug, kajut pagkuk kugkuas shiig anentus ni jeen jukiuwai. ²¹ Dutikam uchi apajin chichajak: 'Apawah, wika yamaik Apajuinash kuashat pegkegchau takagsajai, imanik aminashkam pegkegchaun takagsajame. Nuniku asan wika amina uchigmek amaitsujai', tiuwai. ²² Tusá uchijí tama, apají ni inake aidaun untsuká: 'Wamkesjum jaanch dekas pegkeg agma iman jikjum anugtujatajum, dutikajum tsajam uwejen anillo patakuakjum, sapatchakam wegagtuktajum. ²³ Dutikajum toro tsakat duwejam diisjum maajum, wamkesjum inagkajum umiktajum, yuwinaku jistamawagmi. ²⁴ Yamaik mina uchig tuke waipakchatnapitja, jajutkas megkaetugkamiatai tuwamag nunú iwaaku tajutí wantintugkae.' Apuji timatai inak aidaushkam wamkesag ni tibaujinak imatiksag umikagmatai, jistamtan nagkamauwai ni uchijí tajuam shiig aneak.

²⁵ "Nuniaí niina uchijí dekas emkaushkam ajanum takaak weu minikmá, antukui pam-

painamun. ²⁶ Nunik inake nui wekagun untsuká: ¿Wagka nunash imatuinawa? tusa iniau. ²⁷ Tama inakeshkam: ‘Amina apa yatum taamtai, uchig jatsuk iwaaku tajutmatai waipakjai tusa, toro tsakat dekás duwejam diisjum maatajum, dutikawagmin nuna uchin ayugkui jistamawagmi tiajam, ditashkam imatik-sag umikagmatai nuna yuwinak jistamainak imatuinawai’, tiuwai. ²⁸ Tusá ujakam senchi kajeká, jegaa waitnak dakitug agaag wajasuí. Nunikmatai ni apají jiantuki: ‘Wegajai jegá wayaami’, tau. ²⁹ Tama apajin ayaak: ‘Apawah, wajupa mijadaiya wi juwig pujusan yayatsjame inakjai betek, chichamjumnash intimjutsuk, wi imatikamaitkumesh minak makichik cabra tsakatchikesh sujuchume, niina kumpajijai jistamati tusamek. ³⁰ Nuninaitkum yamai amina uchijum, kuichkigmin nuwa akiká takatai aidaujai wekagak utsanjamak taamtai, toro tsakat dekás duwejam mantuam ayugkum jistamjame’, tiuwai.

³¹ “Tusá uchijí tama: ‘Uchijuh, amek wijai ijunjam tuke pujuwaitme, ashí wají midau aina duka aminu ainawai. ³² Nuniaig juka amina yatum jakautskaitai tuwamag nunú iwaaku pujau asa, imapam tajutjama wantintugmaku asamtai, shiig aneenaku jutikaji, nuaduí jujú jistabauk pegkegchauwai tumaitsuji,’” tiuwai.

16

Apú wajijjin kuitamin pegkegchaun pachis Jisus augmattsamu

¹ Junashkam Jisus jintintaiiji aidaun tiuwai: “Aents wiyakuch ajujakuí inake, ashí niina waji-iji aidaun kuitamin. Nuna tikich aidau etsegtukajui: ‘Wajiigminak wainak takagtamui’, tusag.
² Tima nuna untsuká itan: ‘¿Wajuk asamtaiya nunash tujutuinaawa? Yamaik amek minaig takaschattame, nuniktin asam mina kuichkijuk, ashí mina wajiig aina nujai papiinum agakam sujustá’, tusa segauwai. ³ Tusá tama: ‘Apu mina ni takatjin jiiija duwish ¿wisha wajuk takas nuk pujustaja? Wika nugka tautnumash kakaumait-sujai, wainkan pujusan kuichik sujustajum tusan sumá wekaetanash datsamajai’, tusa anentaimá eketu. ⁴ Nunik: ‘Untsu juna jutikatjai, apu ni takatjin jiiigkuish, tikich aidau mina jegajuí taam pujustá tujuttinme’, tusan. ⁵ Tusa ni apujin diwimaidaun untsuká ikaunman, dekatkauwa nuna iniak: ¿Wajupa mina apujush diwime? tau. ⁶ Tama ni ayaak: ‘Wika aceite cien barrilnum* aimkamun awagtumainun diwimjai’, tau. Tutai: ‘Ju papí jukim ekeemsam wamkesam agagta: Ayatak cincuenta diwimjai, tusam’, tiuwai. ⁷ Nuna tusa idayak tikichin: ‘¿Amesh wajupa diwime?’ Tama ni ayaak: ‘Wika trigo cien sakunum aimjamu awaktumainun diwimjai’, tau. Tutai nunashkam: ‘Ameshkam ju papí jukim ekeemsam waamak agagta: Ayatak ochenta diwimjai, tusam’, tiu. ⁸ Nunú inak pegkegchau imatika emtika anentaimag umikmatai, apuji wainak anentai jegagchauwai. Nuna tusa Jisus, Apajuí nemagchau aina duka pegkegchau takatnumag,

* **16:6** Makichik barrilnumag “ocho galones inagkeasa” aceitek yajá wajakbauwai.

Apajuí nemajin aidaun nagkagas imatika anentaimainawai.

9 “Tujash wi tajime: Atumesh duka nu wajukauwa nunisjumek nunimainaitjume, dekas kuichkia duka tikich pegkegnum yayakjum kumpajum ikaugkatajum, nu dutikagmin atumdadu amutugmakmataish, Apajuí ni pujutaiji tuke auwa nui jujamkitin asamtai.

10 “Aents imachik ajamaitkush pegkegnum takauk, kuashat ajamash nunisag dekas pegkeg aidaunak takamainai; nuniai tikichia nu imachik ajamash pegkegnum takaachuk, kuashat ajamash pegkegchaunak takamainai. 11 Aents ju nugka juwi pujus, kuichik kuashat ajamaitak pegkejan takaachunash, ¿itugsaya Apajuish tuke pujutaiya nuwish kajintsash awaimainaita? 12 Atumin ju nugka juwi pujus, takagtusti tusa Apajuí amasbauwa nu, betek takaschautigmish ¿Itugsaya nayaimpinmaya dekas tuke atina nunash amamainaita?

13 “Makichik inakak jimag apugtinuk amaitsui. Tikich apujin imá senchi aneak, tikichin dakitmainai. Nuniachkush makichik apujin wakejus umijak, tikichnak dakitau asa umigmaitsui. Numamtuk atumshakam Apajuí umigkata tu, wiyakchameatasa anentaimtu wajamaitsugme.”

14 Jisus tutai fariseo aidau antukag, dita imá senchi kuichkinak anentaimtin asag, dushikis chichajuidau. 15 Nudiagtai Jisus: “Atumetjume aents aidau emtin pegkeja iman jumamin aidautigmek, tujash Apajuí atumí anentaimnak shiig dekagtamjume; nuniau asa aents aidau

eme anentam ata tus wakegaunak Apajuik dak-itawai.

Apajuí chichame duwik etsegkamu tuja yamai etsegbaujai pachisa tibau

¹⁶ “Juan Yamijatin Apajuí chichamen eke etsegtsaigkik, aents aidauk Moisés chicham umiktajum tibauwa nuna, nuigtú Apajuí etsegtin agagbauwa nunash antujakajui. Tuja Juan Yamijatin yamajam chicham, Apajuí inamjatnun etsegbaun nagkabauwa nuwi nagkamas, ashí aents aidauk Apajuí inatjati tusag senchi kakanmaminawai.

¹⁷ “Nugka, nayaim aina nu megkagainatsaigkik, chicham umiktinum Moisés agagbau piipich aina dukesh umintsukek juwakchatnai.

Nuwak idaimaitsui Jisus tibau

(Mt. 19.1-12; Mr. 10.1-12)

¹⁸ “Ashí aishmag aidau nuwen idayinak tikich nuwajai nuwenkug ekagmainawai. Tuja nuwa aishi idaisamua nuna nuwatushkam nunisag ekagmawai.

Lázaro wiyakchajai

¹⁹ “Aajakuí aents wiyakuch jaanch dekas pegkejan iwagmamag pujus, kashí kashinig jistamu. ²⁰ Imaní pujai ujunauch Lázaro daagtinun ashí iyashinig kucha kuchapjú wajasun itawag, nunú wiyakcha jeen waitijin apukiajui, nui pujus segamti tusa. ²¹ Nui pujus senchi yapajak yuwatatus wakegau wiyakuch yuwaku mesajinia akakeamun, nunittaman yawá aidau kuchapen dukatuinak waitkaidau. ²² Lázaro nuní pujau

jakamtai, Apajuí aentsji nayaimpinmaya aidau jukiag iwakaju Abraham pujamunum. Nuniku ai wiyakchashkam jakamtai ukusajui.

²³ “Dutikam wiyakchak jiinum pujus senchi waitiak pagkas niimkamá, wainkau Abragkan, Lazaronashkam Abragkai ayaumas ekeemtaman. ²⁴ Nunik wainmawaik senchi jiiká untsuak: ‘¡Apawah Abragka, minash wait anenjugta!, nuniakum Lázaro awetugta ni tsjam uwejen yumin uchupig idaijun antinjuk machik bichatmitkajuati, jii imagniamunum pujusan senchi waitiag nuna’, tau. ²⁵ Tama Abraham ayaak: ‘Uchijuh adeagta, ame nugká pujusam shiig aneam waitkas pujubium nu. Nuniamin Lazarok senchi waitmayi, imanijakú asa ya- maik nigka juwig ayamak shiig pujawai, nuniai ame waitiame. ²⁶ Nuigtushkam juwiyati anuí minita takuish minimaitsui, wake ishamain asantai. Anuiyatigmeshkam juwi minitasajum wakegakjumesh nagkaemamaitsugme.’

²⁷ “Tama wiyakuch chichaak: ‘Untsu apawa Abragkah, wait aneam Lázaro nugká awe- mata, ²⁸ dutikam mina yatsug cinco batsaama nuna shiig Apajuí chichamen ujatjuktinme, du- tikam ditak jujú imag waitta juwig minisht- inme’, tau. ²⁹ Tama Abraham ayaak: ‘Ditak Moisés agagbau, nuigtú Apajuí etsegtin aidau agagbauwa nuna aujus imatiksag umiinak wait- tanmag minimainchau ainawai’, tiu. ³⁰ Tama wiyakuch ayaak: ‘Apawah Abragka, dekas aents jakau nantakí chicham ujaam antugkag tudau takatan idayinak Apajuin nemagmain ainawai’, tau. ³¹ Tutai Abraham chichajak: ‘Moisés

chicham umiktinun, nuigtú Apajuí etsegtin aidau agajajua nuna betek uminatsu anidauk, jakau nantakí ujamash dekaskeap tawa tusag antug-mainchau ainawai’,” tiuwai.

17

Tikichin pegkegchau emaidaun pachis Jisus tibau

(Mt. 18.6-7, 21, 22; Mr. 9.42)

¹ Nuna ashimak Jisus ni jintintaiji aidau chichajak: “Aentsuk tudau takatnak kakajus uwemtumaitsui, tujash aents tikichin tudaun takamtikaina nuna wait anentajai. ² Ju uchi pi-
ipichia jumantin mina yamá nemagtuidaun makichik aentskesh pegkegchaun takamtikaidauk, dekas kaya muun dekeetai aina iman jukí kungtugnum jigká detuais, nayants ajugká ajapmain ainatai. ³ ;Kuitamamkatajum atumek!

“Amina yatsum pegkegchaun takagtamkuish, ankaipa tusam senchi titá, tama tsagkugtugta takuig tsagkujata. ⁴ Tuja makichik tsawantinig sieteya imagnia pegkegchaun takagtamas, sieteya imania tsagkugtugta tusa segapakuish tsagkujata”, tiuwai.

Apajuiyai kajintsá anentaibaunum dutikmainai tibau

(Mt. 21.21)

⁵ Jisus tutai jintintaiji aidau:

—Apujuh, Apajuiyai kajintsá anentaimta nu aan senchi sukagtusta, —tuidau.

⁶ Tiagtai Jisus ayaak:

—Atum Apajuiyai kajintsá anentaimaujum mostaza jigkaiya nuninchikesh ajutjamainakuig, numi sicómoro waja jujú chichagkujum: ‘Teganim nayantsanum wajaata’, tamak nunisag uminmainai, —tiuwai.

Inak aidauk apujin umignai tibau

⁷ “¿Atum aidautigmesh inakjum nugkan pukug tsayaak wekaetau, nuniachkush bakagmin kuitamak pujau wakitki jegá taamtaish, wayam: ‘Juwi tantá ekeemsam yujumak yuwata’, tumainkaitjum? ⁸ Duka tutsuk: ‘Agkú yujumak yuwatin inagtugkata, nunikam yapagmamam sujustá, wi shiig yuwan, umutnash uwajan uminkamtai, amesh duwi yuwata’, tumainaitjume. ⁹ Inakem ame tibaunak imatiksag umigtamkamtai yuwagmesh: See ame umikbaun yuwag duwi, tusagmesh ¿tukamujum? Dekas tajime: Duka take tuchau ainagme. ¹⁰ Numamtuk ainagme atumshakam, Apajuí takatan amasbauwa imá duke umikjum idaikugmek: ‘Jutii inak aidautik atsumchatai ainaji, imá ni tujabauk umiká idayidau asaja’, tumainaitjume.”

Diez aents jata lepra achikbau aidaun Jisus etsagakbau

¹¹ Jisus Jerusalén wegak, Samaria nugka, Galilea nugkajai tesagdayamunum jinta asantai nagkaebau. ¹² Nuna nagkagag jegawajui aents yaakta ukukiag batsatbaunum, nuniai diez aents lepra achikam waitú batsamin igkugtatus jiinag ikaag ijunas, ¹³ senchi untsumkag:

—¿Jisusah jintinkagtinuh, jutiish wait anenk-
agtujia! —wajaidau.

¹⁴ Imatiagtai Jisuschakam:

—Sacerdote pujamunum jegajum wantinkata-
jum, —tiu.

Tima ditashkam jintá wesag, dita jaamujinak
tsagagkaju. ¹⁵ Nunik dita aina nuwiya makichik
ni tsagagbaujin wainmamak, senchi jiiká Apa-
juin eme emematak waketak, ¹⁶ Jisusan jegantun
tikishmag pujujus, see tau ni tsagagbaunum,
duka Samarianmaya aajakuí. ¹⁷ Nunitai Jisus
chichajak:

—¿Diez aidau tsagagchagmaka? ¿Nueveya
dusha wajukawagmae? ¹⁸ ¿Imá jukeuchikaih ti-
kich nugkanmayayaitak wakitki Apajuí ememati
duka? —tau.

¹⁹ Tusa Jisus:

—Wajakim wetá, amek minai kajintsá anen-
taimam duwi tsagajume, —tiuwai.

Jisus ni taatnuji pachisa etsegkamu

(Mt. 24.23-28, 36-41)

²⁰ Fariseo aidau Jisusan iniinak:

—¿Wajupa asaya Apajuí jutiin inapamush ati-
naita? —tusag iniidau.

Tama ni ayaak:

—Apajuí inamjatna duka duwiyap atatua tu-
saish kakajus dekamaitsui. ²¹ Nuniau asam-
tai: ‘Apajuik juwi inamui, awi inamae’, tabauk
achatnai. Apajuik yamaiya juwik atumnak ina-
pajume, —tiuwai.

²² Tusa idayak ni jintintaiji aidaun pempeen-
tuki chichajak:

—Tsawan jegatnai, wi Apajuí Uchijiyaitkun Aentsmagan Akiinawaitag nuna wakitkimtai, atum utusaik makichik tsawantaikish wainkag tusajum wakeyagtinaitjum nunú, tujash takugmeshkam minak waitkashtin ainagme. ²³ Nunashkam tujabiagtinai: ‘Juwi pujawai, awi pujume’, tujamainakuish wegpaum. ²⁴ Wi Apajuí Uchijiyaitkun Aentsmaga Akiinawaitag nunak, peem pachiachmau peeti wamkes nayaimpin tsaaptin emak, tikich yantamnumash tsaapmitkama numamtuk wajaktinaitjai. ²⁵ Nunú tsawan jegatsaig, dekatkauk senchi waittsattajai, aantsag aents aidaush dakitjiagtatui. ²⁶ Wi Apajuí Uchijiyaitkun Aentsmagan Akiinawaitag nuna minittakun wajataik, Noé pujai wajukejutú aina numamtuk wajagtinai. ²⁷ Ditak yutain yuwinak, umutan umuinak, nuwentan nuween, aishintan aishin, nawanjin suju waja batsatai tsawan jegamtai, Noé arcanum egkemá waitin epenmatai, nujag abauji ashí nugkan amuak, tikich aents aidaunak ashí tajak utsagkui. ²⁸ Nunisag Lot pujusmataish, yutan yuwinak, umuinak, sumainak, sujuinak, ajakmainak, nuigtú jegá jegam wajainak batsamajakú aina numamtuk wajagtinai, wi juwi minittaku wajataish. ²⁹ Lot yaakat Sodoma pujau jiinki wematai, nayaimpinmaya jii azufrejai pachimjamu, yumi yutak wajukeama imaanik iyaajui, nuniak aents aidaunak ashí apegag ijinawajui. ³⁰ Numamtuk wajaktinai, Wi Apajuí Uchijiyaitkun Aentsmagan Akiinawaitag nuna

minakun wantinbaush.

³¹ “Nu tsawantin aents jega jegamká tuntupé paka inagnakbaunum waka pujaushkam, wajiiji jegá aunak akaikig jumaitsui. Nunisag aja-jin takaak wekagushkam jeenig waketmaitsui.

³² Adeagtajum Lota nuwe wajukauwaita nunú.

³³ Ashí aents ju nugka juwi pujutan wakegak, mina nemagtuk waittan dakitauk uwemtijashtin ainawai. Untsu dita pujutin uyumachuk uwem-jatin ainawai.

³⁴ “Junashkam tajime: Jimag aents kashi makichik pegaknumag tsanias tepaushkam, makichik juwaku, tikichik ukuam atinai. ³⁵ Jimag nuwa shaa dekeenak pujuidaushkam makichik juwaku, tikichik ukuam atinai. ³⁶ Jimag aents ajanum takaak wekagushkam, makichik juwaku, tikichik ukuam atinai.”

³⁷ Juna Jisus tutai:

—Apuh, ¿dusha tuwig dekaskesh nuniktinaita? —tusag iniidau.

Tuinam Jisus:

—Duka tuwí jakau tepettawa, nuanuí chuwagkak tuwakagtinai, —tiuwai.

18

Apu chichaman epegkin nuwa wajejai pachis Jisus augmattsamu

¹ Junashkam Jisus mijamtsuk Apajuinash ausatnume tusa jintinkagtak nagkama augmatu: ² “Makichik yaaktanum pujujakuí apu chichaman epegkin, duka Apajuinash ishamsash

anentaimtuchu, aents aidaunashkam ajantus di-ichu aajakuí. ³ Nunú yaaktanmag makichik nuwa wajeshkam pujau asa utugchat ajusam, apun jegajua: ‘Jujú epegtujuata’, tusa segau. ⁴ Tusa imatjú pujugmash yaitnak dakitú pujau asa nigki anentaimas: ‘Apajuinash ishamsanush anentaimtuchuitjai, aents aidaunashkam ajantusnush diichuitjai; ⁵ nunin akunush, nuwa waje waa waamak tajutak waitkaja junak, yaigkan epegtuatjai dutikam agkan idaitusti,’” tiuwai.

⁶ Jisus juna ti: “Apu chichama epegkin tikima pegkegchaukesh aatus tiuwa nunin aish, ⁷ Apajuish niina nemajin aidau utugchatnum pujusag kashi tsawaishkam untsuamash, ¿yaitsuk idaimainkaih? ¿Nuniachkush dukap asan yaigtajai tumainkaih? ⁸ Dekas tajime: Apajuik dukap atsuk waamak yaimpamainaitjume. Tujash wi Apajuí Uchijiyaitkun Aentsmagan Akiinauwaitag nuna ataktú nugká minaknuk, wajumchik Apajuí anentaimtuidauk batsatai taatnaitjai”, tiuwai.

Fariseo apu kuichkiji atinun yajumnujai pachis Jisus augmattsamu

⁹ Aents aidau dita imá pegkejan takauwa iman anenmamainak, tikich aidaunak dakituidau asagmatai, Jisus jujú augmatbaun pachis: ¹⁰ “Jimag aents Apajuin ausatatus jega Apajuí ememattainum wegajui, makichik fariseo, tikich apú kuichkiji atinun yajumnujai. ¹¹ Nunik fariseo Apajuin aujak wajai wajas: ‘Apawah, see tajame, wika tikich aents aidau kasa, pegkegchau takau, tsanijimta wekaetin, jujú apú kuichkiji atinun yajumin puja juninkesh atsujai. ¹² Wika

aminak makichik tumigtinig jimag tsawantai yujumkan ijagmá pujusan segaugme, kuichkinash mina akijuinakuig diezmó wajaujai', tau. ¹³ Tujash apú kuichkiji atinun yajumnuk nigka ukunum wajas, ni tudaujin anentaimtus wake besemag dekapeak, machikish nayaimpinak pagkaish diitsuk detsepen ijuak: 'Apajuiyah, wika tudauwaitjai, minash wait anenjugta'," tiuwai. ¹⁴ Jisus nuna ti: "Dekas tajime: Apú kuichkiji atinun yajumna duka tudauji tsagkujamu asa shiig aneas waketai, fariseok nunikchauwai. Ashí aents eme anenmamaidau-nak Apajuik imanचाuch diyawai; untsu imanचाuch anenmamaidaun eme anentus diyawai", tiuwai.

Jisus uchi ikautkamu

(Mt. 19.13-15; Mr. 10.13-16)

¹⁵ Nuna tusa ashimkamtai uchi aidaun Jisusan ikautuidau uchin antinjukti tusag. Imatikiagtai ni jintintaiji aidau wainkag uchigtin aidaun jiyaidau. ¹⁶ Tiagtatman Jisus antuk, uchin untsuká:

—Tutsuk idaisatajum, ashí uchi aidauk minai kauntatnume, utugkajum awagkigpajum. Jujú uchi anentaimaina jumamtin aidaunum Apajuik inamjata tawai. ¹⁷ Dekas tajime: Aents aidau, uchi mina anentaimjutuina imanis anentaimjutuinachuk, Apajuí inamak amain ainatsui, — tiuwai.

Apu wiyakuch Jisusan iniasbau

(Mt. 19.16-26; Mr. 10.17-27)

18 Nuna Jisus timatai apu wiyakuch Jisusan iniak:

—Jintinkagtin pegkejah, ¿wajina dutik-mainaitja pujut tuke atina nuna jukitanush? —tau.

19 Tama Jisus ayaak:

—¿Wagka pegkejá tujutme? Makichkish pegkejak atsawai, imá Apajuiya duke pegkejak.

20 Amek dekame chicham umiktin agagbaunum: ‘Tsanijnawaipa, magkagtuawaipa, kasamkaipa, wainkamek tsanumkagtujaipa, amina apa dukujai eme anentsam diiyaakum yaigtá’, tawa nunú.

21 Tama ni chichaak:

—Wika nunak datsauch asanuk ashí umikuitjai.

22 Nuna tutai Jisus antuk ayaak:

—Nuigtú makichik umimain ajutjamui: Ashí amina ajutjamaina duka sujukam ujunauch aina nu susata. Nu dutikawamin nayaimpinum wajigmik ajutjamtinai. Nu dutika ukuakum mina nemagtukta, —tiuwai.

23 Nu tama antuk wake besekuí, shiig wiyakuch asa.

24 Nunik senchi wake besektatman Jisus wainak chichajak:

—Wiyakuch aidauk kakajus Apajuí minash inatjati tusag idaimamainchau ainawai.

25 Camellok aujá jijnish waigká nagkaemamainai, tujash wiyakuch aidauk Apajuí minai inamjati tusag kakajus idaimamainchau ainawai, —tiuwai.

26 Jisus tabaun tikich aidaushkam antukag:

—¿Yaki tujash uwemjaush amainaita? —tuidau.

27 Tiagtai Jisus ayaak:

—Aents aidau dutikmainchauwa nunak Apajuí dutikmainai, —tiuwai.

Mina nemagtuidauk ditanu ukukbaujin nagkaesau jukiagtinai tibau

(Mt. 19.27-30; Mr. 10.28-31)

²⁸ Tutai Pedro ayaak:

—Jutii aidautik iina ajutjamaidauk ukuinaku nemagkamiajime, —tau.

²⁹ Tutai Jisus ayaak:

—Ashí aents Apajuinun takainak yujainak jeen, nuwen, yachin, uchijin, apajin dukujijai ukukiag yujaidauk, ³⁰ jujú nugka juwi pujusash, ni ukukbaujin nagkaesau jukiagtinai, nuigtushkam atak atina duwi pujut tuke atina nui pujusagtin ainawai.

Kompatuma juna Jisus ni mantamnatnuji et-segkamu

(Mt. 20.17-19; Mr. 10.32-34)

³¹ Jisus ni jintintaiji doce aina nuna akanak juki: “Jerusalén jegattag duwi, Apajuí et-segtin aidau, Apajuí Uchijí Aentsmaga Akiin-auk nuniktinai tusa agajajua duka uminkat-tawai. ³² Nuniau asamtai minak aents judi-uchu aidaunum sujutkagtatui, dutijuawagmatai pegkegchau chichagtuinak, dushiktuinak usuk-tiagtatui; ³³ asututnash asutu awa awajtu-inakua mantuawagtatui; tujash dutijuawag-mataish kompatum tsawanta juwi ataktú nantaktatjai”, tau.

³⁴ Tujash ni jintintaiji aidauk shiig dekamain-chau dekapedau, shiig antukchamnum tau asam-tai.

Jisus Jericonmaya aents wainmachu etsagagbau

(Mt. 20.29-34; Mr. 10.46-52)

³⁵ Jisus yaakat Jericó jegattak wegai, aents wainmachu jintá yantamen ekeemas: “Kuichik sujustajum”, tusa sumá eketu. ³⁶ Nuniau kuashat aents nagkaemainak pampainamun antuk inimu:

—Wagka imatainawa, —tusa. ³⁷ Tutai: — Jisus Nazaretnumia wetai imatuinawai —tusag ujaidau. ³⁸ Tiagtai senchi untsamak:

—¡Jisusah, David wegantu uchijiyah, minash wait anenjugta! —wajau.

³⁹ Imattai aents eemak ashinaidau itatkati tusag jiyaidau, tujash nigka nuní senchi untsamak:

—¡David wegantu uchijiyah, minash wait anenjugta! —wajau.

⁴⁰ Wainmachu imatbaun antuk Jisus wajantá:

—Jukijum juwi itagtuatajum, —timatai jukí ejentuntam, ⁴¹ Jisus iniak:

—¿Minash utugtukti tusamea wakegame? —tau.

Tama ni ayaak:

—Apuh, wika niimtijiti tusan wakegajai, —tau.

⁴² Tutai Jisus chichajak:

—¡Wainmakta! Amek minai kajintsá anen-taimam duwi tsagajume, —tiu.

⁴³ Tusá tamawaik wainmakui. Nunik Apajuin emematkamaikia Jisusan nemagkauwai. Tuja ashí aents nuna wainkajushkam Apajuin emematuidau.

19

Jisus Zaqueo jeen webau

¹ Nuna dutika ukuak Jisusak yaakat Jericó wayaa nagkaebau. ² Nuniai Zaqueo apú kuichkiji atinun yajumin aidaun apuji shiig wiyakuch, nunú yaaktanmak pujau. ³ Nuniau asa, Jisusash wajukukita tusa wainkatatus wakegau, nuniy-atak kuashat aents tuwagkagmatai wainmain-chau dekapjau sutajuch asa. ⁴ Nuniak Jisus wetinmanini eemak tupikaki, numi sicómoro wajaunum waka ekeemsau, Jisus nagkaematai wainkatatus. ⁵ Nuniai Jisuschakam nui jegak pagkai diyak:

—Zaqueoh, wamkesam akaikita, amina jeemin minajai, —tiu.

⁶ Tama Zaqueoshkam wamkes akaiki, shiig anentus Jisusan juki niina jeen emauwai. ⁷ Nunitai ashí aents aidau: Aents tudaugtinu jeen kanagtatus wegawai, tusag augmatuidau. ⁸ Tujash Zaqueok niina jeen ejega wajakí, Jisusan:

—Apuh, yamai nagkamsanuk aents ujunauch aina auna jimaituk wajijun akantukan tinamtajai, dutikakun wi kasagkamug aidaunash ipaksumta imajin susatjai, —tau.

⁹ Tutai Jisus ayaak:

—Yamaik ashí amina pataimijai uwemkaugme, Abraham dekaskeapi tiuwa nunisjumek dekaskeapi tujutum nuaduí, dekas Abraham wegantu wajasugme. ¹⁰ Wi Apajuí Uchijiyaitkun Aentsmaga Akiinawaitag nunak,

aents megkaejau aidaun egakan uwemtijatasan tauwaitjai, —tiuwai.

Apu ni inake aidaun kuichik tinamí ukukbau pachisa augmatbau

(Mt. 25.14-30)

¹¹ Jisus Jerusalén jegattak wegau asamtai, aents aidau ni chichaamu antugkaju asag, awi jega apu wajasá waamak inamjashtimpash tusag anentaimaidau asagmatai augmatbaun nagkabau.

¹² Nuniak tau: “Makichik aents ashí aents aidau eme anentsá diitai aajakuí, nunú tikich nugkanum atushat weuwai, nuwi apu emam wakitki niina nugkeen taatatus. ¹³ Eke wetsuk niina inaken diez aina nuna untsuká ikaunmak, makí makichik aentsun, cien tsawantai takasá jumainun kuichkin tinamí chichajak: ‘Jujú kuichkia juwik waji sujajum, kuichik aan kuashat ikaugkatajum, nuniagmin wisha taatjai’, tiuwai. ¹⁴ Nunikunak aents niina kajejuidau asag, dekas apun chichaman awetuinak: ‘Jutiik dakitaji aanú iina apuji atí tusaik’, tiajui.

¹⁵ “Tujash nigka apu adaikam wakitki niina nugkeen tauwai. Nunik niina inake kuichik tinamká ukukbauji aidaun untsukaju, maki makichik aentsush kuichkinash wajupak ikaugkaje tusa dekajuatatus. ¹⁶ Tiajam makichik niiyá eemak jegantá: ‘Apuh, ame kuichik sujusmayum nunak, aan nagkaemasan cien tsawantai takasá jumainun ikauntukjame’, tau. ¹⁷ Tama ni ayaak: ‘Ayú, amek inak pegkejaitme, machik susamuitkum kuashat ikaugkaume, duwi wishakam diez yaakat aina

nuna apuji emattajame.’ ¹⁸ Tusa inagnaig tikitchakam jegantun chichajak: ‘Apuh ame kuichik sujusmayum duka, nuigtú cincoa imajin kawegke.’ ¹⁹ Tutai nunashkam aikasag chichajak: ‘Ameshkam cinco yaakta apuji atá’, tiuwai.

²⁰ “Tuja tikitchakam tajuntun chichajak: ‘Apuh, juuwai kuichkigmek jukita, jaanchi shiig ijian kuitamkamun itajuagme, ²¹ wika amek senchi takamtikagtakum waitkagkagtinaitam nuna dekagjame, nuigtush ame susachu ayatkun atantin, aikasmek ame ajak ajakmachbau aig, juukam yajumin asamin, ishamakun kuichkigminak takamtiksachmajai’, tau. ²² Tama ni ayaak: ‘Amek inak pegkegchauwaitme, amina chichamjuminig bakumattame, wi senchi takamtikagtakun waitkagkagtin, susachu ayatkun tikichnash atantin, aikasnuk wi ajachbaugnak ju waitiatkumesh, ²³ ¿wagka kuichik kawegti tusa egketainum egkeam ukugtukchamiume? Dutikauwaitkuminig wi wakitki taakun kawegkun jumain awajkajai’, tau. ²⁴ Tusa idayak tikich nui ijunun chichajak: ‘Aanú kuichkin takaka nu jujukjum, cien tsawantai takasá jumainun ikaugka nu susatajum.’ ²⁵ Tutai aents chichajuinak: ‘Apuh, niinuk cien tsawantai takasá jumain kuichik ikaugkamuji ajajama’, tuidau. ²⁶ Tujash wi tajime: ‘Ni kuashat ajá duka nuní dukap uwaetuka suwam atinai; untsu piipich ajá duka, nu piipich ajamua duke atantam atinai’, tiu. ²⁷ Nuna tusa idayak aents nui ijunun chichajak: ‘Mina, apu we tusa

dakitjuju aina nunú juwi itanjum kajegtajum’,”
tiuwai.

Jisus Jerusalén apu wajasá wayaamu
(Mt. 21.1-11; Mr. 11.1-11; Jn. 12.12-19)

²⁸ Juna tusa ashimak Jisus nagkaemaki Jerusalén weuwai. ²⁹ Nunik yaakat Betfagé tutai Betaniajai olivosan mujajin tikiju abaunum jegantatak wegag, Jisus ni jintintaijin jimajan awemak:

³⁰ —Wetajum au yaakat jegattak aents batsata awi, awi jegakmajum burro makichik aentskesh entsamchatai jigkaam wajau wainkattagme, nu atia jukim itagtuatajum. ³¹ Nu atiagmin makichik aentskesh: Wagka atiame tujamkujaish: Apu atsumau asamtai juwaji titajum, —tiu.

³² Tiajam Jisusa jintintaiji aidaushkam wegag, jegakmá ni tibaunak imatiksag betek wainkaju.

³³ Nunik jegantun atittaman burrugtin wainak:

—¿Wagka burrush atiagme? —tau.

³⁴ Tama dita aiinak:

—Apu atsumau asamtai juwaji, —tiaju.

³⁵ Dutika jukiag Jisusan itaantaju, dutikawag awantak nugkuagbaujin jukiag burro tuntupen aitkagmatai, Jisus ekeemiu. ³⁶ Nunik Jisus wetai, aents aidauk dita awantak nugkuagbaujin jintanum ainag emaidau. ³⁷ Nunikag olivosan mujají chapaibaunum jegantatak weenak, ashí Jisusa nemajin aidauk shiig dakujusag senchi jikag Apajuin emematuidau, Jisus ashí pegkeg takaamun wainkaju asag, nuninak:

³⁸ —¡Apajuí awemamu iina Apuji mina juuwai iina agkanmitkagmatna duka, nayaimpinum agkan batsata dushakam aantsag agkan batsamiagtatui! —wajaidau.

³⁹ Imatiagtai wajumak fariseo nui pachitkau aidau:

—Jintinkagtinuh, amina nemagtamin aidau imataina nu imattsuk itatjata tusa itatmitkajia, —tuidau.

⁴⁰ Tama Jisus ayaak:

—Dita itatiagtaik kaya aina ju pampaumain ainawai, —tiu.

Jisus Jerusalegnumia aents aidau egaagbau

⁴¹ Jisus Jerusalén tikiju wesa yaaktan wainak, aents nui batsamin aidaun anentaimtus buutu.

⁴² “Jerusalegnumia aidautijum, wi agkanmitkamainaitjim nunú yamaikish dekawagminig, Apajuik agkanmitkagmamainai. Tujash atumek Apajuí awemamuapita tujutchaujum nuaduí, Apajuishkam dekamainchau etamkaje. ⁴³ Nunin asamtai atumnak tsawan tikima ishamain ajut-jamtinaitjume, shiwajum kautjamkag yaaktagminak peegmak apagtamak, ashí yantamnum dakagmajag jetepakgtinai. ⁴⁴ Dutijamainak atumnak ashí amupainak jeemnash ashí tsaikagtinai, imatikamu asa makichik kayakesh tikich kayanum patamiukesh juwakchatnai. Atumek Apajuí atumin tajutjabau aigkish: Iina uwemti-jamjatasampap tae, tusagmek dekaachu asagmin.”

*Jega Apajuí ememattainum aents batsatun
Jisus jiigbau*

(Mt. 21.12-17; Mr. 11.15-19; Jn. 2.13-22)

⁴⁵ Nuna tusa idayak, Jisus wayau jega Apajuí emematku ijuntainum, nunik nui sujak batsamtatman jiijú. ⁴⁶ Dutika chichajuinak:

—Apajuí chichame agagbaunum: ‘Mina jega-juk Apajuí aujku ijuntaiyai’ tawa nuniaig, atum kasá aidau batsantai awasaugme, —tiu.

⁴⁷ Nunik Jisusak jega Apajuí ememattainum kashí kashinig jintinkagtau. Nunitai sacerdote apuji, chicham umiktinun jintinkagtin, nuigtú judío apuji aidaujai wajuk maawajik tusag chichaidau. ⁴⁸ Tujash yupichu dutikmainchau dekapedau, kuashat aents aidaush ni chichagk-agtamunak puyatjus antujuidau asagmatai.

20

Sacerdote apuji aidau Jisusan iniasagbau

(Mt. 21.23-27; Mr. 11.27-33)

¹ Jisus jega Apajuí ememattainum wayaa, yamajam chichama nuna aents aidaun jintintak pujujai, sacerdote apuji aidau, chicham umiktinun jintinkagtin, tikich judío apuji aidaujai utsanawajui. ² Nunikag Jisusan iniinak:

—¿Aminash ya jintinkagtuata tusash awetamae? ¿Yana chichamenia jusha juniame? —tuidau.

³ Tama Jisus ayaak:

—Wishakam iniastajime, aigkatajum: ⁴ ¿Ya Juagnash yamijatjata tusash awemauwaita, Apajuik awemauwait, atsa aents aidauk awemauwait? —tau.

⁵ Tama utujimkag ditak pempeentunikiag chichainak: “Juagnak Apajuí awemauwai, tajinish, ‘¿Tujash wagka dekaskeapi tichau ainagme?’ tujamtata jama. ⁶ Tuja aents awemauwai tajinchakam, ashí ju aents aina juka: Juagak Apajuí etsegtinai, tuidau asag kayai tukugmag mantamain ainawai”, tuidau. ⁷ Nunikag: “Dekatsji” timi tusag Jisusan jegaantag:

—Dekatsji, yatsu Juagnash yamijatjata tusash awemauwait, —tuidau. ⁸ Tiagtai Jisus ayaak:

—Ayú, wisha tichattajime yana chichamenia jutikaja nunak, —tiu.

Takau pegkegchau aidau pachisa augmattsamu

(Mt. 21.33-46; Mr. 12.1-12)

⁹ Junashkam Jisus aents aidaun jintintak augmatbau nagkama tau: “Makichik aents ajajin uvan ajakmakui, dutika wajumak aentsun: ‘Atum ju takastajum, dutikakjum minash sujastajum’, tusa susa ukuak weuwai dukap asan taamig tusa. ¹⁰ Nunik uva juut jegamtai, makichik inaken awemauwai, aents ajanum takaina nui jegamtai, uva neje susam jukí itagtuati tusa, dutikam jegattaman achikag suwi suwimainakua sutsuk wainak awagkiajui. ¹¹ Dutikawagmatai tikich inaken awemauwai, dutikam jegattaman, nunashkam suwimawag

pegkegchau chicha chichajuinakua sutsuk wainak awagkiajui. ¹² Nuna dutikawagmatai ataktushkam kempatuma juna tikich inaken awemauwai, dutikamtaishkam ajanum takaina nu senchi suwimá, upu upujú jiikí ajapawajui.

¹³ “Dutikawagmatai dekas ajagtina nunú chichaak: ‘¿Yamaish utugkatjaki? dekas mina uchig anetaijua juna awetitjai, dutika ai nuna wainkag ajantus diischajaintash’ tiuwai.

¹⁴ Tujash ajanum takainak batsata nu uchi minittaman wainkag: ‘Auwai ju aja juna jukitnuk, dekas maa ajapami, dutika juka iinu emami’, tuidau. ¹⁵ Tusag achiká jukiag ajá ukumtikiag maawajui.

“¿Nunash ajagtina dusha itugmainaita? ¹⁶ Dekas ajagtina nu tajakug nunú ajanum takaina nunak kajeg utsaak, tikich aents aidau susa idaimainai.”

Nuna Jisus tutai antukag:

—¿Duka tuke dutikamak achatnaitji! —tuidau.

¹⁷ Tiagtai Jisus ditan diyaak:

—¿Tujash wajina pachisaya Apajuí chichame agagbauwa nuwish:

‘Aents jegá jegamin aidau kayá ajapawajua nunú, kaya dekas jegá ichichkatin apututia iman wajasé’, tawa nunash tawa?

¹⁸ Aents nu kaya nui iyauk tsainkatnai, tuja kaya aentsnum iyaakug aentsnak tuke yuku ematnai, —tau.

¹⁹ Nuna augmatus tutai antukag: “Jutiinak tujamak tawai”, tusag sacerdote apuji aidau, chicham umiktinun jintinkagtin aidaujai achikta

tuidau. Nuninayatak aents aidaun ishamainak dutikainachu.

Apú kuichkiji pachisa Jisus iniasbau
(Mt. 22.15-22; Mr. 12.13-17)

²⁰ Nuninak aentsun awemajui, iish pegkeg aina duke takainaji tusajum yunumkajum, Jisus makichik iniibau iniastajum, wajintuk tujamit nunikmatai tsanumjuja achiká Romanmaya apunum sujukmi tusag. ²¹ Tiajam ditashkam Jisusan jegajiag:

—Jintinkagtinuh, jutiik dekainaji amek dekas tutupit dekaskea duke jintinkagtame, aentsú imanjinkish etegkeatsme, Apajuí jinti dekaskea duke jintiame. ²² Nuniau asamin amina iniagme: ¿Roma apuji kuichkijish sumainkaih, atsa sumainchaukaih? —tuidau.

²³ Tama Jisus dita anentaibaujin shiig dekaju asa:

—¿Wagka minash tsanujatasagmesh wakej>tagme? ²⁴ Iwaintugkakjua makichik kuichik. ¿Yana niimé dakumkaya daajish agagbauwaita?

Tama dita aainak:

—Anka Roma apuji dakumkamui tuidau.

²⁵ Tiagtai Jisus ayaak:

—Roma apujinua duka nigki susatajum, Apajuinua dushakam Apajuik susatajum, —tiu.

²⁶ Nuna Jisus ashí aents antuinamunum timatai, tsanumjujag achikta tuinakush dutikmainchau diisaju, nuninak nu aaja aikam, ayatak puyatjukag diidau.

Jakau nantagtin pachisa iniimsamu
(Mt. 22.23-33; Mr. 12.18-27)

²⁷ Juna tusa machik aig, wajumak saduceo aidau, jakauk nantagchagtin ainawai tinu asag, Jisusan iniinak:

²⁸ —Jintinkagtinuh, Moisés papí agag ukug-tamkiuwa nui: ‘Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai’, tawai. ²⁹ Tuja nuniamunum, siete yachigbau aajakajui, nuanuiya nagkamchak iwai nuwedauwai, tujash uchinak akiitsuk jakauwai. ³⁰ Nunikmatai tikich yachi jukishkam, uchinak akiitsuk jakauwai. ³¹ Tuja kempatuma nu jukish, uchinak akiitsuk jakauwai, nuni nuninakua siete aajakajua duka, uchinak akiitsuk ashí jinawajui. ³² Nunikagmatai duwi pujus nuwashkam jakauwai. ³³ Siete aajakajua duka ashí nunak nuwatjaju aina duwish ¿dekas yana nuweg atinaita atak nantainamunmash? —tuidau.

³⁴ Tusa tiagtai Jisus ayaak:

—Ju nugka juwig aishmag aidauk nuwenainawai, nuwa aidaushkam aishinainawai, ³⁵ tujash uwemkaju aidau jakau nantajag, tuke pujustin aina nuwig makichkish nuwenbauk atsutnai, ³⁶ jatanash jakachagtinai. Ditak Apajuí aentsji nayaimpinum batsata nuninuk agtinai, ditak jakauwaitak nantakiaju asag Apajuí uchijí agtinai. ³⁷ Jakau aidau nantajagtinun pachis Moisés agajua nunú shiig dekamtijamui, Apajuí numi zarza tutai kegamunum chichaak: ‘Wika Abraham, Isaac, Jacob aina nuna Apajuijiyaitjai’, tiuwai. ³⁸ Wagki ¡Apajuik jakau aina nuna Apajuijinchui, nigka iwaaku aidaun Apajuijiyai!

Apajuí diismak jakau aidaush iwaaku batsa-tainawai.

³⁹ Aatus timatai chicham umiktinun jintink-agtin aidau:

—Jintinkagtinuh yajau tichaume, —tuidau.

⁴⁰ Nuna timatai ataktuk iniaschajui.

Kristush yaá wegantukita tibau

(Mt. 22.41-46; Mr. 12.35-37)

⁴¹ Nuniagtai Jisus ditan iniinak:

—¿Wajuk asamtaiya Kristuk David wegantui tuinawa? ⁴² Davidchakam aikasag Salmosnum agak:

‘Apu mina Apujun chichajak, ekeemsata mina untsujuí;

⁴³ nunikamin wi amina shiwajum aidaunak, ame najamsa ekeemtaigmin ikaunmakmatai duwi ame diisminum’, tiuwai.

⁴⁴ David Apug tujakua nuniaish ¿wajuk asaya David wegantush amainaita? —tau.

Jisus chicham umiktinun jintinkagtin aidau pegkegchauji pachisa tibau

(Mt. 23.1-36; Mr. 12.38-40; Lc. 11.37-54)

⁴⁵ Ashí antú ijunainai niina jintintaiji aidaun chichajak: ⁴⁶ “Atumek kuitamamkatajum, chicham umiktinun jintinkagtin aidau, nugkutai esagman nugkujag yujatan wakejin aina nunin aijum. Ditak aents kuashat ayamunum igkuntuinakush, eme anenjus kumpamjitnume tusa wakegainawai, nunisag jega ijuntainum utsanainakush, dekas apú ekeemtai shiig iwajamu aina imannum ekeemsatatus wakegainawai. Jistatin yuwamunmash,

ekeemtai shiig iwajamunum ekeemsatatus wakegainawai. ⁴⁷ Nuwa waje aidau jeenash atankiag, aents aidau pegkegnap takainawa tujuttinme tusag, Apajuin au aujuinakua ukú yujau aina nunin aigpajum. Nunú aidau imá senchi suwimkan jukiagtin ainawai.”

21

Nuwa waje ujunauch Apajuinu anentag egkeamu

(Mr. 12.41-44)

¹ Jega Apajuí ememattainum wiyakuch aidau, Apajuinu atin kuichik egketainum anentag kuichik egkeamun Jisus wainkau. ² Nuniai makichik nuwa waje shiig ujunauch jimag kuichik cobre najanamun egkettamanash wainkauwai. ³ Nunik:

—Dekas tajime: Jujú nuwa waje shiig ujunauchitak tikich egkeawaja nuna nagkaesau kuichkin egkeae. ⁴ Tikich aidauk kuichik ampinun egkeenawai, tujash jujú nuwa waje ujunauchia juka ni sumasa yumainjinak ashí egkeae, —tiuwai.

Jega Apajuí ememattai tsayam atinai tusa Jisus etsegkamu

(Mt. 24.1-2; Mr. 13.1-2)

⁵ Jisusak tusa chichá wajaig, wajumak aents aidau: Ju jega Apajuí ememattaya juka, kaya shiig pegkeg aidau ekenjá jegamkayap, Apajuinu atí tusag anentag ikaunmakbauwai imatika iwajamuita, tusag augmatuidau. Nuniagtai Jisus chichajak:

⁶ —Atum ju imatika iwaja jegamkamu wainjum juka, makichik kayakesh ekenjamu aina nuwiyag juwakchatnai, ashí tsaikbau atinai, —tiuwai.

Nugka nagkantsaig wantinkagtin aidaun pachis Jisus etsegkamu

(Mt. 24.3-28; Mr. 13.3-23; Lc. 17.22-24)

⁷ Juna Jisus tutai iniinak:

—Jintinkagtinuh, ¿nunash wajutik dutikawagtin ainawa? ¿Nunú aidau uminkatin tsawan jegattak wajataish, waji wantintinaita? nunú ujabatkata, —tuidau.

⁸ Tama ni ayaak: “Kuitamamkatin atajum tsanugmajainum, kuashat aents aidau mina daajun adaimasag: ‘Witjai Kristunuk, tsawantak jegawai’, wajagtinai, imatuinakuish dekaskeapi tusajum antugkaipajum. ⁹ Maaninawai tuinamu antitnaitjume, nuigtú maaniawagtatus pampan-dayamushkam, imaninakuish ishamkatin aigpajum, dekatkauk jujú aidauwá nagkaemagtinai, tujash nagkanmauk waamak achatnai.”

¹⁰ Tusa nuigtushkam: “Nugka yaignum batsamin aidau tikich nuninum batsatujai maaniagtinai, tuja nuninai nugka muunnum batsamin aidaushkam, mai imannumiajaig maaniagtinai.

¹¹ Senchi ugbaush ashí nugkanum atinai, yapag-tash tepeatnai, nuigtú jata aentsun nagkaematug ijinbaush atinai. Nayaimpinmayashkam shiig ishamain wantinjatnai.

¹² “Tujash ju ashí wi tajim nu eke jegatsaig, atumnak achigmakag waitkagmasagtinai. Dutijamainak juga ijuntai aidaunum

awaintamawag, nui jujamkiag aents achiká chimpitainum egkepawag, nui jujamkiag tikich apu aidaunum ejetamawag, nui inagkeapakiag apu dekas nugkanum inamin aidaunmash ejetamawagtinaí, mina nemagtuidau asagmin, mina pachitus titinme tusag. ¹³ Tujash nuna dutijamainakuish, mina pachittsajum tikich ujamainuk yupichu ajutjamiagtinaí. ¹⁴ Nuniakjumesh: ‘Wajintu chichaknuk ayamjumkatja’, tusagmek anentaimigpajum. ¹⁵ Wi atum chichaktinnak dekamtikatnaitjime, dutikamu asagmin atum chichataik, makichkish aigmamainchau dekapiagtinaí. ¹⁶ Tujash atumi apa, yatsum, pataim, kumpajum aina duke sujupakagtinaí, dutijamawagmatai dita maamuk maam agtinaí. ¹⁷ Atum mina nemagtin aidautigminak ashí aents aidau kajegtabiagtinaí. ¹⁸ Imatijamainakush minaig datumtamain ainatsui. ¹⁹ ¡Wajiu wajastajum! Atum mina nemagtukbautak pujautigmek, pujut nagkanchau jukiagtin ainagme.

²⁰ “Suntag aidau Jerusalegkan tentea au wainkugmek, yaaktanak wamkeap tsaikagtatua titin atajum. ²¹ Nuna nuninakuig, atum Judea batsatutigmek mujanum pisagtajum. Jerusalén batsatutigmesh yaaktak jiiinjajum ukuktajum. Tuja aents ajajin takaak batsatushkam, Jerusalén wakitkig waimainchau ainawai. ²² Duka Apa-juí Israelan suwimkan susatnai tusa agagbauwa nunú uminak imanitnai. ²³ Tujash nunú tsawantin nuwa ejamtin, nuigtú uchí amuntsuaku agtina nunak wait anentuinajai.

Wagki Israel nugka juwig shiig senchi waiti-
 amu atinai. Apajuí suwimkan suwau asamtai.
 24 Maaniamunum maamush agtinai, dutikainak
 tikich aidaunak achijag, tikich nugkanum judi-
 uchu aidau batsatbaunum kuashat yajuakagti-
 nai. Dutikawag Jerusalén juwajunak, judiuchu
 aina nu inainak waitkagtin ainawai. Duti du-
 tikainakua Apajuí tibauwa nu jegatai idaisagti-
 nai.

*Apajuí Uchiji Aentsmaga Akiinauwa nu minit-
 nuji tibau*

(Mt. 24.29-44; Mr. 13.24-37)

25 “Nuniamunum etsa, nantu, yaya
 aidaushkam yaunchkesh nunishtaiji nuninamu
 wainnatnai. Ashí nugkanmaya aents aidauk
 senchi ishiamiagtinai, nayants shiig senchi
 tsukatak uutbauji antuinak: Wajukawajik,
 wajagtinai. 26 Imatainak jaka iyauke agtinai,
 nugkanum nagkaemaktinun anentaimtusag
 ishamainak, nayaimpinmaya machikish
 umuchmainchau aidaushkam buchitaidau
 asagmatai. 27 Nunú imaniamunum wi Apajuí
 Uchijiyaitkun Aentsmagan Akiinauwaitag
 nuna, yujagminum pachitkau tsawan wajasan
 mina senchigjai minamun waitkagtinai.
 28 Nunú nagkamna imaninakuig atumek shiig
 aneastajum: Waamkeap waitiag nuna Apajuí
 agkanmitkagmattaji, tusajum.”

Numi higuera pachis Jisus augmattsamu

(Mt. 24.32-35; Mr. 13.28-31)

29 Junashkam Jisus augmatak tau: “Diistajum
 numi higuera, nuniachkugmesh tikich numi esat

dekatai aina dukesh. ³⁰ Atumek nuna duke betenkainakuig: Waamkeap esat nagkamnat-tawa, tusajum dekau ainagme. ³¹ Nunisjumek atumshakam ashí wi taja nunú imanisag uminag wegau wainkugmek: Apajuí ju nugka juwi inam-jatnuk namput wajatsuapi, titin atajum.

³² “Dekas tajime: Wi Jerusalegkan pachisan ashí tijim duka, yamai aents batsata jusha ashí jinuinatsaig uminkatnai. ³³ Nayaimpik nugka-jaig megkaejatnai, tujash mina chichamjuk umintsukek juwakchatnai.

Umintsajum dakamsatajum tibau

³⁴ “Shiig kuitamamkajum umintsajum dakamsatajum, Apajuiyai anentaimtan datumtamain, nampet, ju nugka juwiya imá senchi anentaimtut aina nu tupanajum batsatkujum, wi pachiachmau minakui ishamjukaijum. ³⁵ Ashí aents aidauk chinamunum kuntin dekeemama numamtuk wajakagtinaí. ³⁶ Atumek shiig umintsajum ashí tsawantai Apajuik aujú puju-tajum, nunú ishamain nagkaemagtina nuanuish waitkats, wi Apajuí Uchijiyaitkun Aentsmagan Akiinawaitag nuna aents aidaun suwimkan susatasan minakuish, ajankas igkunkamnujum.”

³⁷ Jisusak tsawai jega Apajuí ememattainum jintinkagtua, kiitaik Olivosa mujajin weejakuí. ³⁸ Nuniau asamtai kashikmasag jega Apajuí ememattainum aents aidauk kauntsagké aidau, jintinkagtamujin antukagtatus.

22

Jisus maami tusa chicham umigkamu
(Mt. 26.1-5; Mr. 14.1-2; Jn. 11.45-57)

¹ Jista pag levadurajai pachimtsuk inajua yutai Pascua tutai jegattak wajai, ² sacerdote apuji aidau, chicham umiktinun jintinkagtin aidaujai, aentsun ishamaidau asag, Jisus wajuk maawajik tusag chichaidau.

³ Nuniamunum Jisusa jintintaiji doce aina nuwiya Judas, Iscariote tuuta awagmatia nuna iwanch egkemtuau, ⁴ dutikam sacerdote apuji aidaujai, nuigtú jega Apajuí ememattain kuitamin aidaujai: Wajuk Jisus achiká sujumainaita, nuna pachisag chichasaju. ⁵ Nuna chichas umikag shiig aneenak: Kuichik akikmí, tusag ame dutikata akiktajame, tiajui. ⁶ Tama Judaschakam ayú tusa wajuk Jisusan aents atsamunum sujukajak tusa egau.

Pascuatin yuwatin umikbau
(Mt. 26.17-19; Mr. 14.12-16)

⁷ Pascuatin, pag levaduragtuchu yuaku uwig aishmag tsakat maa yutai jegau asamtai; ⁸ Jisus, Pedron Juagjai awemak:

—Wetajum, nunikjum Pascuatin yuwatin umiktajum, —tiuwai.

⁹ Tuinam dita aiinak:

—¿Tuwí umiktí tusamea wakegame? —tuidau.

¹⁰ Tiagtai Jisus ayaak:

—Yaakat wayamunum makichik aishmag yumí aimak waketu wainkattagme, nunú pataetuktajum, ¹¹ nunikjum jeentin jeen wayaakui: ‘Jintinkagtin chichagtamak:

Agkantash awash wi mina jintintaig aidaujai Pascuatin yumainush, tujamae' titajum, ¹² tajumin ni inaktugmastatui yakí tesamu muun shiig umikbaun, nuanuí umiktajum, —tiu.

¹³ Tusa tiajam wegag Jisus tibaunak imatiksag wainkaju. Nunikag nui Pascuatin yuwatnunak umikajui.

Jisus inagnaku Pascuatin yuwamu

(Mt. 26.20-25; Mr. 14.17-21)

¹⁴ Yujumak yuta jegantai, Jisus mina chichameg etsegtugkatajum tusa etejamu aina nujai mesanum jegantag pekaamsajui. ¹⁵ Nunik chichaak:

—Senchi wakemajai, eke mantuinatsaig ju Pascuan atumjai ijunjan yuwatasan. ¹⁶ Dekas tajime: Atumjaig ataktuk jutikanuk Pascuanak yuwashtinaitjai; atak Apajuí inabauji jegatna duwi yuwatin asan, —tiuwai.

¹⁷ Nuna tusa idayak umutai copanum ekeem-tatman juki, Apajuin see tusa jintintaijin suwak:

—Ju copa juwiya ashí atum aidautijum uwag-tajum, ¹⁸ dekas tajime: Ataktuk jutikanuk uva yumijinak uwagchatnaitjai, atak Apajuí inabauji jegatna duwi uwagtin asan, tiuwai.

Jisus, mina anentaimjuttsajum yuwakjumek juní dutikatajum tibau

(Mt. 26.26-29; Mr. 14.22-25; 1 Co. 11.23-26)

¹⁹ Tusa idayak pagkan juki Apajuin see ti puuká, jintintaiji aidaun susa chichajak:

—Jujú pagka juka mina iyashig atumní man-tamnatta nuna iwainawai, juka tuke jutiksag-meké atin atajum mina anentaimjutkujum.

²⁰ Tusa ashí yuwawagmatai umutai copanum ekeematman juki, nunashkam aikasag Apajin see ti:

—Ju vino copanum awa juka, mina Apag yamagman mina numpajuí atum uwemkatnun anagtamawajua nunú uminkatnun iwainawai:

²¹ Mina sujutkatta duka ju mesa juwig wijai eke-tui. ²² Tuja wi Apajuí Uchijiyaitkun Aentsmaga Akiinawaitag nuna, nuniktinai tusa agajajua nuna umiktasan wejajai, tujash ;mina sujutkatta nuna imá senchi wait anentajai! —tau.

²³ Jisus tutai ni jintintaiji aidau pempeentu-nikiag iniinidau, yaki dutikati tusag.

Yaki dekas eme anentaish atinaita tiagbau

(Mt. 19.28; 20.25-28; 23.11; Mr. 9.34-35; 10.42-45; Lc. 9.46; Jn. 13.12-15)

²⁴ Nuna tusag idayinak: Jutii ainag juwiyash yaki atakesh imá wagakush atinaita, tusag ditak pempeentunikiag pampandayidau.

²⁵ Tudayagtai Jisus chichajak: “Apu judiuchu aidauk aentsnak ditanua nunin emak inainawai, nuna dutikaidauk shiig takaawai tama au ainawai, ²⁶ tujash atumek nuninuk amaitsugme.

Atum ainajum anuiya eme anentai atag takug, uchi eme anentsá diishtaya nunin anenmamain ainawai. Inamna dushakam aantsag tikichin takagna nunin amainai. ²⁷ ¿Atumesh wajuk

anentaimjume, mesanum eketa dukaih eme anentsá diitaish, atsa ajaama dukaih? Mesanum eketa nunuwai. Tujash wika yujumkan ajamauwa numamtin wajasan, wi atumin ajampeajime.

²⁸ “Atumek wi shiig utugchatnum wekaekuish wijaig ijuntsajum yujasú asagmin, ²⁹ wi atumnak apu emaktinaitjime, mina Apag mina apu etiuwa dutiksanuk, ³⁰ dutikamu asajum wi inamtinaitag nuanuí atumesh mina mesajuí wijai yuwatnaitjume, nuniakjum Israelan uchijí doce aajakajua nuanuiya wegantu aidau inakjum, ekeemtai aidaunum ekeemsatnaitjume.”

Jisus Pedron ugtuktatme tusa ujakbau
(Mt. 26.30-35; Mr. 14.26-31; Jn. 13.36-38)

³¹ Jisus junashkam Pedron tiuwai:

—Simón, iwanch Apajuin segae, trigo pegatiama numamtuk atumin pegkegchaunum dekapjamsatatus; ³² tujash wishakam aminak segatmagne, minai kajintsá anentaibaujum mijakaim tusan, ame mina waintsamjai tujutmesh, ataktú minai anentaimjam tikich aidaush anentai ichichtugminum tau asan. ³³ Tama ni ayaak:

—Apuh, wika amina achigmakag egkepainakuish, nuniachkush mantamainakuish amijai jakatasan umintsan wekaejai, —tau.

³⁴ Tutai Jisus ayaak:

—Pedro, yamai kashia juwik atash eke shinatsaig, Jisusnak waintsamjai tusam kempatumá ugtuktatme, —tiu.

Waitiakuish kuitamamain tibau

³⁵ Tusa idayak:

—Wi atumin chichagkagtuktajum tusan ishimkun, waji egkea jutaigmekesh, kuichik, sapat aidaukesh jukigpajum tusan ishiakuitjim duwish, ¿waji atsumjauwaitjume?

Tama dita ainak:

—Apuh atsumjachamiaji, —tuidau.

³⁶ Tiagtai Jisus ayaak:

—Tujash yamaik waji egkea jutaigmeshkam jukitajum, espadajum atsugtamkuig, awantak pataká nugkutajum sujakum makichik sumak-tajum. ³⁷ Yamaik, duwik Apajuin etsegtin aidau mina pachitus againak: ‘Aents pegkegchaujai betek maam atinai’, tibauwa nu minai uminkat-tawai, —tau.

³⁸ Tutai dita ainak:

—Apuh, juwi jimag espada ajutjamui, —tiajui.

Tiagtai Jisuschakam:

—Maake idaisatajum, —tiuwai.

Jisus Getsemaní pujusá Apajuí ausamu

(Mt. 26.36-46; Mr. 14.32-42)

³⁹ Tusa jinki weuwai Olivosan mujajin nui tuke weu asa, nunitai jintintaiji aidaushkam ashinkajui. ⁴⁰ Nuanuí wakag ni jintintaiji aidaun chichajak:

—Juwi pujusjum Apajuí aujú pujutajum, iwanch pegkegchau takastinme tusa dekapjamsainum.

⁴¹ Tusa ukuak nigka kanakí machik kuwaesag tikishmag pujus Apajuin aujak: ⁴² “Apawah, amesh wakegakmek wi waitmainaitag nu agkan-mitkajuata; tujash wi wakegamuk ahati, ame wakegamu ati”, tiuwai.

⁴³ Tusa aujai Apajuí aentsji nayaimpinmaya wantintuku Jisusan anentain ichichtugtatus.

⁴⁴ Jisus ni waittsatnujin shiig senchi anentaimtus, Apajuin senchi aujak numpan sekijai segaju, nunik nugká kitaidau.

⁴⁵ Jisus Apajuí augbaun inagnak jintintaiji batsakbaun jegantun diikmá, wake besemag dekapenak ane anentaimainakua kajig batsatun wainak:

⁴⁶ —¿Wagka kajiish batsatjume? Nantakjum Apajuí ausatajum, iwanch pegkegchaun takastinme tusa dekapjamsainum, —tiuwai.

Jisus achiká jukimu

(Mt. 26.47-56; Mr. 14.43-52; Jn. 18.2-11)

⁴⁷ Tusa Jisus eke chichaak wajai, ni jintintaiji doce aina nuwiya Judas daagtin kuashat aentsun saasá ni emjuk tajuntau, Jisusan kugkuastatus.

⁴⁸ Dutikam Jisus ayaak:

—Judasah, Apajuin Uchijí Aentsmaga Akiinawk kugkuasmeap sujame, —tiuwai.

⁴⁹ Jisusan achikagtatus nudiagtai, niina jintintaiji aidau:

—¿Apuh, maaniattajik? —tuidau.

⁵⁰ Tusa tuinai, tikich nui ijuna nuwiya espada-jin ukuini juwakug, dekas sumo sacerdote apuji inaken kuwishí untsujinian asankau. ⁵¹ Dutiktai Jisus:

—Maake, aikatsuk idaisatajum.

Tusa kuwishí asankamun juki ataktú anujtuk pegkeg awajtusui. ⁵² Nuna dutika sacerdote apuji, jega Apajuí ememattain kuitamin aidaujai niina achiktatus kauntau aidaun chichajak:

—¿Atumek kasa achiktasa utugmaina imatijuagmeap, espadak tinamdaekajum, numi aidauk takuinasuajum minitjuinagme? ⁵³ Wi kashí kashinig jega Apajuí ememattainum atumjai ijunnuweg duwikish jutikagmek

achigchau agmaugme. Tujash yamaik atum mina jutijuatnun iwanch atumin inapakui jutijagme, —tiuwai.

Pedro Jisusnak wainchaujai tusa ukbau

(Mt. 26.57-58; Mr. 14.53-54; Jn. 18.12-18, 25-27)

⁵⁴ Tuja Pedroshkam ikaag pataetus wega wegakua sumo sacerdote jeen jegantú, ⁵⁵ nunik jegaa jii ikapajag anamainak batsatbaunum, niishkam nui ditajai anamak ekeemsau. ⁵⁶ Nunittaman makichik nuwa, apú inake tanta diikmá wainak dii wajatu, nunik:

—Jushakam Jisusjai wekaemajama, —tau.

⁵⁷ Tama Pedro chichaak:

—Nuwah, wika wainchaujai aunak, —tau.

⁵⁸ Nuna tusa machik eketaig, tikitchakam aikasag:

—Amesh Jisusa jintintaijitamjama, —tau.

Tama Pedro ayaak:

—Atsa, wichauwaitjai, —tau.

⁵⁹ Tutai idaisajam makichik hora tumain ekeemtatman tikitchakam aikasag:

—Dekaskenum jushakam Jisusa jintintaiya jama, Galileanmaya asa, —tuidau.

⁶⁰ Imatjuinam Pedroshkam:

—Wika atum tajum nunak dekatsjai.

Tusa chichaak wajai, atash shinukuí.

⁶¹ Nunitai Jisuschakam ayampá Pedron diisú, dutikam Pedroshkam Jisus chichajak: “Atash eke shinatsaig kampakumá ugtuktinaitme”, tibaun adeaju. ⁶² Nunik Pedro agaa jiiinki senchi wake besemag dekapeg kajegmamak buutiuiwai.

*Apu aidau Jisus maatajum tusa inamjamu
(Mt. 26.59-68; Mr. 14.5-65; Jn. 18.19-24)*

⁶³ Jisus diyaku atajum tibau aidau dushikinak awatuidau. ⁶⁴ Dutikainak jiin epetkag chichajuinak:

—¿Dekakia ya awatamni? —tuidau.

⁶⁵ Tusag kuashat pegkegchaun chichajuinak waitkaidau.

⁶⁶ Imá imatikainakua tsawajag, judío apuji aidau, sacerdote apuji aidau, chicham umiktinun jintinkagtin aidaujai ijunjag Jisusan jukiag, chichaman inagnau batsatbaunum ejegawag-matai, iniinak:

⁶⁷ —¿Ame dekas Kristukaitam? tukagtita, —tuidau.

Tama Jisus ayaak:

—Wi Kristuitjai takuish, dekaskeapi tujutchattagme, ⁶⁸ wi atumin iniamash aigmaitsugme, nuigtush akupjumaitsugme.

⁶⁹ Tujash yamaya juwi nagkamsanuk wi Apajuí Uchijiyaitkun Aentsmagan Akiinauwaitag nunak, Apajuí ashí senchigtina nuna untsujin ekeemsattajai, —tiuwai.

⁷⁰ Tutai pampanjag iniinak:

—¿Untsu amekaitam Apajuí Uchijim?

Tuinam Jisus ayaak:

—Dekaske atum tujutjum nuuwaitjai, —tiuwai.

⁷¹ Nuna timatai:

—¿Nuigtush ya etsegtukti tusaya dakainaji? ii dekas ni chichaamu antugkagjama, —tuidau.

23

Jisus Pilatuwai ejegamu

(Mt. 27.1-2, 11-14; Mr. 15.1-5; Jn. 18.28-38)

¹ Chicham inagnatainum aents ijunag batsatuk ashí wajajag, Jisusan jukiag Romanmaya apu Pilato pujamunum ejegawaju. ² Dutikawag Jisusa tsanumjuinak:

—Jujú aents jutii nugken chichaman tsuwapak wekagas, witjai Kristunuk, Roma apujish kuichkik sumaitsui, tu wekagu asamtai juwi itaaji, —tuidau.

³ Tiagtai Pilato iniak:

—¿Amekaitam judío aidaun apujim?

Tama Jisus ayaak:

—Ame tujutam duka dekaske, —tau.

⁴ Timatai sacerdote apuji, nuigtú tikich aents tuwakú aina nuna Pilato chichajak:

—Wika jujú aentsnak makichkish pegkegchau dutikamunum bakumamainnak dekagsujai, —tau.

⁵ Tutai nuní nagkaemasag:

—Tujash aanú aents aidaun jintintak dapamkagtú wekaenuwe. Nuniak Galilea nagkamas jintí jintinkagtakua juwish Judeanmash dutiksag dapamkagtú wekaewai, —awajuidau.

Jisus apu Herodesai ejegamu

⁶ Jisus Galilea nagkama jintinkagtinuwe tabaun Pilato antuk:

—¿Dekas jujú Galileanmayachukaih? —tusa iniimu.

⁷ Tutai:

—Awiayai, —tuidau, Apu Herodesa inam-taijinia asamtai. Nuna tiagtai dekaa, Pilato

Jisusan Herodesai awemauwai, niishkam nu tsawantin Jerusalén taa pujau asamtai. ⁸ Dutika ejetim Herodes Jisusan wainak shiig aneasu, kuashat tsawantai: Itugsanuk wisha aents dutikmainchau ni iwainag takaamunash wainkag, tusa wakegá pujú asa, ⁹ kuashat iniasu tujash nigka aikchauwai. ¹⁰ Nunitai nui sacerdote apuji, chicham umiktinun jintinkagtin aidaujai ijunaidau, wainak senchi tsanumjuidau. ¹¹ Imatiagtai Herodeschakam ni suntaji aidaujai, Jisusan aentschau chichajus dushikinak, jaanch pegkeg apu nugkutai aina ibaun anugkug, ataktú Pilato pujamunum awebau. ¹² Nuna dutikainak Herodesak Pilatojaig kumpamdayawajui shiwag pujuwaitak.

¹³ Ataktú itawagmatai, Pilato sacerdote apuji aidaun, tikich apu aidaun, ashí aents aidaujai ijumjau. ¹⁴ Dutika chichajak:

—Atum jujú aentsun dapampawai tusajum itagtuawagmin atumesh antagmin, atum pegkegchau tajum nuna iniasan dekajuatakamanush dekajuachmajai. ¹⁵ Nunisag Herodeschakam dekajuachu asa awagkimtai juwi itawaje. Nuniau asamtai, wika ni mantamnati tusanuk tumaitsujai; ¹⁶ ayatak asutiatajum tusan akupkatjai, —tiu.

¹⁷ Nunak ashí mijantin jista Pascua inagkeamunum, aents achikam egketaina nuwiya makichik jiikí idaitai asamtai tiuwai.

¹⁸ Tutai aents nui tuwak ijunuk ashí pampanjag:

—¡Waagkamek ancha akupkatame! ¡Dekas Barrabás akupkata! —awajuidau.

¹⁹ Duka Jerusalegnum Romanmaya apu dakituinaku pampandayamunum aentsú maú asantai achikam egketu. ²⁰ Tiagtaishkam Pilatok Jisusan akupkata tau asa, ataktú awentsag ditan chichajak:

—Dekas Jisusan akupkatjai, —tau.

²¹ Pilato tutai nuní nagkaemasag senchi untsumkag:

—¡Achigtá! ¡Achigtá! —awajuidau.

²² Imatjiagtai kempatuma juwishkam Pilato chichajak:

—¿Tujash wají pegkegchauna takasé jusha? wika ni pegkegchau takasbaunum bakumaku mantamnamainjinak dekagchau asan, ayatak asutiawagmatai jiktajai, —tau.

²³ Tutaishkam nuní senchi untsumkag, achinjati wajainak Pilatunak wagagkiaju. ²⁴ Imatiagtai Pilatushkam:

—Dita tuina dutiksag uminkati, —tiuwai.

²⁵ Dutikak Barrabás, Jerusalegnum Romanmaya apu dakituinaku pampandayamunum aentsú maú asantai achikam egkematman, nunú jinkiti tuidau asagmatai nuna jiyaak, Jisusnak dita tuina dutiksag umiktinme tusa sujuk idaisauwai.

Jisus achigbau

(Mt. 27.32-44; Mr. 15.21-32; Jn. 19.17-27)

²⁶ Tima Jisusan achigtatus juki emasag, yaakat Cirenemaya Simón daagtin ajajinia minittaman, Jisus achigtin numi yapajia achiamun

ayankaju. Dutikam Jisus eemak wetai, ukuunum yanas wegau.

²⁷ Jisusan kuashat aents nemajus ashinainamunum, nuwa aidaushkam imanisag ukunum saegas, untsu untsumas buu buutuinakua ashinaidau. ²⁸ Imatiagtai Jisus nuwa aidaun ayampatua:

—Jerusalegnumia nuwa aidauh, minak eganjaigpajum, atumek egaamakjum uchijum anentaimtusjumesh buuttajum. ²⁹ Tsawan jegagtamiagtinai, nunikmatai: ‘Uchigtin aidautigmek uchigtuchu wajasjum, tikich nuwa kaga uchigtuchu muntsujinash amuntsuachu aidauk, yajau aneas batsatainatsuapita’, wajatin ainagme.

³⁰ Imanik senchi waituinak mujá pagkajiag: ‘¡Mujah, yumpunkum ijijatuakia!’ awajiagtinai.

³¹ Wi tudau takaschau aig, imatijuawag waitkajuinaish, ¿Apajuish wagkag tudau aidaunash waitkaschati? —tiuwai.

³² Jisusan jukiag, nuigtú jimag aents magkagtin aidaunashkam achijagtatus jukiag emaidau.

³³ Dutikawag nain “buuk sakajua” nuninai tuntainum egegawag, Jisusan achijag, magkagtin aidaunashkam achijajui, dutikawag makichik untsugnumanini awajuinak tikichnak menajinini awajawajui. ³⁴ Dutikam Jisus chichaak: “Apawah, tsagkujata dekainachu asag, minak jutjuinawai”, tau.

Nuniai suntag aidauk, yana kayajig jinkit nunú Jisusa jaanchjinak jukiti tusag wasugkamaidau.

³⁵ Nuniamunum aents aidauk Jisusan dii ijuntuinai, apu aidau dushikinak:

—Tikichnak yajau uwemtikchauwe, yamai ni-
ishkam dekas Kristu, Apajuí etegjamuitkug nigki
akaiki uwemjati, —tuidau.

³⁶ Suntag aidaushkam dutiksag dushikinak
vino chujuinun jukiag aagtatus jegantag,
³⁷ chichajuinak:

—Ame dekas judío apujiyaitkumek, akaikim
uwemjakia, —awajuidau.

³⁸ Tuja ni chaikenchakam griego, latín, hebreo
chicham aidauwai: “Juuwai judío aidau apujig”,
tusa agatug adujtukajui.

Magkagtin aidau chichakbau
(Mt. 27.45-56; Jn. 19.28-30)

³⁹ Jimag magkagtin achijam deta nuwiya ma-
kichik Jisusan pegkegchau chichajak:

—Ame dekas Kristuitkumek, aaní nematsuk
amea akaikim, jutiishkam uwemtikagtujia, —
tau.

⁴⁰ Tutai nui tikich detau kumpajin aiká:

—¿Amek machikish Apajuik ishamatsmek, ni-
ijai betek achinjam nemasmesh? ⁴¹ Jutiik
pegkegchau takasbaunum dekaskenum waitiaji;
tujash juka pegkegchau takasbaujig shiig atsujui,
—tau.

⁴² Tusa Jisusan ayampattsag:

—Jisusah, minash ame apu wajasam inamjat-
tam nuniakmesh kajimatjukipa, —tiuwai.

⁴³ Tutai Jisus ayaak:

—Dekas tajame, yamaya juwik amek wijai
nayaimpinum pujuttame, —tiuwai.

Jisus jakamu
(Mt. 27.45-56; Mr. 15.33-41; Jn. 19.28-30)

⁴⁴ Etsa tutupit wajasú ai nagkamas ashí nugkanum suwe wajas, etsa dukap tegau aishkam imanisag asauwai. ⁴⁵ Nunik suwe wajas ai, jega Apajuí ememattainum jaanch ejaamu auk yakiin nagkamnas ichiinak jimaituk kanakuí. ⁴⁶ Nuniai Jisus senchi untsamak chichaak:

—Apawah, amina uwegmin mina wakanjunak idaijai, —tusa jakauwai.

⁴⁷ Nunik jakamtai, nuigtú kuashat nagkaemajun capitán wainak, Apajuin emematak:

—Dekas ju aentsua juka shiig pegkejai, —tau.

⁴⁸ Aents nui ijunas dii ijuntuidaushkam Jisus nunik jakamtai wainkag, wake besemag dekape-nak waketuinak, detsepenak awatkiag weedau.

⁴⁹ Nuninai ashí Jisusa waintaiji aidauk, nuwa Galilea nagkamas, Jisusa saetusag yujajakú aidaushkam, ikaag ijunas Jisusan dii ijuntuidau.

Jisus ukusbau

(*Mt. 27.57-61; Mr. 15.42-47; Jn. 19.38-42*)

⁵⁰ Judeanum yaakat Arimatea tutai awa nuwiya José daagtin, niishkam apu chichaman inagdau aina nuwiya pegkeg aidaunak takaak pujau. ⁵¹ Nigka Apajuí minash inatjati tusa wakeyin asa, tikich aidau Jisusak mantamnati tiagtaish dakitjauwai. ⁵² Nuniku asa Pilatun jegají, Jisusa iyashin segauwai. ⁵³ Dutika, numi yapajiamunum Jisus nemattaman akakí sávana pujuí pempeag, kaya waa muun tai umikbau, makichik aentskesh ukuschamunum egkeauwai.

⁵⁴ Nunú tsawantak, tsawan ayamtai atin asamtai, ashí umintai aajakuí.

⁵⁵ Nuwa Galilea nagkamas Jisusa nemajus yujasaju aidaushkam, José wetai pataetukaju, nunik wainkaju Jisusan wajuk ukusaje nuna, ⁵⁶ nunik waketug jegá kaunkag, Jisusa iyashí ukatkatnun shiig pegkeg kugkuin aidaun, nuigtú yakagtinnash najanawaju, dutikawag tsawan ayamtai tsawaju asamtai, ayamjaju chicham umiktinnum tawa nunisag.

24

Jisus nantakbau

(Mt. 28.1-10; Mr. 16.1-8; Jn. 20.1-10)

¹ Tumig tsawagmatai shiig kashikmasag nuwa aidau kugkuin najanamujin jukiag, Jisus ukusbaunum wegaju. ² Nunik jegakmag wainkaju kaya muuntai epenbauk ekemak atatman. ³ Dutika wainkag utuawaju, tujash Jisusa iyashinak wainkachajui. ⁴ Nunikag puyatkag ijunai, jimag aents winchamtinun nugkuaju ditai ayaumas wajaantaju. ⁵ Nuna wainkag senchi ishamainak, nugká tsuntsumawag ijuntsamtai chichajak:

—¿Wagka iwaaku pujaush jakau ukutainmash egagme? ⁶ Juwig atsawai nigka nantakne. Adeagtajum ni Galilea pujus ⁷ chichaak: ‘Wi Apajuí Uchijiyaitkun Aentsmagan Akiinawaitag junak, achujuk aents tudaugtin aidaunum sutjukagmatai mantuawagmataish, kampakatumchik tsawantai nantaktinaitjai’, —tiuwa nunú.

⁸ Tama ditashkam yaunchuk, Jisus nunik-tinaitjai tibauwa nuna adeajaju. ⁹ Nunik ukusmaunmaya waketug jegawag, ashí dita

wainkamujinak Jisusa jintintaiji once juwakajua nuna ujakaju, aikasag ashí tikich aidau-nashkam. ¹⁰ Duka ju aajakajui: María Magdalan-maya, Juana, tikich María Jacobo dukujiya nunú, nuigtú tikich nuwa aidaujai, Jisusa jintintaiji aidaunak ujakajui. ¹¹ Nuwa tusa etsejiagtaish, wainak tu yujatsuash tusag, ditak dekaskeapi tichajui.

¹² Nuniagtai Pedrok jinkug tupi tupikakua Jisus ukusbaunum jegantá, tekená diikmá imá sabananak winkau, nunik wajukamki tusa ane anentaimkawa jegá wakitkiu.

Emaús wetatman wantintukbau
(Mr. 16.12-13)

¹³ Nunú tsawantinig Jisusa jintintaiji jimag, yaakat yaijuch Emaús tutai, Jerusalén juwaki once kilómetro abaunum jegatatus wegaju.

¹⁴ Nunik weenak ashí Jisus dutikamun pachisag augmatuidau. ¹⁵ Nuna tuinak ditak tudayinai, Jisuschakam amainag ditajai ijunag ashinu.

¹⁶ Tujash ditak, Jisusapita tuinachu asag pachiakats ashinaidau. ¹⁷ Nuniagtai:

—¿Jintá wesagmesh, waji augmatkugmea wake besemjash ashinjume? —tau.

¹⁸ Tutai Cleofas daagtin ayaak:

—¿Amesh Jerusalegnumiyaitkumek, waji nagkaemaki dusha dekatsum? —tau.

¹⁹ Tama Jisus ayaak:

—¿Wajuk awa? —tau.

Tutai:

—Jisus Nazarenumia Apajuí etsegtin,
chichamesh senchigtin, Apajuí senchijin

wainchatai aidaunash iwainag, ashí aents aidaush wainainamunum takauwe, nuna ²⁰ sacerdote apuji aidau, tikich judiuti apuji aidaujai mantamnati tusag, Romanmaya aidaunum sujua idaisagmae, dutikamtai numinum achijag maawagmae. ²¹ Tujash jutiik: Niimpap Apu wajas, Israel aents aidautinak ashí iina shiwaji aidaunmash agkanmitkagmattaji, tusa dakauji. Nuna dutikawaja duka kampfatum tsawan nagkaemawai. ²² Nuniamunum nuwa jutijai yujau aidau kashikmas Jisus ukusbaunum wegaju, anentai jegagmainchaun ²³ Jisusa iyashin waitkachag, nayaimpinmaya aents wainka ajin: Jisusak iwaaku pujawai, tujamaji tusag wakitki kaunawag ujakagmae. ²⁴ Tiagtai jutijai ijunag yujau aina nuwiya Jisus ukusbaunum wejiag, nuwa tiagbaunak dutiksag Jisusa iyashinak wainkachag waketug kaunkagmae, —tuidau.

²⁵ Tiagtai Jisus ayaak:

—¿Wagka shiig anentaimtugjum dekaskeapi tumainchaush dekapenagme, yaunchuk Apajuí etsegtin aidau ashí juniktinun pachis agajajua dusha? ²⁶ ¿Kristuk imatika waitkasa maam, ni inamtaijinig wayatnai tusa agagbauchukaih?

²⁷ Tusa, Apajuí chichamen agagbauwa nuna, Moisés agagbauwa nui nagkamas, ashí Apajuí etsegtin aidau agajajua nuna ujakaju.

²⁸ Nunik yaakat yaijuch Emaús jegamunum, Jisusak nagkaemaki wegau, nuní atushat wegau wajukmaina numamtuk. ²⁹ Nunitai:

—Dekas juwi jutijai juwakta, kiyawai, —tuidau.

Tima nui ditajai juwakui. ³⁰ Nunik yujumkan yuwatatus mesanum jegantag pekaam-samunum, Jisus pagkan juki Apajuin see tusa puuká susaju. ³¹ Nunitai: Dekas Jisusapita tusag dekaawaju, nuninai ditajai eketu megkaekau.

³² Nunikmatai ditak pempeentunikiag:

—¿Wagkaik jintá minis Apajuí chichameg nuní awai tusa ujapakui, shiig aneasua minimag duwish anentaimjaish diischamji? —tadayinau.

³³ Tamawaik Jerusalén waketug, Jisus chicham etsegekata tusa ishiaktin once aina nu, nuigtú tikich aidaujai ijunag batsatbaunum jegawaju.

³⁴ Nunik jegawagmatai:

—Dekas Jisusak nantakne, nunik Simogkan wantintuke, —tusag ujaidau.

³⁵ Tama ditashkam:

—Iish jintá wesá Jisus wainkamji, nunika jegá jegaa ajin, pagkan puuk amasmatai, dekas Jisusapi tusa dekaamji, —tusag etsejuidau.

Jisus chicham etsegtugkatajum tusa ishiaktinji etegjamu akatjamu

(Mt. 28.16-20; Mr. 16.14-18; Jn. 20.19-23; Tak. 1.4-9)

³⁶ Nuna pachisag chichainak batsatai, Jisus ejapeen wajantá ditan kumpamak:

—Apajuí atumnash shiig agkan anentaimsa pujutan amastinme, —tiuwai.

³⁷ Tama ditak senchi ishamkaju, wakan-chawashit tusag. ³⁸ Imaniagtai Jisus chichajak:

—¿Wagka minash wakanchawashit tusagmesh ishamjagme? ¿Wagka utujim-sagmesh anentaimjutjume? ³⁹ Tusa:

—Wika Jisusaitjai, mina uweg dawegjai achikjum diigtustajum, wakanik nejesh ukunchish atsugnai.

⁴⁰ Takug niina uwejen, dawenmashkam achiamu aajakua nuna ditan inaktusajui.

⁴¹ Dutikam shiig aneenayatak, dekaskeapi tumainchau dekapiagtai chichajak:

—¿Yumainuk atsugtamainawak? —tau.

⁴² Tutai namak achijuamun puukag, dapá yumijjai susaju, ⁴³ dutikam ditash wainainaig yuwauwai. ⁴⁴ Nunik Jisus:

—Juna pachisan atumjai pujusan, Moisés, Apajuí etsegtin aidau, Salmosnumash mina pachitus agajajua duka ashí uminkattawai tusan ujaya-jime, —tiuwai.

⁴⁵ Nuna aatus taku Apajuí chichamen agagbauwa nuna shiig dekamtikawajui, ⁴⁶ dutika nuigtushkam:

—Apajuí chichame agagbauwa nuwig, Kristuk waitkasa maam atinai nunikash kampa-tum tsawanta juwi nantaktinai, ⁴⁷ nunikmatai niina daajin pachis Jerusalén nagkamas, ashí nugkanmash etsejiagtinai, tudaujin idayinak tsagkugnagtinme tusag, ⁴⁸ atum ainagme ju ashí wainkaujum nunú etsejatin aidautigmek. ⁴⁹ Tujash yamaikik Jerusalegkak juwaktajum, nuniagmin wi mina Apag Wakaní Pegkejin anagkagtuamua nuna awetitjime, ni senchimti-jamawagtatui, —tiuwai.

Jisus nayaimpinum wakitkimu
(Mr. 16.19-20; Tak. 1.9-14)

⁵⁰ Juna ashí ujak ni jintintaiji aidaun yajuak, yaakat yaijuch Betanianmanini weuwai, nunik nui Jisus uwejen takuí: Apajuí yaimpaktinme, tiuwai. ⁵¹ Tusa akateamuik yakí takuniuwai. Nunik nayaimpinum wakitkintai, ⁵² ememati ukuinak, shiig aneasag Jerusalén waketjajui. ⁵³ Nunikag juga Apajuí ememattainum kashí kashinig tuke ijuntsagké aidau Apajuin emematuinak.

Aatus atí.

**Awajún [Aguaruna]
Aguaruna: Awajún [Aguaruna] (Bible)**

copyright © 2020 Wycliffe Bible Translators, Inc.

Language: Aguaruna

Translation by: Wycliffe Bible Translators

Contributor: Wycliffe Bible Translators, Inc.

Aguaruna

agr

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Aguaruna

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2015-03-17

PDF generated using Haiola and XeLaTeX on 21 Feb 2024 from source files dated 29 Jan 2022

83ecbfd-5af5-5abb-945b-1213bf2b2b18